






Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
723/A





Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
723/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
723/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
723/A

5594

Op 2
(2)

ΤΣΕΡΟΤΟΜΟΤΟΚΙΑ

FRANCISCI

ROVSSETI,

GALLICE PRI-

MVM EDITA,

NVNC VERÒ

CASPARI BAVHINI *Medi-*

cinae Doct. & Profess. in

Acad. Basiliensi

Opera

LATINE REDDITA:

Multisque & variis Historiis in APPEN-
DICE additis locupletata, com-
probata & confirmata.


ADIECTA EST

IOAN. ALBOSII Medici, LITHOPAEDII

Senonensis, per annos XXIIIX. in Vtero

contenti, Historia ele-

gantissima.




BASILEAE

Apud CONR. VALDKIRCH

CLIO XIIIC.







Generoso & Illustri
COMITI

D. GEORGIO, BVRGGRA-
VIO à Kirchburg, Farnro-
da Thuringorum
Domino

CASPARVS BAVHINVS
Basiliensis, Medicinæ Do-
ctor & Professor
S. D.



POLLINEM pri-
mum fuisse, Generose
COMES, memorant,
qui infantem utero ma-
terno exsecuerit: AE-
SCVLAPIVM nimi-
rum è Coronide matre à Diana (cùm

)(2

E P I S T O L A

iniuriam fratri factam, dum Coronis, I-
schie Elati filio concubuiſſet, ferre non
poſſet) interempta, ut author eſt Ouidius
2. Metam. & Natalis Comes lib. 4 Mythol.
cap. 11. Dein P. SCIPIONEM AFRI-
CANVM priorem, defuncta parente, v-
tero exciſum in die veniſſe, teſtatur Solin.
cap. 4. Polybiuſ. & cum Silio Italico lib. 13.
Plinius Natur. hiſt. lib. 7. cap. 9. ideoq³ pri-
mum CAESARIS nomine apud Ro-
manos ſalutatum fuiſſe. Non enim à C.
Iulio Caſare Romanorum Imperatore Cæ-
ſares dicti fuere: licet enim Acurſius in
Prafat. Inſtit. in gloſſa verbi Caſar, à Cæ-
ſare Auguſto, qui tempore natiuitatis
Chriſti regnabat, Juſtinianum Caſarem
& exinde quemlibet Imperatorem velit
dictum fuiſſe: quo loci Sylu. Aldrobandus
addit, vel melius à Iulio Caſare eius auun-
culo, ſecundum Bald. Ioan. Fab. & Chri-
ſtoph. vel dicitur (addit idem) Caſar, quia
fuit caſus de ventre matris ſue. Vult enim
Suidas, Iulium Caſarem natum non eſſe:
matrem enim eius nono menſe mortuam,
diſſectam fuiſſe. Quod licet Ioachim^{us} For-
tius

DEDICATORIA.

ius falsum dicat, eo ductus argumento, quod Iulius matrem habuerit Aureliam, feminam (ut habet Plutarchus) primariam, & singulari pudicitia mulierem, quam tamen amiserit, cum bellum Gallicum gereret: quæ, ut inquit Fortius, superuivere nequiuisset, si cæso eius utero natus fuisset. Verum cum in hoc tractatu, cuius patrociniū, dum cum Latinum reddidimus, suscepimus, illud agatur, ut probetur factum viuentem ex matre viuentem exscindi posse, salua parente, fatig, aliter hoc dubium soluendum venit. Dicimus ergo primum forte qui Caesaris nomen sit sortitus, e matris casum fuisse utero: quamuis, autore Pompeio, verius Cæsones, quàm Cæsares dicantur. Plinius tamen & Caesaris & Cæsonis nomen eis tribuit. Non tamen desunt (ut autor est Cuspinianus) qui Caesaris etymon à cæso in pugna Elephanto, qui lingua Maurorum Cæsar dicitur, ducant: vel quod oculis fuerit cæsis, hoc est, glaucis: vel à cæsarie, qua natus proditur primus (quæ omnia aliqui Scipioni tribuunt) quisquis is fuerit, qui

EPISTOLA

*Cæsaris nomen indeptus sit : posteriorem
 sententiam Iohannes Ferrarius Monta-
 nus in Institut. amplectitur, à quo postmo-
 dum successores Imperij, Cæsares dicti sint.
 Nam ut Spartianus in Aelio Seuero testa-
 tur, Cæsares sunt quasi Principum qui-
 dam filij, & designati Augustæ maiestatis
 heredes. Nec à Iulio, Romanorum Dicta-
 tore summo, Imperatores Cæsares (quod
 Iuliorum esse cognomen à cæsarie Festus
 lib. 3. cum Prat. vult) dictos esse, licet ex
 Scipionis historia pateat, ut qui ante Iu-
 lium vixit, clarum magis fit ex eo, quòd
 Iulij parens, qui Pratura functus, Pisis
 obiit, etiam Cæsar fuerit nuncupatus: imò
 testatur Spieg. cognomen Cæsaris primum
 aucto Dictatoris contigisse. Sed hæcenus
 de nomine Cæsaris, à quo hic Liber de Par-
 tu Cæsareo inscribitur. Sed & MAN-
 LIVM, qui Carthaginem cum exercitu
 intrauit, ex matris extractum fuisse vte-
 ro testatur Plinius. Duo etiam in hæc rem
 præclara Bruschijs habet exempla. Pri-
 mum est, BURCARDVM, Comitem de
 Lintzgauu, Buchorn, & Monteforte (qui
 libera-*

DEDICATORIA.

liberalitate in Pauperes præstans fuit, & post obitum Cralonis, Abbas Sangallensis designatus, & ab Othone Magno per baculum & ferulam accepta, confirmatus fuit) hoc pacto lucem hanc aspexisse: cuius nomine vulgò Ingenitum dictum, eò quòd ex mortuæ matris aluo, Anno 959. exsecutus esset. Alterū est, GEBHARDVM, Vithonis Comititis de Bregentz F. (qui Anno 1001. Constantiensis Episcopus factus est, & Monasterium Petershusium, item Templum Ceriacense, in emporio nobili Heluetiæ, Zurzach dicto, extruxit) ex matris utero fuisse exsecutum. Quod sanè ut rem notatu dignissimam Historici proponunt, sed maioris sanè ponderis atque momenti existit sectio, quæ in hoc proponitur tractatu, dum docetur modus & ratio fœtum viuentem, non ex parente mortua, ut in prædictis accidit, sed viua, & hoc absque vel matris vel fœtus vitæ periculo, & id quidem absque priuatione alterius conceptus, exsecare: quod in Heluetiâ primū attentatum fuisse, ex Histor. 1. ipsius Appendicis satis patere arbitror.

EPISTOLA

Quum ergo Tractatus hic Gallicus in manus meas venisset, semelq; ac iterum perlegissem, à plurimis ut eum Latina veste donarem, rogatus: non potui non iis, qui Gallicum nō intelligunt idioma (cū dignum censerem qui Latine loqueretur) hac in re gratificari: partim ut eius usum sæpè necessarium pluribus impertirer: partim etiam, ut inter tot occupationes, aliqua exercitatione homine libero digna, mentē meam reficerem. Eum ergo quā potui fidelissimè conuerti, quā eleganter autem, quāuē perspicue id præsiterim, aliorum esto iudicium. Illud tantū monuero, enixum quidem me, ut Latine loquerer, mihiq; magis cordi fuisse quā proximè ad auctoris verba accedere, quā liberiore sermonis genere uti: quod sanè patebit ei, qui versionē hāc cum Autographo contulerit. Dein etiam sicubi Latina me deficiebant verba in re noua, verbis interdum Græcis, interdū ex Gallico idiomate desumptis, tanquam notioribus usum esse. Semper enim Platonis & Galeni sententia mihi veniebat in mentem: Verba

DEDICATORIA.

ba iis esse negligenda, quibus multarum magnarumque rerum contemplatio esset proposita: laudandamque magis orationem, quæ verbis apertioribus (modò ne forent prorsus barbara) quàm quæ limatioribus uteretur. Locorum nomina, quoad fieri potuit, Latina fecimus, opera Iouij, Aemilij, & Dinothi vsi, & id, ut ij, qui Gallica non intelligunt, succedanea habeant Latina: verum cum ea obscuritate non careant, idcirco Gallica locorum nomina margini adposuimus. Videbuntur sat scio, historie multæ in hoc tractatu contentæ, propè incredibiles, & à veritate nonnihil alienæ, in re videlicet inusitata & noua. Verum mihi secus videri, satis superque, ex Appendice nostra, dum aliis historiis idem comprobamus, patebit.

Hunc ergo qualemcunque laborem, Generosæ D. COMES, sub tuo nomine, tanquam Aiæ clypeo in lucem prodire volui. Volui verò istud hoc nomine cum primis, quòd singulari humanitate non solum literatos, & rem literariam te prosequi, sed etiam studio Medico delectari, ex

)(5

EPIST. DEDIC.

*familiari colloquio compertum habeam.
 Qua sanè in re Heroes priscos, etiam cele-
 berrimos quosq; Reges (inter quos admira-
 bilis ille Hermes Trismegistus, Alexander
 Magnus, Attalus Pergamenus, Mithrida-
 tes Ponti & Asiae Rex, ut è multis paucos
 referam) imitaris. Debui & eapropter,
 quòd corporis valetudinem, unà cum Or-
 natissimo doctissimoq; viro D. M. Antonio
 Fabricio Praeceptore, mihi commiseris. Hoc
 ergo Opusculum, tanquam mea erga T. G.
 grate voluntatis pignus, benignè (donec
 tempus maiora dederit) operamq; meam
 in quibusvis alijs T. G. addictissimam, su-
 scipias etiam atque etiam submissè rogo:
 me quoque omni studio, obsequio, ac qua
 decet animi propensa voluntate, commen-
 do. BASILEAE Rauracorum, Anno e-
 pocha humanae M. D. XIIC.
 pridie Kalendas
 Augusti.*

AD

A D
FRANC. ROVSSETVM
IOAN. ALBOSIVS.

*Qui vicit Pœnos, cuiq₃ Africa subdita, dictus
A cesa Cæsar parturiente fuit.
At quæ viuentem fœlix exclusit ab aluo
Fœtum, eadem matrem sustulit ægra dies.
Quandò hac Lucina es maior, Roussete? supersunt
Ingenio fœtus, fœtaq₃ cæsa tuo.*

A D
CASPARVM BAVHINVM
IACOBVS GREGORII Panno-
nius, Med. Doctor.

*Grata Deo res est, necnon mortalibus agris,
Vni si Medicus fert miseratus opem.
Gratior illa tamen, laudemq₃ meretur honestam,
Pluribus his vitam si reparare queat.
Hoc quia tu facias sacram per Apollinis artem
BAUHINE, eximia vir pietate grauis:
Rem longè gratam facili summoq₃ parenti
Præstas, Terrigenis consulis atq₃ probè.
Dum vigili cura præcepta fidelia tradis
Et nos de variis edocuisse studes.
Gallica sollicitis manibus quoq₃ docta reuoluis,
Ac Latiam in linguam vertere scripta soles.*

Testatur praesens veluti nouus iste libellus,
Qui venit in lucem sedulitate tua:
Hic quonia monstrat, qua vterus ratione secandus,
Viuat ut & fatus, viuat & ipsa parens.
Commoda multa quide multis, verum tibi pulcrum
Inde paras nomen, non sine laude tamen.
Maior at exsurget tibi laus & gloria maior,
Si dabis in lucem, quos meditare libros:
Scilicet Herbarum concinna synonyma, plures
Ut dubios possis conciliare viros.
CORPORIS aut secti methodum certo ordine
scriptam,
In vulgus, quam non edidit ullus adhuc.
Ergo tuis scriptis pergas celebrare Tonantem:
Et miseros homines sedulus vsq; iuues.
Sic tibi fata dabunt felicitis tempora vitae:
Durabitq; diu nomen in orbe tuum:
Posteritas seros gaudebit grata per annos:
Talia BAVHINI cum pia scripta leget.

AD EVNDEM
VALENT. THILONIS
LIGII.

Quò, BAVHINE, rapit tua te insatiata libido,
Fulgida Pconia dum face signa locas?
Eruis herbarum miras e montibus artes,
Et vario ornatas instruis ore loqui.

Opponis

Opponis rabide Lachesi tua pharmaca, multos
Dum revocas luci, quos mala dira premunt
Corpora cassa secas, & fibras digeris, artus
Monstras, & mira singula lege doces.
Quid loquar? & Fetus è viva matre recisos
Dicis in aeris vivere posse plagis.
Mirū hoc, testaris tamē, hunc dum pumice tersum
Erudis Ausonio cultius ire librum.
Vive, Machaonias acri studio impiger artes
Excole: & his fertis altera ferta feres.



ELENCHVS
EORVM, QVAE IN HOC
continentur Opusculo.

ΥΣΕΡΟΤΟΜΟΤΟΚΙΑ,

Hoc est, Extractio foetus ex utero gravidæ mulieris, quæ secus parere nō potuit, Abdomine & utero per latus inciso: tum absque Matris, & foetus periculo, tum etiam absq; eiusdem Matris fecunditatis (post sectionem) ablatione.


APPENDIX variarum historiarum, ea quæ in *υσεροτομοτοκία*, seu libello de Partu Cæsareo tractantur comprobantium, inter quas Corporis sine Hepate & Liene: item INTESTINI citra mortem incisi, cum VALVULA in colo intestino, Anno 1579. primò observata, continetur historia, CASPARO BAVHINO authore.


LITHOPÆDION Senonense, hoc est, Embryonis in utero materno per annos 28. contenti, petrefacti, & post Matris mortem ex utero exsecti historia, IOAN. ALBOSIO Medico Gallo Clariss. autore: addita exercitatione Problematica, de istius indurationis causis.

ERRATA.

Pag.16.lin.10.lege Puiseaux et. pag.59.l.1.propo
neretur. pag.96.l.1.grauissimum. pag.99.l.8.ver
bum. pag.110.l.2.narrauit.







ΥΣΕΡΟΤΟΜΟΤΟΝΙΑ

FRAN. ROVSSETI

Medici Galli,

Operâ


CASPARI BAVHINI BASIL.

Med. Doct. è Gallico Latina facta.

SECTIO PRIMA.

Partus Cesarei definitio.

CAPVT I.



CAESAREI partus nomine propriè intelligimus, scitam ac dextrâ infantis ex utero materno, & quidem per latus, extractionem: matris; inquam, quæ haud alia ratione fœtum quàm sectione conuenienti, tam Epigastrij, seu ventris exterioris; quàm ipsius Vteri, excludere potest, citra tamen vllum alterutrius, aut amborum, matris puta, aut fœtus (modò

A

aduentitio malo non premantur) vitæ discrimen: incolumi etiam seruata impofterum matri pariendi facultate. Id quod de partus adhuc viuētis extractione intelligi volumus.

Sub hoc & mortui fœtus ab vtero materno extractio comprehenditur cū obstetricandi omni spe sublata, medicamentorum item, aut leuiore certiorēue Chirurgica ope deplorata, ob partum alio cōcluium, in discrimen vitæ mater adducitur, nisi hoc vnico subsidio laboranti succurratur. Id quod quotidiana docet, in cuiusvis conditionis mulieribus, experientia, iis inutili conatu & fructu euisceratis & miserè dilaniatis.

Quod ad viuorum ex parente mortua (q̄ tamen hac ratione in viuis conseruari poterat) exsectionem attinet, cū iusto copiosius, tam à veteribus, quàm à neotericis scriptum sit, neq; res tanto artificio egeat, eiusce hīc nullam mētionem faciam: tamen ab ea Romanorum Imperatorum primus, Scipio videlicet Africanus, ex matris vtero, hoc vti dicimus pacto, sectus, Cæsaris nomen sortitus sit, & ad illius imitationem, hunc nostrum partum Cæsarei nomine inscripserimus. At nos hunc
cundem

eundem partum, diuino annuente numine, longè feliciori successu perfecturos speramus: sine materna scilicet nece, quod Scipioni nō contigit, qui matre interempta, vti ex Silio Italico liquet, suauissimam hanc lucem aspexit.

De vsu ac necessitate partus Cæsarei.

CAPVT II.

QUod igitur attinet non solum ad utilitatem huius sectionis, sed etiam ad eius necessitatem, sciendum siue adhuc viuēte fœtu, siue illo emortuo, vel eodem debili, vel robusto, modò eum mater eniti nequeat (ob eas quas postea memorabimus causas) tum omnino ad sectionem hanc confugiendum erit, aut vtriq; fœtui & matri necessariò erit moriendum, etiam si adhuc viribus valeant, quanto magis si iam prosternantur & concidant. Vnum itaq; in ea sectione salutis præsidium.

Vsus porrò geminus est: prior, quia nempe tum viuus extrahitur fœtus, qui aliàs in vtero materno, ceu carcere suffocatus fuisset: alter, quia mater non modò seruetur incolumis (modò ratione qua decet, tempestiuè & cōstantibus adhuc viribus, secta fuerit) cui alioqui moriendum fuisset.

set : imò etiam non minùs in posterum
 vtero gestando apta futura sit. Quod si ve-
 rò fractis iam viribus & desperata salute
 incidatur, saltem supererit aliquid spei e-
 uadendi mortis periculum, si chirurgus
 (postquam præfatus fuerit rei discrimen)
 ex arte sectionem administrarit: cuius e-
 tiam si anceps sit euentus, incerta tamen
 salus, certissimâ morte semper fuerit po-
 tior. Seruiunt hæc, inquam, non tantùm
 conseruationi cõnubiorum, propagatio-
 ni generis humani, aliisq; priuatis homi-
 num confœderationibus ac commodis: i-
 mò etiam Rebus publicis, politicisq; re-
 rum humanarũ administrationibus, cùm
 huius sectionis beneficio cuiusque genus
 ac prosapia conseruetur, & ad cuiusq; po-
 steros successionem hæreditaria, patris in fi-
 lium, vel propinqui in propinquum, o-
 pes, dignitates, regna, imperia deuoluan-
 tur, quæ alioqui sectionis huius ignoran-
 tia magno cum Reipub. ordinũ ac subdi-
 torũ euidenti detrimento grauissimis vi-
 cibus & mutationibus, sæpenumero sub-
 iecta esse cernimus. Verũ leuiori de causa,
 quã hæc sit (cuius gratia sectio instituitur)
 scripsit Hip. Aph. 59. lib. 5. *Si mulier nõ concipit, scire aut velis si cõceptura sit, pãnis circũtectam,*
desubter

desubter suffias: & si odor videatur per corpus ire ad nares & os, scito quod ipsa non ex se ipsa sterilis est. Quod ex commentario Galeni, super hunc Aphorismum, colligere est.

Qua causa difficilioris partus naturalis ad huius sectionis Casarea necessitatem nos impellant.

CAPUT III.

CAUSÆ naturalem foetus exclusionem impredientes, hancq; incisionem necessariam reddentes, plures atque diuersae sunt: vel enim in infantem, vel in matrem referendae. Ratione quidem infantis, si nimis crassus, magnusue, vel gemini aut plures sint, qui vnâ exitum quærant: aut si mola carnea sit coniuncta, aut monstrum, aut si situ non conuenienti prodeat, ita ut nec sui ipsius, nec aliorum ope, in pristinum melioremue situm reduci possit. Vel si mortuus sibi ipsi, uti par esset, auxilio esse non possit: vel tandem, si adeò intumuerit, ut ipsi per viam consuetam exitus non detur. Ratione verò matris, si fortè via, per quam foetus excludi debet, sit quàm oporteat angustior, id quod variis de causis vsu venit: vel enim ratione Conformationis,

cum vna meatum multò strictiorem altera habeat: quod sanè viris etiam contingit, quibus genitalia pari magnitudine non sunt conformata. Vel ratione ea, dum aut nimis iuuenes, ante viarum dilationem nupsere: aut si senio iam confectæ, uterus exaruerit, præsertim si tardiùs nupserint. Sed & hoc accidit iis, quæ crebriùs quidem utero gestarunt, interruptis tamen vicibus enixæ sunt, ita ut viæ per hæc interualla, tum etiam per ætatem, angustiores & ficciores fuerint redditæ: ratione cuius, os pubis, quod tempore partus dissolvitur (licet sint qui contrarium sentiant) difficiliùs separatur.

Sed hoc etiam aliquando vitio ortus, præter aliarum consuetudinem cõtingit: si fortè statim à natiuitate, vel in sinu, vel in collo, vel in fundo uteri, aliquod sit obstaculum, ita ut ob angustiam viarum semen virile, vix in ceruicem uteri eiaculari possit, quod tum ab utero attractum, & per nouem menses conseruatum, tandem in fœtus magnitudinem accretus, ob coangustatas vias excludi nequit. Sub hoc etiam intelligimus vitium tale, quod Mulieri post natiuitatem contingere potest, ut si fortè vlcere uteri, aut ceruicis eius laborarit,

borarit, vt hac ratione cicatricem, aut cal-
 lum contraxerit, siue id ob partum diffi-
 ciliorem, vel calculi minus dextram ex-
 tractionem, vel ratione humoris acris, e-
 rodentis & exulcerantis, vel denique ob
 apostrema iis in locis genitum, fiat. Sed
 horum omnium Symptomatum, quæ
 generali nomine Græci *φιδώσεις* vocitant,
 tam Celsus & Ægineta aliiq̃ue ex veteri-
 bus, quàm neoterici Chirurghi meminê-
 re, quorum plurima (licet cognita) tamen
 ab ipsis pro deploratis habita sunt, cum
 pudor & verecundia muliebris, cura-
 tionem non admittant. Et quamuis ho-
 rum affectuum aliqui in mulieribus non
 grauidis, modò ab ipsis tempestiuè forent
 expositi, per se sint sanabiles: in graui-
 dis tamen, quo tempore intactas relin-
 quere oportet, res vti & in aliis quasi de-
 plorata relinquitur, & consequenter pari-
 endi facultate priuantur. Hæc ergo cum
 sæpè & pluribus etiam accidunt, non
 solum vtilem sed & necessariam esse se-
 ctionem hanc Cæsaream dictam, osten-
 dunt. Hinc fit vt partim ex ignorantia
 horum Symptomatum, partim verò ex
 neglecta hac sectione (quod vnicum est
 remedium) quotidie infinitæ, tam infimi

quàm illustris ordinis fœminæ pereant: quæ res maximum, ob posteritatis spem ademptam, Principibus mœrorem conciliare solet: subditis verò (vt iam dictū est) ob amissionem legitimi Principis, sæpius detrimento esse consuevit. Accedunt etiā enarratis causis, naturalem fœtus exclusionem impredientibus, infiniti tumores ilicò exorientes, inflammationes, defluxus, apostemata, scirrhī, lupiæ & plures aliæ durities, quæ omnia & possunt & consueuere has vias, & alias corporis partes, ita coarctare, vt quo minùs mater præfinito tempore parere queat, impedian: nec etiam partus differri potest, cùm gestationis tempus sit finitum, quousq; hi tumores vel suppurentur, vel curentur, qui tamen excludi nequit.

*Triplex argumentorum genus, quibus
sectio hæc confir-
matur.*

CAPVT IIII.

CUm autem de proposita materia, neq; ab antiquis, neque à neotericis hætenus fuerit pertractatum, nec etiam sectio hæc in vsum hodie adhuc venerit, & non nisi à rōsoribus quibusdam paganis vsur-
para

para sit, idq; quā rarissimè: & quod maximum, à Medicis & Chirurgicis, qui & doctrinæ & experientiæ nomine celebres habentur, pro falso & impolsibili habeatur, quorum tamen erat, diligentius rem perquisitam commendare: necessarium erit omnes neruos intendere, vt ipsis persuadeatur, huic rei fidem vt adhibeant & in vsum reuocent. Tribus verò id rationibus absolui poterit: experientia nimirum certa: rationibus validis, & autoritatibus (si modò haberi possint) certissimis. Prima Historiis veris & approbatis absoluetur: altera verò Medicis disputationibus perficietur. Tertia ratio, cū haftenus nemo (quod quidem ad manus nostras peruenierit) hac de re, quidquam scripserit, nobis deficit. Quare eius loco per Analogiā disputabimus, similibus in medium reuocatis sectionibus, aut etiam periculosioribus in iisdem humani corporis partibus, aut earum vicinis, imò etiam præstantioribus & magis læsis, quarum tamen curatio cessit feliciter, ita vt inde sectionem hanc præsentem feliciorem nobis polliceamur: cū sectiones hæ partim consilio meo fuerint adhibitæ: partim verò earundem curationes, cū ex celeberrimorum

Medicorum adhuc superstitum praxi collegerim: tùm etiam ex autoribus, tàm veteribus quàm neotericis excerpserim.

Historia ex fide dignorum relatu.

CAPUT V.

AC primum quidem, quod ad historias, quemadmodum aliorum experientie tantum credere nolui, quin meam ipsam quoq; ad maiorem fidem adhiberem. Sic etiam meis observationibus tantum tribuere nolui, quin eadem similibus historiis ex fide dignis diligenter perquisitis, testata facerem, quas primo loco paucis enarrabo, ut subinde subiungam eas quas meas voco, partim quòd meo consilio administratæ sint, partim verò quòd earum fuerim oculatus testis, observatis singulis circumstantiis in ipsis mulieribus incisis, etiam in ipsarum ædibus, non solùm Chirurgis opus attestantibus, sed incisarum mulierum viris ipsis, liberis, earumq; tota familia, aliisq; pluribus qui sectioni interfuissent.



HISTO.

HISTORIA I.

NON ita pridem ex quibusdam senibus *Milly en Gassinoy.*
 fide dignis prope Millyū Vastineti co-
 gnoui verū esse, (de quo etiam apud ipsos
 dubium non est) cuiusdam Gothardi, ha-
 bitantis Mesnilij, quæ Millyi parochia est, *au Mesnil.*
 cōiugem, ante aliquot annos, sexies, cum
 alio modo parere nō posset, sectione eius-
 modi fœtus semper viuentes esse enixam.
 Postquam verò Nicolaus Guillet tonsor
 Millyensis, q̄ sectoris munus obierat, mor- *de Milly.*
 tuus esset, cum septimò grauida, nec alia
 ratione fœtum excludere posset, nec esset
 qui huiusmodi sectione consueta ipsi sub-
 uenire nosset, ipsam mori oportuisse; q̄ sa-
 nè argumento est, magnam phimosin vel
 naturalem angustiam fuisse, quæ quidem
 recipiendo semini, non autem fœtui ex-
 cludendo sufficeret.

HISTORIA II.

CERTò cognoui ex Ambros. Nigro Chi- *Pithuiera.*
 rurgo Pithuerræ expertissimo & Æ-
 gidio Bruno ipsos vnà mulieri paupercu-
 læ iuxta Merinuillam Belsiæ, tres infantes *Merinuille*
 viuos è latere extraxisse: quam cum inuise- *en Beauffe.*
 re esset animus, vt locum vulneratū inspi-
 cerem, relatū fuit ipsam paulò antè peste,
 quæ tum vehementer sæuebat, periisse.

HISTORIA III.

chastre en Berry. EST mihi ad manus D. Alboſij Medici Senonenſis perdocta epiſtola, in qua

fuſè, ſummo tamen cum ordine exponitur, qua ratione Ioannes Maræſius (id eſt, Paludanus) Chirurgus apud Chatras Biturigum, Ludouici Maræſij Archiepiſcopi Senonenſis Salazaris, Chirurgi ordinarij filius, è propriæ coniugis latere incifo, filium Simonem Maræſium nomine extra-
xerit, qui poſtmodum etiam Chirurgus, & Reginae matris cubicularius factus. Nihil oſecus tamẽ mater huius naturali modo poſtmodum filiam Renatam nomine eſt enixa, quæ dein præfecto ſalinario nupſit. Hic Simon (qui ſine matre cognominabatur) ex Roſa Gallardet vxore, binas filias ſuſcepit, alteram Claudiam quæ poſtea Francisco Artus Yxilodunienſi fuit deſponſata: alteram verò Franciſcam, Oliu-
d'Yffoudun. uario Gannier nuptam. Hæ abundè ſatis atteſtari poterunt, ea quæ de paterna natiuitate dicta fuère, cum hæc partim ex vulgi fama, maximè verò ex frequenti parentis relatu, cognoſcere potuerint.

HISTO-

HISTORIA IIII.

DOminus Pelion, celebris Medicus Andagauensis, cum pridem Lauren-^{Angier.} rio Collot Chirurgo cysthotomo Lutetia-^{en Anien.} no, similem casum, qui in Andium ducatu contigerat, narrasset, idem tamen nuper epistola ad ipsum data, (quam mihi tradidit) confirmavit. Opus autem hoc peractum esse à quodam Maturino Debonnaire Chirurgo solum monet, nec sigillatim reliqua pertractat.

*Historia, ab ipsomet authore visa
& notata.*

CAPUT VI.

NE tibi amice Lector, dum iusto sum prolixior, in recitandis leuissimis quibusvis circumstantiis tedium parere videar, scias hanc minutissimarum rerum enarrationem, mihi quidem labori, tibi verò usui esse, quo facilius rei propositæ fidem adhibeas, veritate iis in locis, vbi hæc contrigisse monuimus, indagatâ, quod certâ ex iis, qui fuisset videre oculis, si modò dubites, intelligere poteris.



HISTORIA I.

Gian. Chastillon. Ante exortū bellū ciuile D. Dionysius Armenautius Medicus Genabi & ego vnā, vidimus in Xenodochio Castellionē, si, mulierem febris continua laborantem, quæ in inguine sinistro rupturā habebat, cum cicatrice & factæ futuræ conspicuis punctis, quæ post apertionem ipsius Abdominis remanserat. Testabatur ipsa cum marito, ante aliquot annos, filium qui tūm septennis erat (quem nobis ostendit) cum aliter excludi nō potuisset, extractum esse. Quæ incisio per senem tonsorem eius pagi in Burgundia, in talibus (ut ipsi narrabant) exercitato, peracta fuit: cuius nomē cōsignāram, quo cum ex ipsomet, tam per literas, quā per amicos, eius rei veritatem indagarem: tūm etiam ut ex eodem operationem ipsi familiarem addiscerem. Sed eorum temporum iniuria fecit, ut & loci & personæ consignationem amitterem, & hac ratione contigit, ut id quod expetebam non cognouerim. Verūm ab incisione facta, licet adhuc ambo iuuenes essent, vterō non gestārat. Et hoc proculdubio ab Armenautio, ipsius familiares, sæpius narrari audiūere, quod quidem cum ipse, uti & alij quā plures, cum initio ut crederet adduci

adduci non posset, pro indubitato postmodum habuit, ita ut animum induxisset, si fortè necessitas id requireret, sectione hac uti.

HISTORIA II.

CUM quatríduū extremis & irritis conatibus partus, diuexata esset Bernhardina Arnolda, Stephani Malsicault è Nangeuillo pago vxor, qui inter Stampas, *Estampes,* Puillethum & Pithuueras situs est, atque *Puisse auxes Pithuiers,* in extremis constituta, implorato meo per maritum auxilio, cum de sectione consilium audiisset, vel reclamante marito animo confirmato hanc in se experiri audè cupiit, idque ita subito post intellectum consilium meum, ut nollet Ambrosij Nigri aduentum expectare, quem tanquam in hac arte exercitatum, missurum me eram pollicitus, cum ob grauissimum morbum, quo tùm detinebar, mihi adesse non liceret. Sed opera Ioannis Lucae iuuenis tonsoris vsa, qui tum ut etiam num Bunonij, *Bunonij* in paruo pago vicino habitabat, qui dextrè incisionem hanc sibi licet nouam anno 1556. die ipsius Paschatis in multorum praesentia peregit, cuius rei aliqui, in primis verò ipse, testimonium

perhibere possunt. Incisio (exemplum enim præcepti loco habeatur) à dextra Abdominis parte, transuerso digito infra umbilicum, & ultra quatuor digitos, ad latus ipsius incipiebat, inde recta ad pudenda usque progrediebatur, absque tamē rectorum Abdominis musculorū lēsiōe: tribus enim digitis supernè a recto musculo distabat, infernè verò paulò minus. Musculorū, uti & Peritonæi facta incisione, absque tamē magna hæmorrhagia, vterus conspectui se obtulit, quem etiam separatim incidit, facto satis magno vulnere, quo fœtui uiuenti uti & secundinæ, facilis per vulnus pateret exitus. Postmodum labia vulneris non gastroraphi, sed communi vulnerum futura quinque punctis consuit, non quidem vterum sed musculos & peritonæum, uti ipsemet obseruaui, dum eius solū rei gratia, cū conualuissem, ipsam inuississem. Sed & posthac sæpius in ipsa id commodè obseruaui, dum Herniam percurare conarer, quam deinceps semper habuit, vel ob futuram minùs rectè adhibitam, vel quod minùs diu quàm par erat, in puerperio remansisset, quadraginta enim solū diebus lecto se continuerat. Sēsquianno autem post, priori marito defuncto, cum
Petro

Petro Chāclau nupsisset, qui etiamnum superstes, rursus concepit, & feliciter naturali modo, filiam enixa, quæ etiam secundas nuptias contraxit, & Nangeuillæ habitat, quo loci, plures adhuc hodierna die, fide dignos huius rei testes est reperire.

HISTORIA III.

Nicola Beranger, Simonis de la Garde coniux, quæ Alrij Briæ ppe Fontembellaqueum, loco duobus miliaribus ab vrbe Nemorso distante, habitabat, cū menses decem & quidem iam pridem fœtum mortuum vtero gestaret, orificio vteri se non recludente, tandem Vincentium Valleau Chirurgum Nemorsensem veteri mihi familiaritate iunctum, ad se vocauit: qui cū aliud auxilium, quo ipsi succurrere posset, non videret, circa Ianuarij finem, anni 1542. incisione lateris, non quidem vt prior dextræ, sed sinistri vsus, loco tamen paulò altiori quàm ipsius Nangeuillanæ erat: dissecto prius abdomine, dein ipso vtero, ex quo fœtum mortuum, inflatum & fœtentē vnā cum secundina putrida extraxit. Hoc factō (cū de salute apud i-

*Aury en Bié
re pres Fontainebleau:
Nemours.*

psum exigua esset spes) cutem vnà cum
portione exigua Musculorum, relicto ta-
men vtero, quinque punctis consuit, qd'
adhuc conspicuum, cum sola ipsius cutis
cicatrix, super ipsa intestina conspici-
tur, hanc enim vt viderem incisionem,
cum Pauie Chirurgo Nemorsensi (præ-
dicti Valleau quondam famulo) eò abie-
ram : quare locum cicatrice obductum
& vidi, & manibus, absque tamen dolo-
re, tractaui : sed eam subligaculo vti o-
portuit : & licet magna foret hernia, ni-
hilo tamen minus victum, vti licebat,
manibus laborando quærebat. Quare
studiosè hoc obseruandū erit, quò om-
nes intelligāt perfectam gastroraphiam
eo loci non necessariò requiri, ne dum
laboramus ex arte perfectam futuram
(quamuis non necessariam) efficere, to-
tum opus perdamus. Mense sesquialte-
ro lecto se continuit, dein biennio post
filiolam commodè enixa & altero post-
modum biennio, filium, cui nomen erat
Petro de la Garde, peperit, qui nunc fa-
ber ferrarius est. Ipsa verò adhuc super-
uiuit in pago Vry dicto obste-

triciis munere fun-

gens,

HISTO-

HISTORIA IV.

AGNETA Boyer Ioannis Campain rustici vxor, quæ Villerelli prope Neo *Villerean.*
 burgum Belsiæ cōmorabatur, postquam *Neufville en*
 integro quatrīduo miserè, & quidem fru *Beausse.*
 strā discruciatā esset, tandem vt & prædi-
 ctis, latus dextrum à Philippo Mignean
 tonsore Neoburgi habitante, sectione a-
 pertum fuit, quod anno 1544. contigit,
 dein prout licuit, Musculi vnà cum cute
 fuere confuti. Vulnus quidē hoc in Ab-
 domine breui temporis spatium fuit con-
 solidatum, sed partes genitales attritæ,
 Chirurgū ab omnimoda prorsus vulne-
 ris curatione vltra mensū septem spatiū
 impedire. Filiam tū habuit, q̄ vltra men-
 ses septē sana superuixit, octauo dein mē-
 se, dū eodē in pago apud nutricē esset, in
 morbū, qui ipsi fuit exitio, incidit. Pau-
 lō post denuō grauida facta fœtum gesta-
 bat, ad rupturam (quæ vti & aliis incis, absque tamen dolore remanserat) decli-
 nantem: verūm quemadmodū nec prius,
 ita neque tum parere potuit, ob aliquas
 causas & obstacula (vti coniectari licet)
 superius enarrata. Quare vltro sectio-
 nem, qua prius vsa erat, expetiit, quod
 tamen precibus qualibuscunque à duobus

Neufville. bus iunioribus Chirurgis, hanc ob causam Neoburgo eò vocatis (qui post Philippum peste extinctum eò loci habitabant) impetrare nō potuit. Quò factum, ut propter horū pusillanimitatem (cū tamen neque viriū prostratio, aliūdve difficilius symptoma ab incisione facienda, ipsos impediret) mater vnà cum prole miserè perierit.

HISTORIA V.

Pari pacto Antonia Andrea, Ludouici Garnier Operarij vxor, Anno 1576. Iulij 22. per Adamum Alberium *de Pithuiers* Pithuuerensem Chirurgum Obenignij *à Aubigny.* habitantem, Ambedoæ prope Brissonijsanum diœcesis Genabienſis, fuit incisa: quod ab ipsomet Chirurgo fusissimè vnà cum felici successu, mihi fuit expositum, propterea quòd sæpiùs cum ipso, huius sectionis gratia contulissim. Cui (cū ipsius mihi perspecta esset in operando dexteritas, atque felicitas) suasor eram, ut sectione hac, si alia deessent auxilia, absque metu vteretur, licet forent Medici, & alij, qui contradicerent, modo id fiat cum iudicio & explicata rei difficultate, in primis verò diuino auxilio implor-

DE PART. CAES. SECT. I. 21

implorato. Non enim hæc res inducias dat, nec etiam consilium longè petitum expectare licet, quod fieri solet in pagis, locisque campestribus: præsertim cum ipsorū nullus nec velit, nec audeat, huic consilio assentiri, eò quòd horum aliqui huic rei fidem non adhibeant: alij verò calumniā metuentes, ne si fortè etiam ob aliam causam, sinistri quid contingeret, autores mali haberētur. Postmodum rursus grauida reddita, naturali modo fœtum enixa est, sed paulò pòst ob summam annonæ caritatem, alibi victum ut quæreretur, maritum sequi coacta.

HISTORIA VI.

Historia habetur alia, quæ non ita pridem contigit: anno nimirum 1578. Calend. Februarij Iohanna Michel, Ar. *d' Argent.* gent oriunda, Georgij Renaldi, habitantis in suburbio Obenigniano, vxor, cum *d' Aubigny.* iam vltra mensem decimū grauida, diu fœtum mortuum vtero gestasset, nihilo tamen secus munia obibat domestica, donec lecto se continere coacta: quæ cum diu ab obstetricibus frustrà esset miserè tractata, tandem Adamum Alberium & Guillelmum Collas, insignes Chirur-

gos ad se vocauit: hi postquam infanti
brachium diu ex vtero materno propen-
dens, iam emortuum & liuidum absci-
dissent, nec tamen reliquum corpus ex-
trahere possent, latus dextrum incidere,
vulnere orbiculari & angusto satis (quo
matri parcerent) facto. Hinc factum, vt
dum in foetu extrahendo laborarent, ma-
gnos dolores matri intulerint. Vterus e-
nim ob vulnus angustius, foetum cum
dimittere non posset, eundem comitaba-
tur, ac si vnà extrahendus esset. Verum
dolores hi, post foetum vnà cum secun-
dina exemptum, sedati fuere. Et sic pau-
lò post fluxum lochiorum, (quæ non se-
cus fluxere, ac si naturali modo fuisset
enixa) conualuit, & septimanis quinque
elapsis, rursus menstruas purgationes ha-
buit, statimque post concepit, in fine ni-
mirum mensis Maij, anxia iam (rei an-
teactæ recentem colens memoriam) quid
tempore partus futurum esset. Verum
finito gestationis tempore, conuenienti
modo foetum exclusit, & licet infans v-
nam solùm tibiam exereret, (quod sanè
periculo non caret) tamen cum ab obste-
trice esset denuò indita, feliciter omnia
succedere. Ab eo tempore cum rursus
grauida

grauida facta, non tamen secus quàm antea felicem à Deo successum expectabat: quare nunc secundò feliciter peperit, muniisq; domesticis vt prius, ita etiamnum commodè præest.

SECTIO II.

*Altera huius operationis probatio,
quæ rationibus absol-
uitur.*

CAPVT I.

ROPPOSITA prima probatio-
ne, quæ historiis ab experien-
tia petitis, fuit absoluta: sequi-
tur alterum genus probatio-
nis, quod rationibus atque disputatio-
nibus perficietur. Desumuntur autem ar-
gumenta à natura, aut essentia subiecti,
postquam partes, quæ (antequam ad for-
tum perueniatur) inciduntur, methodi-
cè examinatæ fuerint: quæ tres numero
sunt. Occurrunt enim primo loco mu-
sculí ventris exterioris, abdominis pu-
ta, quod Græcis *ἐμύσκειον* dicitur. Dein pe-
ritonæum, membrana nimirum abdo-
minis, ipsis musculis subtenfa. Tum vte-

rus ipse. Vesica quidem, licet inter peritonæum & vterum, sedem naturalem habeat, tamen dum sectio Cæsarea dicta fit, non occurrit, sed inferiùs paulò in hypogastrio situata est, maxime verò in mulieribus mox parituris, in quibus vterus distensus eam deprimit, potissimum verò, tum cum doloribus partus conflantur, quo tempore plerunque vacua esse solet, ob perpetuam ad meiendum irritationem: cuius gratia etiam minus tū spatij requirit, locòq; longè inferiori, quàm ubi sectio fieri cōsuevit, posita est;

*De Musculis epigastrii, tanquam de eo,
quod primum inciditur: & pri-
mum de vulnere, eiusq;
magnitudine.*

CAP. II.

PRIMO omnium musculos ipsius abdominis posse absque periculo vitæ secari, manifestum est: quòd si nulla alia ratione id probari possit, sanè vel ex eo liquet, quod Gal. in sua Methodo Therapeutica, modum ostendit, vulnus eorundem artificiosa gastroraphia consuendi. Quòd si quis obiiciat, vulneris magni,

magnitudinem, manifestum minari periculum. Idem Galenus abundè satis ostendit, talem vulneris magnitudinem periculosam non esse, dum præcipit, eiusmodi vulnera in toto abdomine esse dilatanda, si minora videantur, quàm sufficiant repositioni intestinorum, aut omenti, si sint prolapsa, nec secus reponi possint. At si quis instet hoc simile non valere, cum insigniter amplum debeat esse vulnus, si modò magnum fœtum viventem, absque læsione extrahere velimus, aut saltem mortuum, prætumidum tamē unā cū secundina eximere. Respondetur, quòd vulnus, licet valdè magnum videatur, ita ut ad dimidij pedis longitudinem (si tanta opus foret sectione) fieri posset, statim extracto infante, ad longitudinem quatuor, vel quinque transversorum digitorum coarctatur: imò indies magis magisque coangustatur, donec uterus, qui elatus erat, planè collabatur.

*De Hemorrhagia, quæ ex sectione
Musculorum abdominis con-
tingere solet.*

CAP. III.

ET si res ita se habeat, aliquibus tamen

sectio hæc musculorum periculosa videbitur, ob copiosum sanguinis effluxum, licet hætenus levis fuerit iis, qui operationem hanc peregerunt. Verùm notandum, paucas valdè venas insignes eò loci, vbi hi muscoli inciduntur, occurrerent: non enim occurrunt venæ Mammariæ ascendentes, quæ secundum longitudinem rectorum musculorum, abdomen conscendunt, quas tamen solas hoc loci periculosam parituras hæmorrhagiam esset metuendum. Et licet aliquando ex improviso, in curatione Ramicum inciderentur, quæ in loco magis periculo obnoxio sit, quàm hic sit, non tamen ob id necessariò moriendum esset. Quod tamen Celsus sedulò cauendū monet, præsertim cum prædictæ venæ, & arteriæ, quæ circa hanc regionē occurrunt, quasi anastomosi coniungantur, proportionem tamē cum aliis abdominis partibus observata, cum post fœtus extractionem contrahantur, qua ratione sit, vt minus sanguinis effundatur. Verùm licet magna fieret sanguinis profusio, ei tamen facile cum iis, quæ sanguinem sistunt, occurrere posset: quod Paulus Ægineta suis Enphæmatis in curatione secti calculi, operis

peris sui libro sexto, perficit.

*De loco, quo sanguis, sectis Abdomi-
nis musculis, fluere
debet.*

CAP. IV.

VT ut res se habeat, parum multumue sanguinis effluat, nihilominus aliquis obiiciet: sanguinē (ut & pus, quod ex vulnere elabetur) post dissectum peritonæum, quod statim etiam secatur, in capacitatem ventris inferioris defluere debere, quo loci putrescens, ut monet Hippocrates 6. Aphor. 20. Intestina corrumpet, multaque mala symptomata inducet. Ad hoc respondeo, fieri hoc non posse, cum hæc abdominis capacitas non sufficiat, quam pro continendis intestinis, & iis, quæ à natura ob diuersos fines ibi contineri debent, ut in ventriculo, intestinis, & utero, ita ut si aliud quoddam corpus, potissimum liquidum abdomini ante sectionē fuisset inclusum, statim facto vulnere, conspectui se offerret, tanquam res naturæ molesta prorumpens, imò & intestina ipsa & epiploon, licet corpora sint solida, respectu sanguinis, quæ naturaliter eò loci continentur,

28 FRANC. ROVSSETI DE
elaberentur. Veritas huius rei conspicitur in Paracenthesi Hydropicorum, in vulnere abdominis, & etiam in Enterocoele, ubi intestinum nisi à cute contineretur, prolaberetur.

DE PERITONAE O, AL-
TERA PARTE, QVAE
incidenda est.

*De eiusdem sectione & vulneris
amplitudine.*

CAP. V.

Peritonæum absque vitæ periculo incidi posse, iisdem Galeni, Celsi, & Aeginetæ autoritatibus, dum de Gastroraphia agūt, manifestum est, cū eiusdem etiam vulnerati curationē doceant. Magnitudinem porrò vulneris curabilem, ex ipsorum sententia esse, hinc liquet, quòd vulnus ampliandum monent, si angustius sit, quàm reponendis iis, quæ extra abdomen prolapsa sunt, conveniat. Præterea, hoc magis comprobatur curatione ea, quæ ab antiquis vsurpatur in magnis rupturis, quæ vel propter dilacerationem, vel rupturam Peritonæi contingebant, quarum curatio ratione
Perito-

Peritonæi, longè quàm nostra hæc sit sectio est difficilior: huius Celsus & alij meminere. Curatio hoc pacto absoluebatur: Peritonæum vnà cum Musculis ipsius Abdominis incidebatur, cum noua ipsius substantiæ deperditione, maiori adhuc vndiquaque quàm erat ipsius ruptura, facto vulnere: tum scalpello duæ lineæ immittebantur, vt exciso medio, interior membrana vtrinq; recentem plagam haberet, quod etiam in iis, qui fissuram labiorū (quod vitium haud absurdè *λαγώσομον* nuncupauerimus) habent, fieri solet, quando labia coniunguntur. Peritonæi enim vulnus, quod vetus esset, sutura, non coiret. Et hæc apud veteres frequēs erat curatio: iam verò rarissimè, aut omnino non in vsum adhibetur, adeò vt somnium esse videatur: licet hoc tempore quidam Florentius Vallee Aurelianus, & Borliuetus Montargisensis pluribus in locis, felici cum successu hac curatione vsi sint.

Spasmus in Peritonæi sectione non esse metuendum.

CAP. VI.

Nec etiam spasmus, vti obiici posset,

metuendus erit, licet Peritonæum sit substantiæ membranosæ, imò (si quis velit) aliquantum nervosæ & sensibilis: cum eiusmodi symptoma etiam tum non contingat, quando licet punctis vulneretur, multò minus si incidatur, id usu veniet, cum spasmi ex punctione orti, curatio, ut plurimum, sit incisio. Sed hoc clarius ex eo patet, quòd spasmus non superueniat, etiam in maxima Peritonæi dilaceratione, loco etiam longè periculosiore, quàm is sit, ubi sectio nostra Cæsarea instituitur: loco nimirum tali, qui nobis maximè commodus & exoptatus videtur. Verū periculum, quod ratione Spasmi impendat, (qualiscunq; demum spasmus sit) non facilè accidit, nisi dum aliquæ fibræ exquisitè nervosæ, quales Peritonæi fibræ non sunt, pari robore circa extremitates firmanantur, & naturali modo propter rem molestantem, ad suum principium contrahuntur, cum distensione violenta dolorem creante. Hoc in Peritonæo fieri non potest, propterea quòd finis extremitatum, qui est in anteriori parte (coniunguntur enim utræque extremitates circa lineam albam) multò laxior est, facilèque cedens ea in parte, quàm

quàm sit circa ipsius principium, ubi
vertebris lumborum firmiter cohæret:
quod singulari naturæ prouidentia fa-
ctum, quò extremitates, quæ in anterio-
ri parte sibi inuicem occurrunt, & con-
iunguntur, possint absque noxa liberè
vel contrahi, vel distendi: quod necessa-
riò requiritur in corpore tam salubri, q̃
ægro: ieiuno, quàm pleno ventre: tam in
crasso & ventrioso, quàm macilento: in
hydropico, quàm hectico: in mulieribus
tam vterogredientibus, quàm non graui-
dis: tam propter necessitatē ad recipien-
dum id, quod nos tumidos reddit, quàm
ad euitandum vacuum, quod facilè con-
sequeretur, ni ita fieret, maxime à Philo-
sophorum naturalium decretis absont.

*De Hernia, quæ post incisum Perito-
neum, remanere con-
suevit.*

CAP. VII.

QUòd si quis obiiciat (studio nobis
contradicendi ductus) malum val-
dè molestum metuendum esse, quod post
vulnus curatum remanere consuevit, Ru-
ptura nimirum, quæ propter Perito-



næum dissectum & malè consolidatum, relinquitur. Ad hoc respondeo, euitari posse Herniam, si Gastroraphia à veteribus vsurpata, ab ingeniosis & diligentibus Chirurgis in vsum reuocetur. Sed quamuis Hernia euitari non posset, tamen malum hoc præsertim mulieribus tolerabile est, modò ipsæ subligaculis, aut solis fasciis repellant, & retineant: aut latos cingulos ad id accommodatos, sub veste ferant, quod absque dolore, molestia, aut manifesta deformitate fieri potest: imò, quod maius est, magno cum mulieris commodo, si fortè contingeret eam grauidam redditā, rursus hac sectione, (quod aliquando contigit) opus habere. Hac enim ratione minus laboris sectori, minus item doloris mulieri, quæ aliter pârere non posset, contingeret. Sed dato eo, quòd Hernia hæc, aut molestiam pariat, aut impediât, aut aliquem dolorem creet, tamen magni boni loco haberi debet, quod propter tam exiguum malum, vnum, imò duo summa mala euitari possunt, quæ alia ratione vitari nō possent, nimirum tam Matris, quàm Foetus, miserabilis & præsentanea mors. Hæmorrhagia hoc loco metuen-
da

da non est, cū Peritonæum sit exsangue, neque manifestas, alicuiusue momenti habeat venas.

*De Vtero tertia parte que
inciditur.*

CAP. VIII.

QUod si quis hoc loco, vti prius factum, instantia tali vtatur: Vulnus ipsius Vteri necessario magnum esse debere, & p consequens periculosum, dum tanto corpori liberrimus datus fuerit transitus. Cum Galeno vt & prius respondeo, qui eò loci, vbi de Vteri sectione agit, statuīt Vterum post foetum exclusum collabi & contrahi, & quidem magis quàm abdomen ipsum contrahitur: dum enim foetus vnà cum secundina exclusus est, nihil amplius superest, quod impediat, quominus Vterus secundum omnes suas partes coarctetur. Hæc etiam sufficiens ratio est, ostendens Vteri incisionem, futura non indigere, cum ipsius latera, ita coniungantur, vt videatur secundum intentionem primam consolidari, à calore tamen naturali & humido radicali (quod etiam foetui impertiebatur) adiuta: dein etiam dum à partibus cir-

C

34 FRANE. ROVSSETI DE
cumiacentibus naturali modo suauiter
fouetur: & sanè melius adiuuatur, quàm
si artificiali calore foueretur, quemad-
modum alibi hac de re problematicè a-
cturi sumus.

*Vtero inciso, hæmorrhagiam non
esse magnam.*

C A P. IX.

SVperest vt dicamus, quemadmodum
prius factum est, de Vteri incisi hæ-
morrhagia, cum innumera & venæ & ar-
teriæ conspiciantur. Verùm primo loco
notandum, quod ex Chirurgorum rela-
tu habemus, parum sanguinis facta hac
incisione effluere, quorum sanè testimo-
nium à veritate & ratione alienum non
est. Colligi enim facilè potest, fœtum
iam adultum maximam sanguinis par-
tem pro nutritione absumpsisse: dein e-
tiam multum sanguinis mammas petiis-
se, quo in naturam lactis conuerteretur.
Idem enim sanguis est, ex quo lac gene-
ratur, & ex quo fœtus in vtero materno
nutritur, vtpotè ex menstruo sanguine
ortus: propter eandem rationem in nu-
tricibus plerumque (quo sanguis in lac
conuertatur) quemadmodum etiam in
gravidis

gravidis (propter alimentum Embryonis) menstrua non fluunt. Eandem etiam ob causam, natura voluit, solum in iis ætatibus, quæ aptæ ad Vterum gestandum, aut infantem alendum, menstrua fluere, iunioribus autem puellulis ante prædictum tempus fuere denegata: senioribus verò tempore concipiendi finito, fuere suppressa. Verum si quis instet, hoc licet dato, non tamen fieri posse, cum tot sint vasa, quin sanguis magna copia profluat. Ad hoc per hypothesein respondeo: etsi hoc contingat, nihilo minus hoc accidere & usu venire debere, etiam iis, quæ naturali modo sunt enixæ, aliàs in magnum periculum inciderent. At vnus idemque sanguis est, tam in vna quàm in altera muliere. Quare insignis hæc hæmorrhagia, non solum hoc loco periculosa non est, quemadmodum nec ibi, vbi scilicet naturaliter enixæ sunt, sed potius omne periculum demit, cum sanguis hic sit solum reliquum alimenti in Vtero pro nutritione fœtus reseruatæ, cuius postmodum vsus nullus est, sed potius Matri noxius, cum menstrui sanguinis naturam retineat, quæ natura consuevit singulis mensibus, ob metum ma-

li alicuius euacuare. Et licet demus, sanguinem hunc & laudabilem & utilem (imò ipsi Matri) esse: tamen hæc hæmorrhagia periculosa aut lethalis non est, ex sententia Celsi, qui in Vesicæ sectione inquit: *Si plus ex muliebri corpore sanguinis profluat, terreri non conuenit.* Et tamē sanguis is, de quo eo loci loquitur, qui è partibus sanis & mundis ipsius Vesicæ, (modò non sit exulcerata, vti sæpius non est) cuius collum incisum est, promanat, magis salubris & necessarius est, quàm sit ipsius Vteri sanguis, minus enim Vterus indiuiduo, quàm Vesica prodest. Nec etiam dicendum, quod propter adeò largam hæmorrhagiam Vterus lethaliter afficiatur: non enim sanguis is propter Vterum, sed propter fœtum iam extractum, vti dictum, à natura eò fuit demandatus. Huic rei testimonio esse potest, quod dū natura nihil sanguinis eò mittit, ante pubertatē, aut post ætatem consistentem (dum amplius concipere nequeunt) tum Vterus adeò coarctatur, & exsiccatur, vt in senibus (quemadmodum etiam in sacra Scriptura)

emortuus dicitur.

De

*De loco, in quo sanguis, secto Vtero,
colligi debet.*

CAP. X.

QUod si quis mihi obiiciat, sanguinem, qui ex Vtero secto promanat & impurus est, in capacitatem abdominis cum periculo intestinorum infundi & retineri. Duplex est responsio: prima quæ data fuit, dum de sanguine ex incisis Musculis abdominis, profluente dictum fuit: nimirum non posse in capacitatem abdominis illabi, quin statim expellatur. Altera responsio, quæ hoc loco magis necessaria est: quod commodior detur huic sanguini defluxus, per orificium & collum matricis, quod tum temporis partim à natura, partim verò manibus obstetricum satis dilatatum est, ut huius sanguinis euacuationi sufficiat: quod etiam iis, quæ naturali modo peperere, accidit. Hæc sanè colli Vteri dilatatio, magno usus est, non solum ad dicti sanguinis euacuationem, sed etiam quò (si opus sit) possimus in hoc vel alio partu, medicamenta vulnus Vteri consolidantia iniicere, prout indicationes id requirunt: quibus tamen medicamentis in

38 FRANC. ROUSSETI DE
prædictis sectionibus opus non fuit.

*Spasmm, licet Vterus incidatur, non
esse metuendum.*

C A P. X I.

CUM aliquando leuis Vteri noxa,
quæ ex humore vitiatò in eo colle-
cto prouenit, vel exigua inferiorum par-
tium læsio, (quemadmodum dolores iis
in partibus grauiore longè sunt, quàm
in altioribus interioribùsue) Spasmm
inducere & Symptomata graua causare
soleat, ita vt & partes nobiles, & etiam
totum corpus afficiatur: videri posset, ta-
lia & etiam grauiora mala, ex sectione
Vteri contingere debere, quando ita gra-
uiter interior & propria ipsius substan-
tia vulneratur. Verùm experientia, quæ
contrarium ostendit, & dolor vel nul-
lus, vel paruus, quem in hac sectione mu-
lieres patiuntur, diuersum nos docent.
Ostendit etiam nobis, partem hanc instru-
mentariam eo loci, aut nullo, aut exiguo
sensu præditam esse, & per consequens,
minus periculo obnoxiam: quam ratio-
nem vnà cum aliis, quæ disputationem
subtiliorem requirunt, tanquam Para-
doxum, (quod tamen verum) in præsens
relin-

relinquo, differens in alium, quem maior
rem faciam, de hac materia discursum,
ne in hac Epitome sim prolixior.

SECTIO III.

*Tertium genus Argumentorum ab auto-
ritatibus desumptum, ad sectio-
nis nostræ comproba-
tionem.*

CAP. I.



VA MVIS tertia hæc probandi
ratio, quæ autoritatibus in si-
mili, aut periculosiore opera-
tione absoluitur, à duobus a-
liis probandi modis dependere videat-
ur: nimirum ab eo, qui fit per Exempla
& per Rationes, ubi à simili ad simile,
aut à maiori ad minus argumentamur:
tamen hoc loco Autoritatibus, ut tertio
argumentorum genere, in similibus aut
gravioribus casibus utemur, cum quæ
eiusdem sunt naturæ, tam quoad propo-
situm finem, quàm quoad operationem
& qualitatem effectus, nobis desint. Sa-
pientissimi ergo Periandri consilium se-
qui volumus, ne quid noui adducere.

40 FRANC. ROVSSETI DE
mus, (licet rationes non deessent) quod
vel cum legibus Veterum, vel consuetu-
dine loci, vel cum insigni aliquo casu si-
mili, aut parū dissimili, non conueniat.

*De Musculis Epigastrii ex autori-
tate historica.*

C A P. II.

NE ab incepto ordine recedamus, à
Musculis Epigastrii ordiemur. Au-
toritatem verò Galeni, quæ 5. Loc. affect.
habetur, primum proponemus, quæ est
de magno atque profundo horum mu-
sculorum abscessu, quem cōtra aliorum
Medicorum opinionem Abscessum esse
pronunciauit: qui hac de re dubitârît,
eum locum consulat. Dominus Ambro-
sius Paræus, & alij (vt & ego) viderunt
Abscessum simili in loco miræ magnitu-
dinis, & summi periculi, ex sententiâ præ-
stantissimorum tam Medicorum, quàm
Chirurgorum Galliæ, qui eò erant voca-
ti. Fuerunt autem D. D. Hollerius, Gor-
ræus, Duretus, Budæus Aurelianus, An-
tonius Franciscus Stampensis, Flexel-
lius Medici. Chirurghi verò Neumusa-
nus, Paræus, Gerardus Brunus, Trambor,
præsen-

præsentēs. In consilium etiā adhibiti
 fuere, licet absentes, D. D. Mocellus, Fer-
 nelius, Rassiū senior, & alij. Abscessus
 hic, ortū ducebat iuxta principium Mus-
 culi recti, & quidem lateris dextri, supra
 umbilicum digitis tribus, loco fundi
 ventriculi vicino, & iuxta Hepatis re-
 gionem, quem locum profundum & ob-
 materiam crassam ibi contentam, valde
 distentum, præter alia signa, satis dolor
 ostendebat, qui eo loci augebatur, dum
 venter extenderetur, & pectus dilataretur,
 quando Musculus oblæsus ad actiones
 has peragendas extendebatur: ma-
 lum hoc instar alicuius inflammationis
 œdematosæ, post multos diuersos &
 chronicos sibi inuicem succedentes mor-
 bos ortum est, qui tandem morbi post-
 quam natura tam copiosos humores he-
 terogeneos symptomaticè in locum nō
 naturalem reposuisset, desinere. Et hæc in
 illustri Ludoica Humierea, Antracis do-
 mina ad Malherbm syluam, visa fuere.
 Abscessu hoc aperto (cū tandē ad eam
 maturitatem, quæ sperari poterat, perue-
 nisset) incredibilis & tanta puris copia
 summo cum impetu prodiit, vt vsque
 ad pedes lecti proflueret, & quidem vl-

Loyse de Humieres dame d'Entragues, au boys Malherbm.

42 FRANC. ROVSSETI DE
trà sesquimensis spaciū copiosissimè ef-
fluxit, per vulnus amplum, cauterio a-
ctuali inflictum, quod semidigiti cras-
sum, duorum verò latum erat, & ultra
tres digitos in altum descendebat, ante-
quàm ad locum, in quo tanta puris col-
lectio fœtoris intolerabilis contineba-
tur, perueniretur, ita vt solùm Perito-
næum vulnerandum restaret: vt hac ra-
tione materia, quæ longo tempore co-
piosè inter ipsum Peritonæum, & penè
omnes Abdominis Musculos profusa
erat, facilè in abdominis capacitatē in-
ter intestina defluxisset, quod ex profun-
ditate aperti abscessus, turundis, specil-
lis & canulis, quæ indebantur, facilè co-
gnosci potuit. Malum certè hoc deterius
multò erat (quoad Musculos Epigastrij)
quàm hæc nostra sectio, à quo tamē, laus
Deo, intra paucos dies fuit liberata, & sa-
nitati restituta. Tantorum virorū, quo-
rum aliqui adhuc superstites viuunt, au-
toritas & testimonium, veterū etiā præ-
cipuis testimoniis æquiparari possunt.

De Peritonæi sectione autoritates.

C A P. III.

Q Voad Peritonæi sectionem, Hydro-
picorum

picorum paracenthesin perpendendam propono, à veteribus summè vsitatam, & ab Hippocrate adeò celebratam, qua in sectione periculum si aliquod contingat, id non ratione Peritonæi, sed propter subitam & largam aquæ profusionem accidit, vti docet Hippoc. 6. Aphorismo 27 Accedit etiam huic malo vitiosa, vti plurimū, Hepatis diathesis, quæ remedio huic præstantissimo succellum adimit. Verūm hoc tempore rarius Paracenthesi vtimur, propterea quòd plerique moriantur. Hoc autem idcirco accidit, quòd si ea fortè aliquando vtantur, ferius id fit, cū iam malum altiores egit radices, & diutius occupati fuere (vt consuetudo & ars requirunt) in exhibitione leuiorum medicamentorum. Tum falsò malum non in causam morbi, sed in remedium ex quo auxilium sperabatur, refertur, vti à plebeis, rudibus & ingratiss fieri consuevit. Nihilominus tamen Hydropicorum aliqui, ob metum Paracentheseos moriuntur, qui tamen hoc remedio fuissent aliquando curati: potissimū verò ij, in quibus Hydrops fit, vti sæpe ex corruatione & collectione aliquius Vomicæ, aut Apostematis interni

accidit: quod ubi rumpitur, amandat, prout potest, copiosam hanc materiam in capacitatem abdominis, unde non potest, nisi per huiusmodi puncturam Paracentheseos scilicet remeare, præcipuè si sanies sit crassior: cuius Symptomatis causa difficilimè, ne quidem ab iis, qui vel maximè acutum cernunt, agnosci potest. Facile tamen absque magno periculo occurri posset, si mali origo nosceretur, & Peritonæi punctio post abdominis Musculos commodè esset administrata, id quod sæpius fortuitus euentus potius, quàm solers sectionis administratio testatum reddit. Memoria enim adhuc recolo, quod dum Aureliæ in Scholis triuialibus essem, viderim crassum quendam baiulum (nomine *va, si tu peux*: id est, eas, si tu possis) hydropicum, iam pridem pro desperato derelictum, cui

à S. Aignan.

cum iuxta Sancti Agnani fanum, nebulo quidam magno ictu cultri Abdomen perforasset, & subito copiosissima aqua putrida, riuuli instar fuisset effusa, postmodum curatus, statim, vt prius, absque tamen recidiua operari cœpit.

Addo præterea vñtionem Peritonæi, per ipsos Musculos: aliter enim fieri nō posset,

posset, quæ ferro ignito loco valde periculoso fieri solet, in antiqua Hepaticorū suppuratorū vstione. Ex qua vstione si aliqui moriebantur (quod sæpius accidisse credibile, propter præstantiam partis adeò læsæ, propter quod etiā non facile amplius hoc remedio vtitur) id nō propter peritonæi læsionem, sed propter Hepar corruptum fiebat, idque quando purulenta materia fæcibus vini similis erat: alij verò conualescebant, vt Hippocrates 7. Aphor. 45. testatur.

Præter iam dicta, datur & aliud exemplum: peritonæi nimirum magna illa sectio, ab antiquis vsurpata, & nuper renouata: in præsens verò ob Chirurgorum ignorantiam rara (quod multis exitio est) nimirum dum in Hernia intestinali, intestinū aliquod quasi captiuum continetur, ita vt etiā Voluulo laborent, & morti proximi sint, nisi cum subita dilatactione rupti peritonæi secantur. Qua sectione non ita pridem supradicti Valles pater & filius & Martinellus Montargisensis, Borliuet dictus, *Montargis* piæ memoriæ, vsi sunt. Qua ratione etiam Blæsis quidam ex amicis D. Alexij *à Blois*. Gaudini, felicitis memoriæ (in sua præsen

tia, vt mihi attestatus est) per Maupas celebrem Chirurgum sectus fuit, postquā vnanimi consensu aliis auxiliis deficientibus, hoc inter ipsos esset conclusum. Tali enim necessitate fit, vt docti, industrij & prudentes, eiusmodi difficilia & graua auxilia inueniant, benedictione diuina, in tanto charitatis opere adiuti. Plura adhuc similia mala sunt, quibus hæ duæ Abdominis partes absque magno periculo afficiuntur; altera quidem pars carnosæ, nimirum Musculi: altera membranosa, Peritonæum puta. De quibus partim in peculiari tractatu acturi sumus: de aliquibus verò ob similitudinem aliquam, quam cum vtero habent, in tractatu hoc dicemus.

De Vteri sectione autoritates.

C A P. IV.

SVperest nunc, vt perpendamus, an similia, aut maiora dentur mala, quibus vterus absque vitæ periculo afficiatur, idque testimoniis (si modò haberi possint) comprobemus. Antequam verò vterum sectum cum vtero alias oblatso conferamus, comparisonem inter vterum sectum & vesicam, quæ in calculi
extra-

PART. CAES. SECT. III. 47

extractione secatur, tanquam partem vicinam instituemus: quæ sanè sectio multis de causis longè periculosior, quàm sit hæc nostra sectio Cæsarea, censenda esset.

Vteri incisi, cum calculosi Vesica incisa comparatio.

CAP. V.

VTeri actio, ut de hoc primo loco verba faciamus, non ad indiuidui, sed speciei conseruationem necessaria est, idque non in omni, sed in certa solùm ætate constitutis. Vesicæ verò vsus adeò magnus est, ut ne quidem horæ momentum oriri possit. Plus ergo mali, læsam vesicam quàm vterum consequitur: nihilominus tamen ipsos sæpius non mori videmus. Ex quo colligere est, quod multò minus ob vterum sectum, mulier moritura sit.

Epigastrio quinetiam in sectione Cæsarea sufficienter inciso, & dilatato, licet videre, tractare, quin etiam incidere vterum in quacunque placuerit parte, cum ad foetum inueniendum, tum commodè extrahendum, & absque matris periculo. Hoc verò in vsitata vesicæ in perinæo

sectione, fieri non potest, vbi solùm pal-
 pando progredi licet, siue in ea inciden-
 da, siue in calculo, (siue is vnus, siue plu-
 res sint) inueniendo, & quod maius, in
 eo extrahendo: ita vt sæpius etiam exer-
 citatissimi Lithotomi fuerint coacti ab
 incepto opere, re infecta desistere, aut cer-
 tè vesicam arripere, dilacerare, & instru-
 mentis portionem eius cum calculo au-
 ferre. Postmodũ rei huius ignaris, mem-
 branam esse, qua peculiariter calculus
 fuerit inuolutus, qua mediante vesicæ
 adhæserit, ostendunt. Verũ difficile
 admodum est huic opinioni, quidquid
 hac de re à quibusdam vel dicatur, vel
 scribatur, idque grauibus de causis, fi-
 dem adhibere. Si enim Calculus, mem-
 brana velut peculiari inuolucro esset
 obuolutus, tum nec dolorem, nec mole-
 stiam, nec vrinæ aliquā suppressionem,
 quod alicuius esset momenti, parere de-
 beret. Quare ergo, tanto periculo sectio-
 nis, præter necessitatem temerariè quis
 se subiecerit? cùm tamẽ nemo facilè tan-
 to periculo, nisi sanitatis causa coactus,
 se submittat. Tunica enim hæc, quæ i-
 psam inuolueret, cùm sit insensibilis, le-
 uis, & vinctuosa, impediret ne sua asperi-
 tate

tate calculus vesicam attereret, qui vlcus
vesicę eò loci vbi residet, caufaret; & si vl
cus non esset, nec etiam pus promanaret,
ratione cuius mordicatio in partibus vi
cinis contingeret. Quòd si quis obiiciat,
dato eo, quod ita res se habeat, quoad vl
cus & dolorem vlcerosum, nihilominus
tamen dolor grauans adesset, propter cal
culi magnitudinem: & etiam dolor ten
sius, qui propter ipsius magnitudinem
obturando contingit. Sed quæro ego,
quomodo, & ex qua materia calculus
ita augeri potuit, cùm membranæ fuerit
inuolutus. Si enim calculo adhuc par
uo existente, membrana hæc nata est, de
buit postmodum impedire, ne visciditas
illa vrinæ calculum attingeret, néve
ei agglutinetur, quæ vnica ipsius adau
ctionis materialis causa est, quemadmo
dum & generationis causa fuit. Si quis
respondeat, membranam hanc, magno
existente calculo, natam: quæro vbinam
ex semet principium sumpserit. Non di
cetur, ex parte superiore calculi, aut ex
ipso natam esse, necessum ergo, vt ex ali
qua vesicæ parte orta sit. Quòd si ita
sit, quomodo quæso adeò parua & cre
scens adhuc, potuisset Calculum iam ma

D

gnum inuoluere, aut ipsi se adiungere, qui semper in vesica humida vagatur, & de loco in locum mouetur? Adeo hoc absurdum est, vt refutationem non mereatur. Licet enim in aliis aliquibus corporis partibus, præter naturæ modum aliquando Calculi oriantur, non tamen eadem est ratio ob innumeras, quæ adduci possunt causas, quas huic loco inferre lex vetat Epitomes, cū alibi id commodius tractari possit. Verum concessio, rem ita se habere, videtur tamen debuisse tunicæ huius ortum hoc boni attulisse, vt auferendo attritionem, exulcerationem & dolorem, necessitatem etiam sectionis adimeret, quod tamen non fit: multi enim coacti, magno cum vitæ periculo sectioni se subiiciunt. Ne tamen cum aliquo, qui ex præiudicio iis, qui hoc tradidêre, assentitur, aut qui velit huic errori sub specie sententiæ receptæ, amico alicui vt gratificetur, patrocinari, in disceptationem veniam, huic sententiæ, quoad fieri poterit, vt & alij fidem adhibebo, donec melius & rectius huius rei veritas explicetur.

Tertiò, vt ad collationem nostram redeamus, in Perinæo plures insignes ve-
næ

næ, arteriæ, fibræ, musculi, nervi, sphincter, vasa spermatica vicina, tendines & ligamenta occurrunt, quæ in quærendo, incidendo, dilatando, aut potius crudeliter ipsam vesicam in perinæo plurimis noxiis instrumentis dilacerando facile, & quidem nō sine periculo offendi possent. Horum autem nihil, dum vterum incidimus, in Epigastrio occurrit, & propterea minus periculosa, quàm sit vesicæ sectio, quæ tamen non semper lethalis.

Quarto, vesica, quæ inciditur, ut plurimum valde exulcerata est: econtrà verò vterus dum secatur, sanus est, quoad seipsum, & consequenter minus periculi eo læso impendit, & facilius curatur.

Quintò, cum fieri non possit, quin in utraque sectione hæmorrhagia fiat, ex enarratis rationibus patet, sanguinē, qui ex secto vtero promanat, impurum, superfluum esse, & si retineretur, noxium futurum: non verò periculosum si effluat. Econtrà verò sanguis is, qui ex vesica calculosi incisa promanat, naturalis est, purus, utilis, si retineatur: noxius verò, si effundatur, et si sectorum aliqui contalescant. Quare ratione huius etiam facilius & melius sectio nostra Cæsarea

administrari poterit. Sexto & postremo, ex sectione vesicæ, ut plurimum infinita symptomata, quæ evitari non possunt, remanent, quæ eam formidabilem reddunt. Et inter cætera, perpetuum per vulnus urine stillicidium incurabile remanet, cum vulnus ut plurimum coalescere non possit, quod præter dolores summos, & foetores maximos molestum valde symptoma est: eius enim causa aliquem hominum societate & conuersatione priuatum esse oportet, neque potest, seu pedes, seu eques, seu decumbens, seu sedens, aut stans, negotiis suis præesse: sed quod maximum, sæpius mors subsequitur.

Viceversa in sectione Cæsarea, nihil horum accidit, nec etiam quid simile superuenit, sed solum ruptura, quæ tolerabilis, & quæ facile perferri potest, ut plerunque & aliæ rupturæ. Sed & ruptura hæc evitari poterit, si modò recta Gastrographia adhibita fuerit, quod tamen necessum non est. Sæpius enim ruptura ut remaneat, ob futurum partum, perutile est, uti superius à nobis fuit propositum. Hæc omnia licet sint cognita, videmus tamen propter consuetudinem hanc vesicæ

hæc sectionem adeò difficilem, cum dolore & periculo coniunctam expeti, licet longo tempore euitari possit, imò sæpius omnino non admitti: quod tamen sine magni doloris perpessione fieret, (de omnibus tamen non loquor) aut saltem absque vitæ periculo. Reperiuntur enim, qui per annos quadraginta calculum gestarunt, qui tamē mortui nō sunt: ita ut ij, qui hoc quærunt remedium, similes sint iis, qui vltro se supplicio & morti subiiciunt. Quare ergo sectio hæc vteri, quæ vesicæ sectione longè tutior, facilior, vtilior, magisque necessaria & vrgens est, (adeò ut nisi citò occurratur, metus sit ne miserè eadēque hora, mater vnā cum foetu pereant) non inquiritur, recipitur, & exoptatur, cum adeò sit vtilis & necessaria?

*Discursus de extractione Calculi
per Hypogastrium.*

CAP. VI.

SI Cæsaream sectionem, quæ in Epigastrio fit, tanta ipsius aut facilitas, aut vtilitas, nobis eam commendare debet: certè longè magis difficilia & ine-

uitabilia Symptomata, quæ ex sectione Calculi superuenire solent, nos à sectione vesicæ, quæ in perinæo fit, absterrere debent. Aut certè, vt quid melius in humanum genus conferamus, nobis hæc res stimulum addere debet, vt modum aliquẽ meliorem & commodiorem, ad extractionem calculi inueniamus: qualis erit, si non in perinæo amplius, sed in Epigastrio, sectio (vt in sectione Cæsarea) fiat. Quod tum facilè à quolibet vero Chirurgo præstari poterit, cum prius ipsi ab Hippocrate, & quidem in iuramento foret interdictum, cum more antiquitus recepto, tantòque vtì ostensum periculo, in perinæo solùm sectio fieret. Hac ratione innumeris modis melius, doctissimorũ simul & exercitatissimorum Chirurgorum opera ægrotis succurretur: quod hætenus à paucis solùm circumforaneis impudentissimis, temerariis & ignaris factitatum fuit, qui (excipe bonos & doctos) monopolio inhumano crudeliter & corpus & crumenā, tam diuultum quàm pauperum hætenus tractarunt, & adhuc exercent, dum ipsorum opera vtì oportet, quocunque ab ipsis expetito præmio, numeratāq; prius pecunia.

pecunia. Quod eorum negligentia fit, qui melius quā ab his indoctis fiat, hoc præstare possent, & deberent: de aliis non loquor. Verū noua hæc sectionis permutatio, quam propono, non absq; plurimis rationibus fieret, & ad exemplum nostrorum antecessorum neoteriorum: cū antiquorum sectio, quæ Celsica nominari potest, iam permutata sit in Marianam. Celsus enim non ante nonum annum, neq; post decimumquartum sectionem admittit: Mariana verò sectio, beneficio nouorum instrumentorum, omnes ætates admittit. Sunt tamen aliqui, qui certis rationibus freti hanc Celsi sententiam adeò angustis terminis inclusam, hoc pacto interpretentur: impossibile esse, vt in adeò tenella ætate in anum infantis, ipsius lithotomi duo digiti absque noxa indi possint, ad calculum ad perinæum adducendum. Post annum verò decimumquartum, quum iam calculosi magni & pingues redditi sint, digiti ipsius lithotomi ad calculum perungere non possunt, vt eum adducant, dirigant, & firmiter in perinæo retineant, ad sectionem supra calculum faciendam. Quæ Celsi operatio vulgariter Guido-



niana vocatur: quoniam instrumentis à Guidone propositis perficitur, cui aliæ etiam ætates cum sint suspectæ, ad annum etiam decimumquartum solùm sectionem concedit, secutus auctoritatem Brunonis, cui (quemadmodum huius artis circumforaneis) in totū fudit, quemadmodum & Hippocrates suo tempore fecit. Attamen fieri non potest, ut tempore Guidonis, more Celsi, nō in omnibus ætatibus sectionem usurpārint, cum non solū patrū memoria, sed etiam nostro æuo, infinitis in locis, tam in senibus, q̄ iuuenibus usurpetur, idque non minori successu, in villis & pagis, quā in magnis urbibus Mariana sectio, administratur. Hinc factum, ut aliquando eius fuerim sententiæ, primos characteres numerorum duarum ætatum à Celso expressarum in exemplaribus ex primo autographo transcriptis, fuisse mutatos: cuius æquè facilis fuit Typographis lapsus, ac facilè ab ipsis lectoribus perpessum. Dum enim Medici & Chirurgi docti, locum hunc Celsi legerent, sicco pede transierunt, tanquam sectionem hanc non curantes, cum ipsorum non esset ex concessione, aut potius defensione Hippocratis,

pocratis, hanc tractare. Sed quod maius est, is qui viginti, triginta aut quadraginta assecutus est annos, minus pinguis est, quàm is, qui quatuordecim solum est annorum, & per consequens facilius calculus in perinæo per anum retineri potest. Verum si ita res se habeat, siue contrà, certum tamè hoc est, quod quocunque modo sectio adhibeatur, quemadmodum infantes valdè iuuenes propter teneram ætatem & mollitiem, absque magno periculo, sectionem hanc vesicæ perferre non possunt: sic etiam nec ij, qui senio iam sunt confecti, propter virium imbecillitatem sustinere queunt. Et hæ sunt meo iudicio duæ rationes, quæ Celsum mouère, vt tempus sectioni commodum limitaret. Hoc posito, scribendum erat, ab anno nono aut decimo, vsque ad annum quinquagesimum, aut sexagesimū: idem iudicium esse debet de Mariana & aliis, quæ inueniri possunt, sectionibus. Quàm enim facilis & communis sit error, in substitutione numerorum, ex varietate dosium, quæ obseruantur, tam in celeberrimis veterum Antidotis, quàm in ipsa Theriaca adeò celebri & vsitata, colligere licet. Verum vtcunque res se ha

beat, ex his manifestum fit, quantum periculi sit in hac operatione, idque omnino, vel saltem ex parte, propter partem, quæ inciditur. Hinc factum, ut minoris periculi gratia, & quò maior posset sectio fieri, faciliusque multò iis, qui in prædicta ætate sunt constituti, succurratur, sectio Mariana fuerit inuenta: quæ tamen non minus periculosa, quàm Celsi, imò sæpius periculosior, idque ob difficultatem inueniendi lapides in vesicam secta, lacerata, & dilatata. Qui secandi modus, omnium maximè ad Celsi aut Guidonis sectionem accedere censetur, in qua etiam metus non est, vesicam cum calculo arripiendi, quod in altera metuendum.

Exempla historica ad comprobationem nouæ huius sectionis vesicalis facientia.

CAP. VII.

CUM iam pridem summa cum diligentia perpendissem, id quod hoc loco proponitur, antequàm ea de re quidquam vel audiuissem, vel legissem: de nouò mihi visum fuit, fore consultum, si res apprimè utilis, adeoque nunc, quàm fuerit

fuerit vnquam necessaria, proopnere-
tur. Præsertim verò cum huius operatio-
nis feliciter peractæ exempla occurrant,
vbi prius varia & diuersa remedia fru-
strà adhibita forent. Verùm modus hic
extrahendi calculum primò vsurpatus
fuit, salute iam ægri desperata, partim te-
meritate quadam, partim verò artificio,
à Francone, qui inter Chirurgos præstan-
tissimos nostri temporis habetur, idque
in puerulo, parētis precibus (qui id sum-
mè efflagitabat, vt ipsemet scribit) vi-
ctus; ne tamen quis posthac hac sectione
vtatur (quod valde miro) prohibet. Me-
tuens fortè ne collegas offenderet, nè ve
temerarius postmodum censeretur. si for-
tè secto puero, in sectione hac adeò noua
& inusitata ob hanc, vel aliam aliquam
causam, malum aliquod accidisset.

Huc etiā referri potest historia ipsius
immunis sagittarij Modunensis calculo-
si, quæ à Monstreleto descripta, cum iam *Fræc-archer*
morti adiudicatus esset, concedente ta-
men Magistratu, ob instantem petitio-
nem Medicorum Lutetianorum, venter
apertus fuit, quò lapis perquireretur, &
locus lapidis obseruaretur: repositis
dein intestinis, vulnus confutum fuit: i-

de Meudon

pse verò sanitatem pristinā adeptus est: sententia etiam, qua mortī erat adiudicatus, remissa, propter dolores, inuitē tū ab ipso perpeffos. Dominus Paræus, (qui tanquam monstrum quoddam lib. 24. cap. 16. historiam hanc citat) duo in Chirurgia apprimè notatu digna, quod tamen facile ab ipso præstari potuisset, non exponit. Primum est, Calculûsne in ipso Rene, aut in Vesica ab ipsis quæsitus fuerit. Alterum, quo in loco exteriori sectio hæc cœpta fuerit: an videlicet in lumbis, aut alia in parte ipsius Epigastrij versus ilia.

Quò ad primum, verisimilius est in Rene potius quàm in Vesica quæsitum fuisse: idque non solùm idcirco quòd mentio fiat doloris nephritici, & lateris, (quæ non ratione calculi in vesica contenti, sed calculi renalis accidūt) ab ipso perpeffi: verùm etiam, cū hæc perquisitio ideo fuerit instituta, vt rei alicuius nouæ, notatu dignæ, anteaque non visæ, fieret experientia: vt est inuestigatio calculi in Renibus hominis viuētis, & eiusdem non consuetæ sectionis curatio. Vesicæ enim calculum à tantis viris nō fuisse quæsitum facile credi potest, vt qui
de

de loco & curatione talis calculi nō ambigerent, præsertim cū iam pridem sectio Celsiana & Guidoniana foret vsitata, in qua in viuentibus perinæum inciditur, & in mortuorū calculosorum vesicis calculos reperire consuetum sit.

Quò ad alterum, coniectari licet, sectionem hanc externam nō per lumbos, sed per alium locum factum esse, cū multa sint, quæ sectionem per lumbos impedire possint. Primum quidem loci crassities, vbi cum magno periculo plurimi musculi, tam interiores quàm exteriores, iuxta ipsorum principium inciderentur. Dein etiam non solum vertebræ spinæ, & ipsarum apophyses proximè adiacentes, sed etiam vena caua & arteria Aorta, cum manifestis ipsarum Ramis: Mesenterium item & pancreas tali sectioni impedimēto esse potuere. Quare vt ad latus ipsius Abdominis sectio hæc facta sit, oportet, eo nimirum loci, quem Græci *νεφῶνα*, Latini Ilia vocant, inter lumbos & locum eum, vbi Cæsarea fit sectio, altiori paulò loco, quàm is sit, per quē in Epigastrio, vtī proposuimus, calculus vesicæ extrahi debet. Quod exinde satis colligere licet, cū dictum

fit, intestina fuisse reposita, & vulnus confutum, quod in lumbis in regione Renis affecti fieri non potuisset.

Sed ut de sectione Renis agamus, et si demus, nunquam hanc sectionem attendendam esse, attamen probabiliter de ea rationibus Medicis & analogicè disputare licet, posse eam malo urgente, absq; tamen mortis necessitate, perfici. Verùm (præter obiectiones, quæ circa hæmorrhagiam renis incisi fieri possent, & circa periculosa puris, quod in Abdomen illabi posset retentionem, iam solutas) alia instantia uti licet, propter periculum quod immineret duabus partibus hac sectione læsis, Iliis puta sectis, & Rene vulnerato. Quò ad Iliā, ex prædictis rationibus liquet, eorum sectionem nō esse necessario lethalem. Præter allatas rationes analogicè adhuc argumentari licet, quòd aliquando in parte æquè periculosa, imò periculosiore quàm sint Iliā sæpius fiat, & quidem beneficio naturæ, amplum satis vulnus pro lapidis exitu non solum calculi vesicæ, (quod in perinæo fit) aut calculi in vtrete contenti (quod per hypogastrium iuxta inguina fit) sed etiam Renalis (quod casu per lumbos

bos fit) quæ tamen omnia absque morte
 patientis contingunt. Quæ singula osten-
 dunt, idem quoq; circa Ilia (loco ad cal-
 culi renalis extractionem commodiori)
 maiori securitate fieri posse. Res enim
 hæc dubio caret, non solum ob id, quod
 plures hac de re scripserint, & inter cæ-
 teros D. Dalechampius; sed id etiam plu-
 rimorum Medicorum & Chirurgorum
 fide dignorum testimoniis patet, visos
 esse in nephriticis per lumbos (loco val-
 de incommodo) magnos calculos è Re-
 nibus reiectos per Apostema iis in locis
 periculosissimis genitum, quod aliquan-
 do à Chirurgis apertum; aliquando be-
 neficio naturæ, eo loci ruptum. Qua in re
 necessum fuit, ut vnà cum Rene plurimæ
 partes, tam externæ quàm internæ cor-
 poris grauitè fuerint oblæsæ, quæ æ-
 què, imò multò magis periculo subiectæ
 sunt, quàm ipsa Ilia, imò quàm ipsum E-
 pigastrium. Quare nō adeò metuendum
 Epigastrium incidere, non solum in ex-
 trahendo fœtu sectione Cæsarea, quàm
 sectione calculi vesicæ eo modo quem
 in Hypogastrio proposuimus. Sed & in
 aliis periculosis Epigastrij partibus non
 minus periculosa superueniunt sympto-

*pays d' Auge
en Norman
die.*

mata, quæ tamen lethalia non sunt. Tale est id quod accidit Anno 1557. in pago Han cognominato, in Algia Normadiæ, vbi quidam Carolus Trahardi nomine, à longo tempore nephriticus, cuius dolores cum relicto loco consueto anteriora petiissent, regionem nimirum vretorum: tanquam dolore Colico laborans, frequētibus clysmatibus tractatus, quorum aliquot ob malī vehementiam euomit, tandē inter Inguina & Ilia tumor insignis obseruatus, quem Iacobus Dux Chirurgus exercitatissimus aperuit, vnde lapidem fabæ magnitudine vnâ cum pure vrinæ permixto extraxit. Ex situ anteriora versus vergente, facilè fuit colligere, non ex Rene, vt qui in posteriore parte est, calculum prodīisse: quare oportet (siquidem vrina per locum semper distillaret) fuisse ex vretere circa eum locum, vbi vesicæ iungitur: non enim verisimile fuisse calculum vesicæ, partim eum alio in loco sedem habeat (in medio nimirum Hypogastrij) partim quod vrina, quæ per alterum vreterem in vesicam deferebatur, per membrum virile, pro voluntate ægri reddebatur: nihilominus tamen per locum etiam incisum semper

semper vrina minge batur: quare ad eam excipiendā Chirurgus (vt artis est) spon-
 giam ipsi præparauit. Excepto perpetuo
 vrinæ stillicidio aliâs bene valens, ad-
 huc per annos quatuor vixit, tandem ve-
 rò Angina periit. Simile etiam à D. Bel-
 langerio Medico Regio, Lutetiæ in ho-
 spita ad canistrum, iuxta templum San-
 cti Pauli visum, quæ & calculum simi-
 lem, & per simile apostema pari in loco
 ortum, reiecit: paribus quinetiam sym-
 ptomatibus relictis, ita vt vrinâ per an-
 nos viginti & plures per vulnus reddi-
 derit. Quò ad Renem (alterâ partē, quæ
 absque magno periculo secari non posse
 censetur) videtur, saluo tamē meliori iu-
 dicio, vulnus non necessariò esse lethā-
 le: siue spectemus actionē & vsum pro-
 prium (modò alter Ren sanus & integer
 sit, suòque satisfaciat officio) siue specte-
 mus ipsius substantiam, cum per se satis
 sit oblæsus, imò sæpius maxima ex par-
 te putridus, & per consequens ex parte,
 vel ex toto inutilis: ita vt à bono & exer-
 citatissimo Anatomico, qui solerti sit
 manu, & in similibus casibus exercita-
 tus, possit facilè & cum honore hæc se-
 ctiō administrari, sed in corpore robu-

E

busto, & cum iudicio solùm disseccans
 eum locum, vbi calculum persentit, ca-
 uendo, quoad fieri potest, ne vel inser-
 tionem venæ emulgētis, vel vreteris exi-
 tum lædat: postmodum verò consolida-
 tionem naturę committens, quod à na-
 tura præstari id possit, præter rationem
 non est. Illustrissima Ducissa Ferrarien-
 sis felicitis memoriæ, cùm doloribus ne-
 phriticis per certa interualla esset obno-
 xia, grauissimo item sanguinis & vrina-
 rum purulentarum mictu, exercitij loco
 deambulationibus utebatur: à quo exer-
 citio cùm abstinuisset, & quieti corpus
 dedisset, curationem malo contrariam
 quarens, & sic aliquando leuibus qui-
 busdam mediis contra calculum vsa es-
 set, tandem hæ excretiones desiñere. Qua-
 re cùm alio morbo interiisset, corpûsque
 ipsius fuisset apertum, in rene ipsius par-
 uus calculus repertus fuit, circa quem ci-
 catrix pulchra, sana & munda, dimidiij
 digiti longitudine erat, quod fidem fa-
 ciebat, cùm tam excretiones, quę per vri-
 nas fiebant, cessassent, quàm quòd con-
 sueti dolores nephritici remississent, cal-
 culum hunc multò maiorem fuisse, qui
 etiam vlcus causasset, ex quo prius san-
 guis,

guis, dein & pus emanârît, quod cicatrice erat consolidatum: quod etiam Hepati, pulmonibus, aliisque partibus principibus accidit. Sed cur quæso simplex incisio corporis renalis tuto fieri non posset, diligenti ad calculum extrahendum adhibito artificio, quandoquidem ipso valdè saucio, purulento, & ferè ex toto putrido existente, beneficio tamen naturæ, hos calculos per maiorem continui solutionem, quàm simplex hæc sit incisio, eiici videmus, & quidem tantum interioris substantiæ suæ deperditione, ut sæpe sola ipsius membrana integra remaneat, quæ magnum aut plures mediocres calculos, instar pecuniæ in crumena sonum edentes, continet. Quandoquidem ergo ex rene adeò affecto, aliquando calculus per lumbos exitum quærat, (vti superius dictum) quemadmodum etiam in aliquibus, is qui in vterere continetur, per latus Hypogastrii & vesicæ, similiter calculus per perinæum: quare non commodior aliqua via quæritur, malo huic adeò desperato succurrendi. Per hæc & similia loca diuersa, fit in aliquibus calculorum expulsio: sed longè sæpius vesicæ calculus per perinæum ex-

pellitur, propter locū magis decliuem, quò omne corpus graue natura sua tendit. Et hæc, meo quidem iudicio, potior est causa, quàm sit vlla alia, quæ primos lithotomos & ad ipsorum exemplum, eorum sequaces adegit, vt calculum in vesica contentum per perinæum potius, quàm per hypogastrium extraheret: hac ratione se motum naturæ imitari, quod ipsius artis est, sibi imaginantes: quamuis (verum modò si dicere velimus) hic naturæ motus symptomaticus potius sit, & via huic malo non conueniens, quàm quod per legitimā vesicæ excretionem fiat, quæ naturaliter per perinæum nil euacuat. Verūm incredibilia hæc censerī non debent ab eo, qui non vidit, nec legit vnquam, per lumbos apostemate affectos, calculum renalem egredi posse, quemadmodum is, qui in vretre confitit, per imam partē Iliorum, vti dictum: siquidem Ren, licet calculosus non sit, sed solūm vlceratus, & ipsi detur via per vreterem naturaliter se euacuandi: materiam tamen purulentam in eo contentam, sæpius p lumbos excernit. Id quod post diuturnos dolores nephriticos & vrinas purulentas sæpius vsu venire solet,

PART. CAES. SECT. III. 69

Iet, quæ etiam iis in locis fistulas incurabiles, sed tamē tolerabiles, imò ad cuiandum maius malum, exoptatas causant: quod duobus in ægris, inter cæteros q̄ diligentissimè animaduerti. Castellione *à Chastillon sur Loin.* enim ad Lænum, mulieri cuidam corpori lentæ, post diuturnos dolores nephriticos, circa exteriorē regionem renum, abscessus magnus ortus, qui à Magistro Gerardo Chirurgo Regis Henrici me præsentē, cauterio actuali fuit apertus, vnde pus solum absq; calculo effluxit: ipsam verò fistulam cannula argentea concaua, & candela quinque aut sex digitorū longa, per annos vigintisex & plures, apertam reseruauit: hac ratione, ab vrinarum purulentarum excretionē, & renum dolore liberata: quæ duo symptomata, quando emissarium hoc occludi volebat, statim recurrebant. Similis morbus cū in Abscessum esset versus, meoq; consilio apertus, simulq; diu apertus reseruatus, iuuenem quendam Paillet nomine, viginti aut viginti vnus annorum Guignouillæ Belsi *à Guignonville en Beauce.* à talibus nephriticis doloribus & vrinis antea valdè purulētis, liberauit, ita vt postmodum bene valuerit, vsq; dum vxorem ducturus esset, tum

subitanea morte periit, cū tempore mensis ex curru mergitibus onusto delapsus esset. Quare vt tandem huic proposito finem imponamus, vnum propter rationes allatas explicandum superest, quod nimirum in immuni illo sagittario, calculus non per lumbos, sed per Ilia aperta, & quidem in ipso rene affecto, non autem in vesica fuerit perquisitus: quod nihilominus tamē pro tuenda sententia nostra facit, siue pro comprobatione opinionis nostræ de extractione calculi vesicæ per Ilia, ad modum Franconis: siue ad sectionis nostræ Cæsareæ confirmationem. Verū quod ad exempli huius imitationem attinet, nolo quis sibi persuadeat, velle me ex rationibus allatis statuere, vel consulere, vt à quoquam temerariē talis sectio Renis vsurpetur, nisi prius simili sectione aliquoties fuerit vsus. Quemadmodum enim vna hirundo Ver non facit, nec vna solū serena dies Æstatem pollicetur, sic vnica experiētia non potis est, has difficultates resolvere. Præterea Lithotomus talem sectionem nunquā tentarit, quin prius conuenienti instrumēto, quo in loco calculus latitet, tentarit, licet plura & quidem vniuoca, quæ

quæ id attestentur signa habeat, quod tamen in Rene fieri non potest, licet in Vesica hoc fiat. Et demus, de calculo Renali certò nobis constare, attamen calculi huius extractio, maiori ex parte aut superflua, aut suspecta, aut saltem rarò necessaria est. Superfluam dico, si nimirum alter ren sit sanus, adeò suo satisfaciens officio, ut quasi vtriusq; munere fungatur, quod sæpius accidisse manifestum, dum nimirum vnus illorum diu fuit putridus (cui rei testimonio esse potest, puris cum vrina copiosa excretio) nihilosecus tamen alter attraxit, transcolauit, & sufficiēter vrinam euacuauit. Suspectam dico, si nimirum ambo renes pariter sint affecti: tum enim si alter eorū secaretur, parum fructus inde perciperetur, nisi pari pacto & alter incideretur, quod tamen præsentaneam mortē ostenderet. Parum necessariam dico: nam ob alterū solū renem vlcere, aut alio morbo affectum, nihilominus tamē viuere licet, si alter sanus sit, vicioq; careat. Verū hoc quidem est, si ambo simul omnimoda obstructione laborent, calculis adeò magnis, ut in Vreteres deuolui, aut ex Vreteribus vesicam ingredi non possint (quod ex vesicæ va-

cuitate tum patet) tum hoc remedium
 cū alia desint, non absq; ratione propo-
 ni potest, ita vt Renum alteruter secetur:
 cuius gratia etiam sectionē nostram Cæ-
 saream, si alio modo partus promoueri
 non possit, proponimus. Quod nō adeo
 difficulter ab ægrotis, tantis tum ob cal-
 culum doloribus discruciatīs impetrari
 potest, cū ipsimet vel cū periculo hanc
 sectionem experant.

In huius tractationis, in qua proli-
 xior fui, q̃ animus erat, sine, negligē-
 tiæ mihi accusandi venēre ij, qui cū Lu-
 tetiæ adeo feliciter rem tam periculosa-
 m, tanta etiam cū vtilitate coniunctam,
 tentassent, quod id literis non consignā-
 rint, imò tabulis æneis insculpserint, po-
 steritati eas consecrantes, & vt rem admi-
 ratione, imò sæpius imitatione dignam,
 eas in Scholis ipsorum erigentes. Res sa-
 nè hæc tabulas illas meruisset, quæ in
 Germania esse dicuntur, magna quædam
 Paracelsi miracula attestantes: qui tamē
 maiorem partem suarum receptarum &
 secretorum secum abstulit, ex suis igni-
 bus, sectatoribus suis, parum aliud
 quàm frigidos cineres
 relinquens.

Responsio

*Responsio ad Obiectiones, quæ fieri possunt
contra sectionem, quæ fit in Hypoga-
strio, in parte ipsius Vesicæ
membranosa.*

CAP. VIII.

NON me latet, quin primo intuitu
valde mirum videatur, concedi Ve-
sicam absq; vitæ periculo in parte mem-
branosa incidi posse: quod tamen neces-
sariò fieri debere videtur, si modò hoc,
quod proponimus verum sit, & quod in
hypogastrio accidisse autoritatibus com-
probamus. Hæc enim recepta est opinio
ad tutandam sententiam Hippocratis,
qui 7. Aphoris. 18. sine vlla distinctio-
ne statuit, (quod & omnes ipsius inter-
pretes, ipsi assentiri volentes, faciunt) Ve-
sicæ læsionem & incurabilem, & lethali-
lem esse. Quod tamē intellexisse debuif-
set, cum non ignorauerit suo etiam tem-
pore, in extractione Calculi, ipsam fuif-
se sectam, quam sectionem in iuramento
suo concedit, non tamen manum operi
adhibet. Fit ergo in parte membranosa,
licet non sit verè & simpliciter membra-
na, dum in corpore sita est: nec etiam ve-
rè talis est, vt esse apparet, quando à lon-

go tempore fuit exsiccata, extensa, & inflata, sed potius ad aliquā carnis speciem referri potest, cuius carnis Galenus diuersas facit species. Nam vt in Com. 6. in 6. Epid. refert, Hippocrates carnem appellat non solū eam, quæ Musculorum est, sed etiam Intestinorum, & Vesicæ. Quem etiam ipse secutus est 7. de Anatomica administr. dum inquit: Carnis non eadem vbique forma: quæ enim Musculorum est, magis rubet, & mollior est, quàm sit ipsius Ventriculi, Vesicæ, Vteri, & omnium Intestinorum caro.

Detur Vesicam ipsam valdè membranofam esse, imò membranā & verè spermaticam, eiusmodi tamen est & Peritonæum & periostrium, cornea ipsius oculi tunica & Meninges cerebri, quæ tamen rursus consolidantur, imò & ipsum Cerebrum consolidatur, quod tamen tempore Hippocratis non fuerat obseruatum, vti posterioribus temporibus factum.

Verū Vesicam facilè in parte membranosa cōsolidari, exempla multorum Vulnerum abdomini inflctorum curatio, quæ per vrina pura promanabat, attestantur. Et quare hoc Vesicæ non vsu veniret, quod tamen in ipsis intestinis
tam

ram tenuibus quàm crassis observatur, imò in ipsomet Ventriculo, quod sæpè attestatur non solùm Chylus, sed etiam cibus recens assumptus, subitò è vulnere incoctus prodiens, & tamen hi non moriuntur. Hippocrates tamen omnia hæc magna vulnera non secus pro deploratis habuit, quàm ipsius Vesicæ vulnera: quare Hippocratis sententiã tueri si velimus, necessario Galeni dicto ἐπὶ τῷ πλεον, nobis vtendum erit.

*Exemplum alterum sectionem hanc
comprobans.*

CAP. IX.

EA quæ hætenus dicta fuere, præterquam quod Franconis exemplo comprobentur, aliter adhuc confirmantur: exemplo nimirũ ipsius Cueur de Cheshè hospitis Aurelianensis, ad insigne floris Liliij, qui cùm 4. Idus Feb. anni 1560. pugione vulneratus fuisset, & iam per dies nouemdecim vrinam per vulnus solùm reddidisset (signum manifestum partis superioris, & membranosæ ipsius Vesicæ læsæ) & à Florentio Philippo catheter per penem Vesicæ inditus, & in eo per paucos dies detentus fuisset, subitò per-

76 FRANC. ROUSSETI DE
fectè curatus fuit. Cuius rei testes esse
possunt D.D. Ralsius, & Ambrosius Pa-
ræus: quæ curationes adeò sunt frequen-
tes, vt de eo dubitare non oporteat.

SECTIO IV.

*Tertia huius sectionis probatio, quæ Hi-
storij & casibus, qui huic parti accidere,
longè difficilioribus, quàm sit Cæsarea no-
stra sectio perficitur: idq. Autoritatibus,
cùm hac de re hætenus nemo
scripserit, deficien-
tibus.*

CAP. I.



ELICTA tractatione quæ fuit
de sectione Vesicæ, ne præter
propositum Vteri tractatum
deferamus, nunc cum sectio-
ne nostra Cæsarea, alios casus longè pe-
riculosiores, qui Vtero accidere, qui ta-
men respectu sui non sunt lethales, confe-
ramus: quos in quatuor classes dispone-
mus. In prima agemus de Mulieribus,
quæ se ipsis ignorantibus Vtero gestâ-
runt, in quibus foetus mortuus & putri-
dus causa fuit, vt & Vterus in corpore
putre-

putresceret, ita ut tēporis progressu interierint, quæ tamē superuixissent, si malo cognito, tempestiuè sectione hac ipsis auxilium latum fuisset. In altera, de Mulieribus, quarum aliquæ puerperæ fuere, aliquæ verò non, quæ Apostemate Vteri laborantes, apertæ fuere, nō sectione Cæsarea, sed cauterio actuali Abdomini impresso, quæ tamen nō modò non mortuæ, verum etiā nec facultate concipiendi priuatæ fuere: quæ tamen operatio, quàm sit Cæsarea sectio, longè peior. In tertia de Morbis Vteri, circa interiorem partē fundi ipsius putrefacti, & quidem tanto cum vlcere, ut fœtus mortui, è capacitare Vteri ad intestina fuerint prolapsi, & inde per Epigastrium extracti, (quo loci magnum solùm Apostema esse, suspicio erat) absque tamen matris internectione, aut postmodum Vtero gestandi facultate ablata, Vtero naturæ beneficio consolidato. Quarta continebit Historias Mulierū, quibus Vterus prolapsus & putridus, absque vitæ periculo totus & quidem sectione, vstione, aut ligaturis ablati sunt. Quinta, historias Mulierum, quibus vterus valdè absumptus & putridus, tandem spontè absque

78 FRANC. ROVSSETI DE
tamen morte, aut morbo subsequēte ex-
cidit, proponet.

*Classis prima, ternas continens
Historias.*

CAP. II.

HISTORIA I.

LVdouica Pouppard, Nicolai Seuini
Campi vastati dicti Aurelianensis v-
xor, cū propter febrim quartanā, qua
detinebatur, Menstrua suppressa esse (qđ
plerunq; vsu venire solet) existimaret, ta-
men cōceperat. Verū cū se grauidam nō
suspicaretur, vsa medicamētis, venæ se-
ctione, remediisq; topicis, quibus tam in
febri quartana, q̃ in hepatis & splenis du-
ritie (quæ huius morbi sunt symptoma-
ta) Medici vti consueuēre. Durities au-
tem hæc, licet esset propter fœtum in V-
tero contentum, (quod non agnosceba-
tur) tamen Scirrhus censebatur, aut alia
colluuiēs, quæ exputata Symptomata
Menstruorum suppressione esset orta.
Tandem fœtu mortuo, mollioribûsque
ipsius partibus putrefactis, nec vllis i-
psius partus signis conspicuis, ossa tra-
ctu temporis denudata fuēre, & Vterum
posterior-

posteriora versus circa regionē recti intestini perforarunt, ita vt sensim per aluum, vnā cum excrementis ossa fuerint excreta, & inter cætera, os tibiæ integrū fuit reiectum. Cū ita diu cum morbo fuisset conflictata, interiit: cuius corpus 8. Idus Febr. Anni 1565. per Florentium Philippum & Michaelē Pichardum apertum fuit: à quibus nil nisi ossa putrida, & præcipuè capitis ossa fuere inuenta, idque magna cum admiratione, quomodo in hoc cæno Vteri putrefacti subsistere potuerint. Videtur sanè mulierem, quò ad hunc affectum, gastrotomia curari potuisse, si tempestiuè malum cognitum fuisset, hocque auxilium foret vsitatum, & cum iudicio adhibitum.

HISTORIA II.

CAtharina des Fiefs, domina de On-ci prope Millyum, cū secundas contraxisset nuptias, eodem tempore & in morbū incidit, & grauida reddita: non tamen se Vtero gestare suspicans: quare non secus, quàm in prædicta Aureliæ factum erat, ita & ipsa Lutetiæ infinitis remediis & quidem Diæta sudorifica (auxilium aduersus morbum quærens) vsa

est: etsi nō deessent ex Obstetricibus Rēginæ aliquæ, quæ gravidam ipsam pronuntiarent, eò quòd symptomata ea, quæ vtero gerentibus accidere solent, in ipsa obseruarent, idque à tempore suppressorum menstruorum, donec etiam Lac in mammas obseruatur, & vsq; ad nonum mensem: quo tempore omnia illa Symptomata desinere, vnà cum motu ipsius fœtus: dein dolores partus irriti tum superuenere, & statim pòst, omnia signa fœtus emortui obseruare licuit, attamē horum omnium signorum ratio non habebatur. Quare cū Lutetia domū rediisset, adhuc fœtum mortuum Vtero gestauit, idque quindecim mensium spatio à die ipsius interitus supputatione facta, præter anteaçtos nouem menses, quibus in vtero materno vixerat. Sic partes molliores putrefactæ per inferiora eiiciebantur, quæ (non absque ratione aliqua) per

de Melun. Dominum Ponetum Medicum Melodunensem doctissimum, pro sanie ex Vteri vlcere promanante habebatur: quemadmodum ossa quæ remanserāt Scirrhum Lienis esse censebat. Tandem extincta cū esset, 5. Non. Octobr. Anni 1570. à Luca Campano & Iacobo Dazier Tonforibus

foribus Millyensibus, præsentibus Dominis de Vertau, & la Gainiere, plurimisque aliis aperta fuit. Quare copiosa adhuc sanies in abdomine reperta absque Vtero, & fœtus ossa aliqua iam putrida, aliqua verò integra erant: & inter hæc ossa vnum ex ossibus claviculæ iam liuidum, Peritonæum & abdominis Musculos iam perforarat, ita vt sola cutis integra remanserit, qui in latere sinistro forinsecus conspiciebatur, quod iam pridem pro splenis scirrho habebatur.

Quæro ergo, si malum fuisset (modò non pertinaciter in semel & leuiter pronuntiata sententia persistatur) diligenter inuestigatum, per concurrentia signa conceptum, dein fœtum mortuum indicantia: sic si & alia coindicantia diligenter fuissent obseruata, & malum, quale erat agnitum, an nō spes fuerit (tum cum pârere non posset) ipsam vnâ cum fœtu etiam hac sectione conseruâdi: aut etiam post fœtum mortuum, qui diu in Vtero conseruatus solùm matrem hac eadem sectione, quod tamen vnicum & necessarium erat remedium, saluandi.

F

HISTORIA III.

Similis & æquè lugubris casus, mulie-
ri cuiusdam Chirurgi Monspeliensis
Aufme vocati, accidit, qui celeberrimis
Medicis amplissimi Collegij Monspe-
liensis (vti credibile est) pergratus erat:
quæ (vti Dominus Rondeletius suæ Mé-
thodi curandi, cap. 65. meminit) cum in
Vtero gestaret, puerum putrefactum, il-
lius aliquot partes frustulatim reicie-
bat, solum maioribus ossibus in Vtero
relictis, ita vt longo tempore post ipsi
fuerit moriendum. Quamuis causæ, cur
huic moriendum fuerit, debuissent fuis-
se notissimæ, propter ipsius fœtus mani-
festa frustra, quæ reiecta erant, & ipsius
reliquum, quod ibi tanquam in luto hæ-
rebat: rectè tamen à marito factum, qui
maioris certitudinis causa ipsius corpus
aperiri voluerit. Verùm vtilius multò
fuiſſet, affectu iam satis cognito, vt per
orificium Vteri fuissent ossa extracta, si
modò fieri potuisset: aut si hoc non li-
cuiſſet, certè sectione hac nostra Cæsarea
liberanda fuisset, si (cum viribus valen-
tibus) hoc remedium tum temporis fuiſ-
set vsurpatum, quod in talibus casibus
vsurpa-

vsurpari debet, modò nil vel impediatur,
vel aliud non habeatur remedium.

*Classis altera, continens historias qua-
tuor de Abdomine, cauterio
actuali aperto.*

CAP. III.

VERùm ne fortè causa alicui sit dubi-
tandi, Vterùsne adeò affectus ad ex-
tractionem fœtus demortui (qui vlcerũ
horum causa erat coniuncta) felici cum
successu & matris salute, secari potuisset,
recitabo in hac secunda classe aliquot ve-
ras historias, quæ in æquè periculosis ca-
sibus ex Abdomine inciso, felicem ha-
buerunt successum, quas ex duorum cla-
rissimorum Medicorum literis cogno-
ui: quamuis illæ mulieres nō forent gra-
uidæ, sed summo Apostemate Vteri (quod
longè peius erat) laborarint. Horum ve-
rò adhuc viuētium Medicorum celebri-
tas, testimonij & auctoritatis loco esse
potest, quorum alter est D. Alboſius Se-
nonensis Medicus, cuius nomen cū a-
deò sit celebre, in causa est, vt de eo plu-
ra non sim dicturus: alter verò est D. Vil-
lanquanus senior, Valdreaci in Prouin- *à Vnatreat*
cia habitans, primus, qui me, postquam *en Pronèci*

studiis meis finem imposuissem, & Doctoris titulo ornatus fuisset, ad inuisendos ægros deduxit. Quorum epistolas ex ipsorum libris curationum extractas (vti omnes Medicos facere decet) & ab ipsis mihi communicatas, cum ex copiofiori, elegantiori; sermone Latino, quo scriptæ erant, breuibus in Gallicum translulerim, hinc inseram.

HISTORIA I.

IOAN. ALBOSIVS, ROVSSETO S.

NON minus admiratione dignus est, quam tua sit Cæsarea sectio, casus ille, qui iuxta ædes meas accidit: Mulier Vtero gerens, cum aut propter grandioræ ætatem, aut aliam ob causam parere aliter non potuisset, nisi frustatim partibus ipsius foetus exclusis: vtraque latera ipsius infimi ventris valde tumida habuit, propter vim ferreis instrumentis illatam, præsentibus etiã omnibus signis, apostema ostendentibus, quod etiã cum ductibus naturæ communionem habebat. Quare cū ipsius infimi ventris pars affecta, cauterio, & quidem amplo facto vulnere, aperta fuisset, magna puris quantitas

ritas effluxit, sed non minor puris quantitas, quæ eiusdem & substantiæ & coloris fuit, per Vterum profluxit. Verum pati noluit, ut speculo matrici indito, quæritus esset ipsius sinus, experirer: nihilominus tamen satis conspicuum erat, & apostema & vulnus cauterio inflictum ad vterum usque vergere, quod ex symptomatibus, quæ successiuè accidebant, & etiam excrementis similibus, colligi potuit: dein etiam ex eo, quod pari pacto, eodemque tempore utraque pars affecta fuerit percurata. Quare cum ita se res habeat, uti vidi, mirum non est, quod in tua gastrotomia tradis, cum longè difficilius sit, tale vlcus, quam simplex eiusdem partis vulnus, curari. Vale.

*Altera historia priori similis, eiusdem
Albosi.*

CVM cuidam Nicolæ, Simonis Pistoris Senonensis vxori infans mortuus, instrumentis ferreis violenter foret extractus, absque lochiorum fluxu & secundinæ extractione: tū intra dies quinque ex utraque parte infimi Ventris, magnus tumor obortus cum Apostematis signis euidentissimis. Quare cauterio a-

F 3

ctuali, vni ex lateribus profundissimè
 impresso, ex Apostemate aperto, Chirur-
 gus copiosum sanguinè grumosum, pu-
 tridum & foetidum manu extraxit: ita
 tamen vt alterius lateris tumor non con-
 sidèret, nec etiam secundinam educere
 posset: quare & alterum latus ipsum a-
 perire oportuit, vnde secundinam extra-
 xit. Hoc tamen non sine extremis dolo-
 ribus, in tam ancipiti & desperato casu
 euenit: semianimis enim remansit, trien-
 nio se lecto continuit: biennio verò pòst,
 fulcris innixa, obambulabat: postmo-
 dum scipioni solùm innitebatur, & sic
 tandem successiuè sanitatem pristinam
 adeptæ est, ita vt ab eo postmodū tempo-
 re, plures habuerit infantes, inter quos
 vnus Sebastianus nomine, qui adhuc &
 in viuís est, & in hac vrbe habitat. Vale.

HISTORIA III.

*Duæ aliæ eiusdem argumenti historiæ à Vil-
 lanouano communicatæ.*

Nicolaus Villanouanus, Rousseto sa-
 lutem. Mirum in modum, &c. Sed
 vt ad rem veniā, fateor me tanto, ex quo
 vixi tempore, nunquam vidisse mulie-
 rem, quæ per latus enixa sit, & superstes
 reman-

remanserit, ut ad me scribis. Memoria quidem recolo, quod cum Domina de Piles moniali, infimus Venter mirum in modum intumisset, iussu meo Mauricius Valdreaci Chirurgum, Abdomen à Vultreas. cauterio actuali ad Vteri fundum adactum, aperuisse: unde tam per vulnus, quam partes inferiores, ultra septem libras puris, quod semper simile fuit, emanavit: & ut de loco affecto certiores essemus, specillo partem inferiorē dilatauimus, ita ut facile magnitudinem ipsius ulceris Vterini cōspexerimus, quod sex mensium spacio percurauimus: ab illo tempore filiam enixa, quæ adhuc superstes est. Anno 1532. hoc accidit.

HISTORIA IV.

Altera Historia ab eodem.

Simile accidisse uxori Pharmacopæi de Brisset nomine Montelimarti habitantis, & etiam curatā fuisse attestor: *de Montel-mar.* cui contra duorum Medicorum consilium, qui eam tractabant, consentiente tamen marito, simili cauterio usque ad interiorē Vteri partem adactum, Hypogastrium aperiri curauit: unde pus, usque ad spondæ pedes exiit, & eodem tem-

pore admiranda saniei copia infernè profluxit. Hæc trimestri spatío curata, statim post cōcepit: nam exinde tres filios, vnāque filiam enixa est: accidit anno 1558. Gratias ago Deo, quòd cū iam peregrinationis meæ octuagintaquinque annos absoluerim: tamen, sua benignitate, adeò corpore sim sano, vt præter exercitia, quæ à me fieri vidisti, adhuc quotidie corpore bene disposito, tam eques extrà, quàm pedes intra urbem incedam. Verùm vt mihi omnia felicia precaris, sic vicissim vt tibi in pari & etiā maiori ætate eadem largiatur Dominus, exopto. Vale.

Classis tertia, sex historias de Vtero putrefacto, absq; tamen internecione, continens.

CAP. IV.

CUM in præcedentibus historiis, nulla adhuc peculiaris facta fuerit mentio, Mulierum quæ vtrumque sint perpeſsæ: nimirum vt & grauidæ & etiā incisæ fuerint: prædictæ enim, quæ Vtero gerebāt, cū ipsarum fœtus iam mortui, viam aliam quàm per Abdomen incisum

cifum sibi quæsiuerint, sectæ non fuere. Præterea ex quæ sectæ, grauidæ non fuere, quamuis peius habuerint, nimirum Apostemate Vteri laborantes. Quare magis ad rem faciet, si alias historias in medium attulerimus, in quibus vtrumque contigit: nimirum ipsas & grauidas fuisse, & Abdomen sectum fuisse, licet sectione Cæsarea, uti nominamus, non apertæ fuerint, ut fœtus extraheretur, sed ut pus ex Apostemate euacuaretur, licet vnâ cū Apostemate adfuerit, vel infans perfectus, vel collectio ossium, fœtus iam pridem mortui. Quo sanè in casu, æquè ut in aliis, plus fuit periculī, tum propter vlcus Vteri, tum propter alias causas, quæ sit in sectione nostra Cæsarea, & tamen non modò nullæ mortuæ, sed quod maius est, pleræque ipsarum rursus concipere, & ad legitimum tempus vsque Vtero gestauere. Verùm cum ex historiis subsequentibus tres habeantur in opusculo, Matthiæ Cornacis Medici Viennæ Austriæ habitantis, edito: vna item apud Albucasim, suæ Chirurgiæ lib. 2. idcirco breuitati studens, plerasque infinitas circumstantias, ut sunt loci, anni, diei, personarum; testes item quos ci-

90 FRANC. ROUSSETI DE
tant, præteribo. Summa rei hæc est.

HISTORIA I.

Hospita ad insigne Cæcri rupei Vien
næ Austriæ, cum parere non posset,
per annos quatuor fœtum mortuum V-
tero gestauit, ita vt Vteri putridi fundo
relieto (quod postmodum apparuit) i-
pſius corpus vlceratum Inteltina versus
pertransierit. Quare cùm in Abdomine
magnus tumor conspiceretur, medium
ipſius Epigastrij ad Abscessum euacuan-
dũ incisum fuit, vnde infans extractus,
nondum adeò putrefactus, (res sanè ad-
miratione digna) quin masculum fuisse
cognitum fuerit. Quæ cùm pristinam sa-
nitatem foret adepta, rursus concepit, &
ad præfinitum à natura tempus, Vterum
gestauit: sed cùm abdomen non fuisset
incisum (licet rectè Cornax consuleret)
ipſi moriendum fuit, fœtu non excluso.
Verùm post mortem matris, elegantissi-
mum infantem extraxere, viuacem val-
dè, si modò ipſi vnà cum matre sectione
Cæsarea subuentum foret.

HISTORIA II.

Eodem in opusculo, epist. ab Achille
Gassero

PART. CAES. SECT. IV. 91

Gassero Medico Augustano ad Cornacē scripta, habetur, quæ similem historiam iisdem cum circumstantiis continet. Mulieris cuiusdam cui ferè anno vno, postquam pariendi tempus esset elapsum, foetus (viri & prædictæ) è capacitae Vteri exulcerati ad intestina erat prolapsus, vti manifestè conspiciebatur ex Apostemate in abdomine, potissimum latere sinistro, oborto. Quare à Chirurgo successiuè os vnum post alterum fuit extractum, quæ cum percurata foret, postmodum conuenienti modo liberos & gesta uit, & enixa est.

HISTORIA III.

SEd & altera etiam epistola, in eodem Cornacis libro habetur, ab Ægidio de Hortoge celebri Medico Bruxellensi ad ipsum scripta, in qua mentio fit historię cuiusdam mulieris, quæ cum parere non potuisset, carne & partibus mollioribus foetus iam putrefactis, & per uterum reiectis, sub Epigastrio tamen ossium collisio sentiebatur, (quod manu facilè eratprehendere) ita tamē ut parum actiones mulieris læderet, cum iam ab annis tredecim utero gestasset, quod

sanè absque vteri perforatione fieri non poterat: hæc tamen curata fuit, vti fieri oportebat, cum nihil puris amplius ex vtero promanaret, (vti factum foret) & etiam ordinatè menstrua fluerent.

Probatio Historiæ iam citatæ.

C A P. V.

A Deò mirandum accidere posse, vt probemus, (quamuis sensus ipsi fidem faciant, etiam ei qui ex societate aut ex affinitate S. Thomæ sit) non præter rationem citari potest, adeò diuturna mora puris, non solùm in Renibus, Vesica, Mesenterio, Longano, præter tamen vitæ periculum: sed etiã in Splene, & Hepate, quæ viscera in quibusdam reperta à longo tempore suppurata: in aliis verò tam hominibus, quàm brutis cicatrice obducta & curata. Fertur in quibusdam Splenis parenchyma, adeò absumptum repertum esse, vt sola cutis remanserit, quod sæpius in renibus à calculo ulceratis obseruauimus, qui soli hinc inde versantes, tanquam numi in crumena remanserant. Duorum, D. Viardus Chirurgus insignis meminit, in quibus, plurimis præsentibus, cum in latere sinistro vulne.

vulnerati fuissent, repererit Splenes sauci-
 ciatos, & eos partim alteratos, partim ve-
 rò exsiccatos, quos sectione se extirpasse
 refert. Simile etiam ex D. Paruo perdo-
 cto Medico Genabi habitante cognoui, à *Gian.*
 feliciter à Chirurgo eius loci idem in vi-
 ro saucio, quem tractabat factum, & ta-
 men innumerabilis arteriarum plexus,
 quàm necessaria sit ipsi indiuiduo actio
 ipsius, satis ostendit. De Splenis usu ali-
 bi disputabimus, sumpta occasione ex
 docta ipsius Vlmi disputatione, quam
 tam contra veteres quàm neotericos ha-
 buit: quòd nimirum infinitus ferè tam
 venarum quàm arteriarum numerus nō
 impediatur, quominus, absque tamen mor-
 tis necessitate, magna ipsius omenti pars
 per vulnus exeuntis secetur, quod etiam
 quotidie feliciter exercetur. Pulmones
 similiter qui vicini, & Cordis flabellum
 sunt, sæpius purè multis annis referti
 sunt; præcipuè verò si vnus pulmonis lo-
 bus sanus sit, & sputum faciliè procedat.
 Sed quod maius est, à Cornace in Bi-
 bliopolæ cuiusdam Viennensis corde,
 (quod adhuc cōtingere potest) post mor-
 tem magnū apostema, mediam ferè cor-
 dis capacitātē ambiens, in plurimorum

94 FRANC. ROUSSETI DE
præsentia repertū fuit (q̄t̄n diu prius le-
ui solū syncopi obnoxius fuerat) qđ
certē non potuit, cū adeò fuerit magnū,
momēto accidisse. Idem etiam Nicolaus
Massa, celeberrimus sui temporis Medi-
cus, in sua Anatome testatur, se in Vene-
to (qui ex vulnere capitis interierat) in
auricula & substantia cordis, dimidij o-
ui magnitudine abscessum inuenisse, qui
in fibrosa hac ac solida parte, non potuit
nisi longo temporis spatio nasci: quod,
modo vulnus vlcusve ad ipsos ventricu-
los non penetret, contingere potest. Ta-
les etiam reperiuntur, qui ultra dies o-
ctodecim vixēre, corde tamē ad profun-
ditatem duorum transversorum digito-
rum, sed solū in ipsius carne, lēso. Idem
in Cerebro accidit, in ipsius inquā sub-
stantia, nō autem in ventriculis, quemad-
modum fieri hoc posse, historiis, testimo-
niis, fide dignorum comprobatis, alibi
ostendemus, tædiosam prolixitatem in
hac Epitome vitantes.

HISTORIA IV. EIVS-

dem subiecti.

SI delicatioribus quibusdam Lectori-
bus, quibus antiquitas solū placet,
neoterici hi citati autores non satisfaciant,

ciant, nec aliâs ipsis quidquam, nisi sum-
 ma cum difficultate persuaderi potest:
 satisfaciet tamen, ut spero, docti & iam
 pridem percelebris Medici & Chirurgi
 Arabis Albucasis auctoritas, qui lib. 2.
 suæ Chirurgiæ, in hunc modum scribit:
 Mulierē vidi, in cuius utero infans cū
 esset mortuus, rursus tamen grauida red-
 dita, qui etiā fœtus in ea mortuus. Lon-
 go tempore pōst, tumor in ipso vmbili-
 co obortus, quo aperto materia effluxit:
 ad quam vocatus fui, & longo tempore
 tractauī, nec tamen consolidari potuit:
 quare fortissima attrahendi vi pollen-
 tia medicamenta applicauī, sicque pluri-
 mā ossa successiue prodire: quo viso,
 perterritus fui, cū in Abdomine nulla
 esse ossa scirem. Quare omnibus perpen-
 sis, & indagatis, esse ossa fœtus emortui
 cognoui: ita ut cū plura iam extraxis-
 sem, eam pristinae sanitati restituerim, eo
 solū excepto, quod semper aliquid per
 vlcus exsudarit. Haftenus Albucasis.
 Quod si adhuc aliqui adeo difficiles sint,
 quibus ne hac quidem ratione satisfiat,
 ut q̄ omnia quæ ab Arabibus sunt pro-
 fecta, tanquam barbara detestentur, eos
 ad Alexandrum Benedictum, qui simi-

96 FRANC. ROVSSETI DE
lem historiam in sua praxi, tract. de Dif-
ficul partus habet, relego.

HISTORIA V.

VERùm ne hæc testimonia & historiæ
peregrinæ, quæ à nobis sunt allatæ,
aliquibus sint suspectæ, non secus quàm
narrationes eius, q̄ varias regiones per-
lustrauit, cui etsi quis nolit, aut fidem da-
re oportet, aut ea loca etiam perlustrare,
ad rei veritatē indagandam. Quare con-
tentus ero allegatione similium histo-
riarum, casuum eorum, qui in nostra re-
gione contingere, quæ non minus felices
& laudabiles sunt, qui eas diligēter per-
penderit, quàm sint vllæ aliæ historiæ.

*de Sully sur
Loyre.*

In suburbiis Sullianis ad Ligerim
Margarita Preuost, Petri Doretī molito-
ris vxor, cū manifestò grauida esset, &
tamen tempore partus enitī non potuiss-
set, quomodocunque à mulieribus ipsi
succurreretur, sensim in grauidissimum
incidit morbum, vt tandem venter adeò
extenderetur, propter foetum & ipsius
tunicas putrescentes, ita vt præter totius
Abdominis tumorem, octauo, nonôve
mense circa regionem vmbilici, peculia-
ris tumor, valde elatus, obortus sit, simi-
lis

lis abscessui molli rubro, vt iam ad apertionem maturus videretur. Quare abscessus hic anno 1550. die natiuitatis Christi ab Ithierio Gallometo eius loci Chirurgus, cauterio actuali apertus fuit, qui puris incredibilem quantitatem, scutellis exemit: altera verò die, cum vulneris rationem esset habiturus, qualésnam essent pili, qui circa vulnus conspiciebantur, inquirere voluit, quare foetus caput iam putrescens esse reperit, quod tum per vulnus dilatatum extraxit, cum reliqua cadaueris parte, quod filiam fuisse agnitum, attamen breui temporis spatio conualuit. Hæc post mortem Doreti mariti, rursus alteri nupsit, & circiter annos adhuc viginti septem, corpore sano superuixit, quæ modò nuper nimirum anno Christi 1577. diarrhœa periit. Verùm ipsa vt nec prius, ita nec postmodum vtero gestauit. Cuius rei testes plures fide digni eo loci habentur, & præsertim Gratiana Theobalda, prædicti Gallometi Chirurgi vxor. Verùm si quis sit, q Chirurgi sibi incogniti testimonium contemnat, (licet eo loci celebris fuerit) acquiescendum tamen ipsi erit, ei, quod succinctè suo more, doctissimus Holle-

rius præceptor meus, sub finem i. lib de Morbis internis scriptum reliquit. Refert Mulierem quandam Lutetiæ cum vtero gestaret, foetum diebus quindecim antequam in lucem ederetur, brachium per umbilicū matris extensum habuisse, & tamen nihilominus ipsam vnā cum foetu superstitem remanuisse. Quomodo autem enixa sit, aut per quam viam, & an postmodum rursus vtero gestarit, speciatim non exponit, quod tamen & investigatione & consignatione dignū erat: id quod facile ab ipso fieri poterat, cum præ foribus exemplum haberet: magna huius rei vtilitate, tam quoad theoriam, quàm praxin perpensa. Sed quomodo cunque se res habeat, hoc absque magno vteri vlcere fieri non potuit: licet foetus dein in locum naturalem rursus redierit. Verū ex altera parte res summa admiratione digna est, infantē tam diu superstitem, hoc pacto viuere potuisse, non solum vtero, sed & tunicis ipsum inuoluentibus ruptis, ipsius vteri fundo brachio perforato: alia enim ratione fieri non poterat.

Referam adhuc historiā similem, absque contradictione veram, ex relatione
 Illustris

Illustrissimæ & heroicæ Principissæ, quæ ex Illustri Bourbonia stirpe est, Guyliana usufructuaria, (quæ licet ætate sit grædæua, sano tamen corpore & animo est, quod admiratione dignum, & heroicis huius sæculi personis exempli loco esse debet) quam ex doctissimo ipsius Medico D. Bunoto cognoui, qui ad urbem id quod ex ipsa speciatim cognouerat, & quod etiam nuper denuò ab illa narratum & affirmatum ipsi fuit, ad me transcripsit. Historia sic se habet.

HISTORIA VI.

CVM sua Celsitudo ante matrimonium, annorum iam esset viginti, & apud matrem adhuc educaretur, Pheræ *à la Fere est* *Picardie.* vrbi Picardiæ, & in Templo esset, vidit matri suæ adduci iuuentam ægrotam, pallidam, prostratis viribus, tumentem, tantisque doloribus diuexatam, ita ut nec quis morbus esset, nosceretur, nec spes vlla salutis superesset. Quare Princeps misericordia mota, eam Obstetricibus inspiciendâ tradidit, quæ rem uti se habebat, patefecere: ægrotam nimirum, quæ virgo censebatur, foetum adultum, & à longo tempore mortuum & putri-

dum vtero gestare, ita ut ossa vtero perforato, ad latus umbilici conspicerentur: ex quo loco ipsa Princeps ossa aliquot extrahi, & copiosissimum pus foetidissimum emanare vidit: quo tamē affectu, breui temporis spatio percurata fuit: quam etiam diu prædicta Domina famam observavit: sed quid tandem ei acciderit, ignorat: nec etiam an fuerit postmodum maritata, aut denuò grauida facta, aut contrà. Cùm enim paulò post Illustrissimo Principi felicis memoriæ nupsisset, sedem mutavit, nec quod postmodum ipsi acciderit, perquisiuit.

*Classis quarta, Historias sex de Vtero
absq; vitæ periculo ablato,
continens.*

CAP. V.

ET si huiusmodi vterini affectus in corpore adhuc latitantes, & etiam remedia horrenda, quibus usæ, admiratione sint digna, propter euentus adeò felices: alij tamē adhuc longè difficiliōres casus sunt, ratione tamen quorū mulieribus necessariò moriendum nō est, licet postmodum steriles permaneant, cuiusmodi est

est omnimoda ipsius vteri ablatio, postquam adeò prolapsus, vt extirpāduſ sit: quod nihilominus tamen absque grauiori morbo accidit.

Sunt tamen Medici aliqui & Chirur-
gi etiam doctissimi, qui omnimodam v-
teri procidentiam non concedunt, Ægi-
netæ & Aetij auctoritatibus moti, qui
videntur nō cōcedere, nisi difficulter ad-
modum fieri, vt vterus adeò è loco pro-
labi possit, & tamen auxilia, remedio-
rūque formulas ab antiquis traditas,
pro ipsius vteri in locum naturalem re-
ductione proponunt, ita vt tandem fa-
teantur (quod ex relatione habent) ali-
quibus mulieribus, quæ tamen supersti-
tes remansere, vterū penitus exemptum
fuisse. Verū Hippocratis auctoritas,
quæ lib. de Morb. mul. habetur, vt & ex-
perientia manifesta, ipsis contraria esse
videtur. Scribit enim Hippocrates, vte-
rum sæpius è corpore, & quidem sæpius
vsque ad femora prolabi, imò ex senten-
tia Aetij, magnitudine oui Struthionis:
quod sanè solū vteri collum esse non
potest, absque quo vteri corpus totum
non sit prolapsum. Præterea oculis ob-
seruari potest, ipsius interiorem partem

exterius inuersam, & superiorem, quæ
 interna etiam erat, prolapsam, exteriorē
 partem constituere. Verum tria sunt, quæ
 præter autoritatem Auicennæ, quæ ha-
 betur lib. 3. Fen. 21. tract. 4. cap. 5. hoc at-
 testantur. Primo quidem ipsius sangui-
 nis menstrui sensibilis effluxus, levisque
 transudatio, ex tota ipsius vteri superfi-
 cie promanans, qui dum fluere debent
 menstrua, amplius non procidit, quod
 sanè certum argumentum est, ex ipsius
 vteri corpore & capacitate promanare,
 & non solum ex vteri collo, vti multi
 contra Galeni sententiā somniarunt.
 Verum præter propositum non est, sed
 notatu dignissimū, quod si solum ipsius
 collum procidat, corpus verò ipsum nō-
 dum sit prolapsum, tū conspici in ipsius
 fundo (qui tum parum maior, quàm for-
 tè sit ouum gallinæ) foramen, quod os
 ipsius vteri est, ad ipsum collum attra-
 ctum, & ab ipsius vteri corpore depres-
 sum, per quod foramē in mulieribus iu-
 uencis hoc malo diuexatis, sanguinem
 menstruū promanare obseruatum fuit:
 & tamen facilè prolapsus talis in pristi-
 num situm reduci potest. Sed si per fora-
 men hoc pluribus de causis relaxatum
 ipsum

ipsum corpus tanta mole precidat, quod
quotidie accidere solet, tunc foramen id
amplius non conspicitur, sed totum assi-
milari potest magno vini cantharo, qui
in superiore parte oualem figuram ha-
bet, sed infernè minorem: infernè verò
alia est rotunditas, superiore longè ma-
ior, absq; tamen foramine: in medio au-
tem manifesta conspicitur coarctatio, bi-
nas has partes aliquo pacto separans, qd'
nihil aliud est, quàm os vteri dilatatum.
Et tunc obseruatum fuit, ex tota illa par-
te inferiore, in iuuenis (tanquā per re-
sudationem) sanguinem menstruum de-
bito tempore profluxisse. Hic est inter-
medius angustior locus, cui ligatura in-
iici debet, quando animus est vterū pro-
lapsum, & gangræna affectum auferre:
rarius enim superior pars putredine ten-
tatur. Hac ratione minor illa & superior
rotunditas rursus reponi poterit, si infe-
riore parte ablata illa huius pondere am-
plius non prematur vti ante prolapsum
siebat, nec etiam deorsum post omnimo-
dam procidentiam trahatur. Si verò su-
pra manifestam illam coarctationē, (vti
aliquando factum) ligatura fiat, id cum
dolore summo, & etiam cum periculo

coniunctum erit. Deinde exiguus, aut nullus dolor, quem massa illa carnea prolapsa (uteri fundum puta) tum persentit, etiamsi duriter tractetur, dum reducere est animus, prædicta attestatur. Est enim, ut verum dicamus, os ipsius uteri una cum ligamentis à quibus dependet, quæ exquisito sensu prædita sunt, non autem ipsius uteri corpus, de quo hic agimus, & quod in partu Cæsareo incidimus, quæ admodum alibi probamus. Tum remedia quæ usurpantur, & inter cætera insertio pessarij in fundum usque uteri ex surbere cera obducto, aut alia materia parato, de quo, ne à proposito recedamus, in sequentibus agemus, id etiam comprobant. Verum, ut ad rem accedamus, antequàm aliorum auctoritates proponam, breuiter binas historias à me obseruatas, referam.

HISTORIA I.

à Lunel en
Gastinois.

CVM Lunelli Vastineti, cuidam mulieri è corpore uterus auferretur, præsens adstiterat, qui cōsilio defunctorum D. D. Saportæ, hospitis & mecenatis mei, & Rondeletij, præsidis mei, ab Anatomico publico Bartholomæo nomine, qui

qui postmodum phthisicus interiit, ex-
fectus fuit, idque posteaquam Monspe-
suli omnia remedia, sed irritò conatu at-
tentata essent.

HISTORIA II.

AB eo tempore, consilio meo nobili
matronę Vastineti, (cuius nomē sub *en Gasinois*
ticere placet) Ambrosius Niger & Com-
pagnonus à turre Chirurgi Pithuueren- *de Pithuier*
ses, vterum exsecuere, quod malum aliàs
incurabile erat: iam enim gangrænam
minabatur, & solùm adhuc cuti parum
adhærebat, cuius pars inferior propen-
dens, magnitudinis duorū pugnorum,
iam planè liuida erat.

HISTORIA III.

DOmini Villanouani (cuius suprà
facta fuit mentio) etiam consilio,
antequam ipsi familiaris essem, Petrus
Mauricius Valdreacensis, vterum vxori *de Vnabreas.*
Petri Costei pannicidæ excidit: cui, sta-
tim post absolutum difficilimi partus
puerperium, exciderat, nec reponi pote-
rat, cum adeò in partu læsus foret. Quem
cum ligasset, abscidit, & cauterium adhi-
buit, idque inscio marito, qui tum ab-

106 FRANC. ROUSSETI DE
sens erat, cum quo postmodum nihilo-
minus concubuit, absque tamen volu-
ptate: quod denuò epistola ad me data
Anno 1533. attestatus est.

HISTORIA IV.

CHRISTOPHORUS à Vega Hispanus, tra-
ctatu de Procidencia vteri, refert, se
decennio antequam hæc scriberet, cui-
dam mulieri curasse vterū excindi, quæ
tum adhuc superstes erat.

HISTORIA V. TRES CON- *tinens historias de Vteri* *ablatione.*

CARPUS in sua Anatome hac de re ver-
ba faciens, narrat vidisse se à Patre
suo vterum auferri: dein se quoque cui-
dam vterum excidisse, & postmodum e-
tiam per suum nepotem plurimis Medi-
cis astantibus vterū eximi curasse. Quo
loci observationes admiratione dignas
adducit, de quibus in paruo tractatu, de
hac materia composito, problematice
egimus.

HISTORIA VI.

NON solùm sectione & vstione om-
nimoda vteri procidētia, postquam
amplius

amplius reponi non potest, curatur: sed etiā ligaturis, cuius rei hoc anno praxin vidimus, quod sequēs ostendit historia.

Philiberta Louyson Ioannis Baugin *à la Neufvil*
vinitoris vxor, Neoburgi inter Pithuue *le entre Pi-*
ram & Puissellum habitantis, cū men- *thuers &*
sium octodecim spatio, sanguineo vteri *Puyseaux.*
fluxu, eoque copioso laborasset, adiun-
cto versus collum vteri pondere: subito
suis in ædibus persensit (res sanè mira) v-
terum vsq; ad interiorem femorum par-
tem prolabi, tanta magnitudine, vt cū
eum reponere nō posset, triduo aut qua-
trido pōst, Bonauēturæ à Turre & Blaij
Berte Chirurgorum Pithuuerensium,
(quibus cum hac de re sæpius contuli)
opem implorari: qui cū soli sectionē
adhibere non auderent, ligatura (meum
aduentum exspectantes) contenti fuēre,
quod anno 1580. 6. Kal. Martij factum.
Ligaturam valdè strictam, cū eum re-
ponere non licuisset, adhibuēre, eamque
non circa partem angustiolem, quæ est
inter ceruicem & fundum vteri prolapsi,
de quo præcedenti capite quo loci om-
nium tutissimè sectio fieri potest: sed li-
gatura facta in ceruice vteri, quæ valdè
eminebat, ita vt ligatura, vretræ aut cer-

uici vesicæ proxima foret. Priorem hanc ligaturam per dies octo non mutauere, sed his finitis cum eò vnà cum ipsiis venissem, vt vterum secaremus, vreremus, & auferremus, videns ligaturā in altiori, quàm par esset, loco, ita vt tuta sectio fieri non posset, vltio verò nulla, ratione etiam habita virium prostratarum ipsius ægræ, consului vt noua & arctior, quàm prior fuisset, eodem in loco fieret ligatura: illa enim cum magnam partem ceruicis vteri secuisset, laxior erat reddita. Quo facto, non absque dolore, altera hæc & fortior ligatura, magis adhuc partem incidit, & hæc sectio fuit in anteriori parte, eo loci vbi nodus ipsius ligaturæ erat, vsque ad medium canalem, per quē vterus inuersus prolapsus erat. Vnde magna copia puris effluxit: ex fundo nimirum vteri, qui iam niger & gangrænosus, ad femora propendebat, promanans. Postmodum cum alternis diebus, noua & indies arctior ligatura fieret, vt inter nos conclusum erat, tandem post decimam ligaturam 13. Kal. Aprilis vterus sponte excidit: ipsa verò iam conualuit, munia domestica rectius, quàm antehac obiens.

Classis

*Clasſis quinta, binas continens historias
de Vtero, absq; tamen morte
spontè elapſo.*

CAP. VI.

Historiæ iam adductæ de excisione prolapsi & putrefacti vteri, in mulieribus, quæ superstites mansere, absurdæ videri non debent: siquidem vterus cum rursus in corpus retrudi non potest, spontè & à corpore se separet, & etiam excidat, (nisi arte Chirurgica succurratur) absque tamen vitæ periculo, imò etiam absque morbo, vt ex sequentibus historiis colligere erit.

HISTORIA I.

CVM Domine Blanchafortiæ senio- *de Blanca-*
ri, piæ memoriæ, à longo tempore, *fort.*
sed sensim vterus adeò esset prolapsus, vt
tandem nec rursus indere, nec etiam am-
plius ferre posset, vt qui iam putrescere
inciperet, Montargisium ad me ventu- *à Montar-*
ra erat, vt ibi eam curarem, aut Lutetiam *gis.*
comitarer: verum dum in itinere esset,
vterus spontè excidit: nihilominus ta-
men iter absoluit, nec etiam aliis vsa re-
mediis, quàm lotione ex vino & rosâ à

Felles Chirurgo adhibita, qui (vt narrat) eo loci, vbi vterus esse solebat, nil nisi spatium vacuum obseruauit, Anno 1571 ætatis tempore hoc accidit, à quo tempore, pro ratione ætatis grandæuæ, satis sana superuixit. Tandem ex casu scilæ, subita morte periit: nec tamen eius corpus apertū fuit, vt locus vnde vterus prolapsus erat, inspiceretur, vt in altera, de qua sequēs historia aget, factum fuit.

HISTORIA II.

CVM ob plures difficiliores partus, Petrina Boucher Domini Francisci Quarrei aduocati Montargissienſis, iam prouectæ ætatis ancilla, vteri prolapsu longo tempore laborasset, qui sensim adeò auctus, vt amplius in naturalem locum reponi non posset, tandē gangræna affectus, putruit: & spontè anno 1574. dum vrinam esset redditura, excidit, nec tamē propterea lecto se continuit, cuius rei fide digni testes sunt D. Contugonius Medicus, & Ioānes Bellouacus Chirurgus Montargissienſis. Vtero elapso, toto adhuc triennio optimè valens, superuixit, nisi quod (vt ipsa narrabat) ab illo tempore cogeatur diligentius q̄ prius,

prius, partes inferiores à frigore externo custodire, aut certè doloribus colicis diuexari. Tandem (me absente) cum febris continua interiisset, & iam sepulta esset, post reditum vnice me rogante factum, vt Magistratus permissu rursus exhumata fuerit, & per Felles Chirurgum anno 1577 10. Kal. Decemb. in præsentia D. Contugonij Medici, Obstetricis & aliorum aperta fuit. Nec aliud inter vesicam & intestinum rectum eò loci, vbi vterus à natura positus fuerat, q̃ locus vacuus obseruatus, per quod foramen facile, & absq; obstaculo magnæ nouaculæ manubrium indi & eximi poterat: & per hoc reuera frigus externum ingrediebatur, & dolor colicum causabat, reliquis vicinis partibus cicatrice obductis: nam ab elapso & ablato vtero, neque sanies, neque purulenta aliqua materia emanauerat.

Addere hîc possem id, quod in Turcia Eunuchis accidit, quos Imperatoris cubicularios esse volunt, quibus non solum (vt olim fiebat) testiculi vel atteruntur, vel excinduntur: sed nunc iis tam testiculi, quàm membrum & scortum adimitur: hoc quidem vtero inuerso, illud verò collo vteri simile, cuius tamen col-

lum in sectione Cæsarea non inciditur,
 nec aliquando etiam in excisione vteri
 prolapsi. Verùm si quis obiiciat, non si-
 mile esse, partim quòd id solùm in val-
 dè iuuenibus contingat, Cæsarea verò
 sectio in mulieribus adultis: partim e-
 tiam quòd ibi remedia exquisitissima ad
 id accommodata habeantur. Respondeo,
 idem posse & debere etiam in hoc casu
 fieri, & quod maius est, ætas iuuenilis
 nobis non contrariatur, sed potius adsti-
 pulatur: siquidē censendum videbatur,
 ad talem sectionem minus aptos esse iu-
 uenes, qui castrantur, quàm adultiores,
 ad exemplum eorum, qui calculo vesicæ
 laborant, qui si valdè iuuenes fuerint,
 difficilius sectionem ferent. Et licet ætas
 his iuuenibus castratis Turcicis sit auxi-
 lio, videmus tamen plures iam adultos,
 & etiam senes, qui dum redditi sunt Ma-
 niaci, Melancholici & insani sibi meri-
 plis tam testiculos, quàm virgam exci-
 dere. Quod à me Aureliæ, dum adhuc
 Grammaticæ studerem, obseruatum, in
de Nantes. Episcopi Nannetensis architriclino (tū
 temporis etiam Aureliæ literis operam
 dante) qui ex rabie amoris in profun-
 dum puteum præcipitem se dederat: quo
 loci

loci omnia ea, quæ amoris morbum causabant, exciderat, tanta cum hæmorrhagia, ut facile est colligere, cum ea perseueraret, donec exinde extrahi posset, & tamen mortuus non est. Idem etiam adultioribus, in adulterio deprehensis accidit, licet remedia non fuerint subito adhibita, quod tamen in sectione Cæsarea fieri potest. Verum quilibet in Anatome bene versatus, abundè satis nouit, quid periculi subsit in exsectione earum partium in talibus Eunuchis, qui æquè aut magis periculo mortis subiecti, dum sectio hæc administratur, quàm ex, in quibus sectio Cæsarea adhibetur, in quibus uterus solùm sectione separatur, absque ipsius substantiæ ablatione, licet in illis Epigastrium non lædatur: quod tamen in his, quibus Cæsarea sectio adhibetur, fieri solet.

Præcedentium Historiarum

Epilogus.

CAP. VII.

CUM ergo, ut hanc rem concludamus, uterus in corpore tanto apostemate affici possit, ut aliquando in hypogastrio eum aperire oporteat, (loco longè diffi-

H

ciliori, quàm si in altiori foret loco, & eo loci, ubi sectio fit Cæsarea) & quidem ferro ardente: dein etiam cum adeò magno ulcere affici possit, ut foetus mortuus integer, aut omnia ipsius ossa usque ad intestina pertransire possint, & inde etiam foras, idque putredine, aut abdominis sectione, & nihilominus absq; metu ablatae conceptionis, curetur. Tum etiam cum sectione, vel vstione, vel ligatura absq; morte mulieris penitus eximi possit. Et deniq; cum post longum eiusdem prolapsum, corruptionē & gangrænam, se ipsum separet & corrumpat, absque morte morbove mulieris. Quare ergo vterus pari, aut longè maiori cum confidentia in tali necessitate, arte secari non posset, & etiam remediis adhibitis curari, dein concipere, tū vtero ad definitum à natura tempus gestare, & denique modo naturali parere? si modò aliqua coarctatio, seu coalitio ex causis prædictis originem ducens id non impedierit, quod eò ipsam adigeret, ut rursus sectione hac Cæsarea uti cogeretur: quæ tamen longè facilius, quàm prius administrari posset. Viderur sanè, meritò naturā summè conqueri debere, de Chirurgia, quæ ipsius

ipſius eſt miniſtra, & de magnis ipſius artis Magiſtris, quorum fidei eſt concedita: ſiquidem ipſis ad oculum, & quidem digito huius rei tot exempla oſtendens, quo humano generi ſuccurrant (quod ipſorum eſſe profeſſionis fatentur) & eò quaſi ipſos adigens, vt id tuto, & felici cum ſucceſſu faciant: attamen aut nolunt, aut non audent id aggredi, ſed potius impediunt, aut prohibēt, quantum in ipſis eſt, ne hæc ſectio in uſum ab iis reuocetur, quibus tamen experientia, artium magiſtra, hanc induſtriam & ſolertiam obſervatione maniſeſtiſſimorum effectuum communicauit.

SECTIO V.

Prædictorum magis plebeia & vulgares probationes.

CAP. I.

NERVM ſi quis ſit, aut contradicendi ſtudio ductus, aut veritatis oſor, qui adeò animo ſit obſtinato, vt prædictis ſidem vllam adhibere, neque etiam autoptia, (pigritia ductus) vti velit, neque e-

tiam argumentis & rationibus allegatis acquiescere. Opponam illi eos, qui bruta castrare solent, qui mihi erūt loco Advocatorum sub vlmo (vt est in prouerbio) ipsis verò loco Magistrorum, (vt dici assolet) de villagio, quæ sufficient, vt se ita victos fateri cogantur, vt quod respondeant, non habeant. Ii, quando & equos, & scrofas, & canes castrare solent, ipsis dum adhuc iuuenes sunt, alij quidem eximunt vasa spermatica: alij verò testiculos foemineos: alij denique qui in arte sunt graduati, Vterum penitus extirpant. Sed si huiusmodi bruta sint adultiora, malunt ea dum grauida sunt castrare: tum quia facilius Vterum inueniunt, tum etiam quia de vera castratione postmodum nō dubitant: quibus tamen aliqui, vt q̄ in arte minus sunt exercitati, si vasa spermatica exemerint, contenti esse solent, sibi, quod fieri consuevit, tertio die ipsos foetus reiecturos, certò pollicentes. Alij verò catellos extrahunt, vt vidi, & canes deuorandos obiciunt, quod absque Vteri sectione fieri non potest. Verum qui in hac arte sunt versatissimi, maiorem vteri partem excindunt, vel totum eximunt: aliàs enim

vsu

usu venire aliquando solet, ut æquè depereant & quasi æstro in se masculos incitēt, quod sanè in equis malum est. Hac sectione facta, aliquot solùm punctis vulnus consuunt, & locum pinguedine porcina, oleo nucum, cineribus foci, & aliquando pauca fuligine propter muscas, aut vermes inungūt. Quidam Gasset nomine, in arte castrandi versatissimus, me iubente, duobus magnis canibus, mox catellos exclusuris, tam fortis quàm vterum extraxit. Inter quos alter, cùm dentibus futuram ademisset, & intestina foret prolapsa, aliquot diebus pōst periit: alter verò, cui hoc nō accidit, nunquam à cibo abstinuit, licet quinque catelli vna cum Vtero essent extracti, quem circa inferiorem partem ligauit, quod fieri oportet, cùm Vterum oblongum habeāt, & tam in plures, variásque partes diuisum, quibus cuiuslibet catelli particularis secundina adhæret.

Vidi etiam senem Opilionem, qui circa Autumni finem nil aliud facere solebat, quàm hoc pacto adultas oues quomodocunque prægnantes castrare: partim quòd secus difficulter Hyemem superuixissent, partim etiam quòd melius,

H 3



citius, & minori sumptu ipsas impinguaret, carnes teneriores, sapidiore, & palato gratiores redderet, quàm sit caro veruecis: ita tamen ut ex castratis nulla sit mortua, vel quòd à cibo abstinerit. Et hoc à quolibet videri, & etiam absque periculo, parvisque sumptibus à quouis etià Chirurgo experiri potest: donec in mulieribus gravidis, quæ ad mortem sunt condemnatæ, id experiundi detur occasio: à Magistratu, si fieri possit, gratiam & vitam impetrantes, si ipsas euadere contingat, quod (omni dubio remoto) fiet, si pariendi tempore appropinquante dextrè secentur, & dein diligens ipsarum habeatur ratio. Tum enim & non citius secundina naturaliter à Matrice separatur, sine cuius separatione, opus longè difficilius & periculosius foret: adde quòd tum temporis facilius, quàm antè os Vteri aperitur, quò sanguis, sanies & pus, quæ intus fortè continerentur, effluere possint.

Altera etiam vulgaris probatio.

C A P. II.

AD hanc rem comprobandã, plebeio & vulgari adhuc exemplo utar: proposito

posito nimirum eo, quod mulierculæ rusticæ simili modo facere assolent, non solum dum castrant pullos gallinaceos, aut magnos gallos, quibus euidenter testiculos eximunt: sed etiam gallinis, dum ipsis utrum, aut id quod natura ipsis uteri loco dedit, auferunt, cui adhæret, quo fouetur, quo conseruatur, & nutritur ouum, ex semine galli, si sit fecundus, & gallinæ simul iuncto natum: aut ex sola gallina, si sit sterilis, & inutilis ad incubationem, quæ oua subuentanea dicuntur. Vulnus tamē hoc adeo magnum est, ut aliter satis digitus indici possit, magnum valde proportionē habita cum mulieris incisæ vulnere. Quod si indignum videatur, (quemadmodum & prædicta allegatio brutorum ex villis petita) ut ex stabulis animalium & gallinarum huiusmodi exempla in Medicorum Scholas sacratissimas introducatur: licet ipse Cato, Varro, Palladius, aliique docti, relatu non indignum censuerint: attamen Chirurgis proderit, ut iis, quibus sectionem Cæsaream administraturi sunt, animum addant, quo in tali casu bene sperent, dum ipsis ostendi & exponi potest, id, quod tali sectione in minori

bus animātibus faciunt: quibus tamen nihil sinistri accidit. Quare finem hīc imponam conclusionī affirmatiuæ propositionis in dubium reuocatæ, mihi persuadens abundè satisfactum esse ei, qđ eram pollicitus: nimirum quod ad possibilitatem, veritatem, securitatem, facilitatem, vtilitatem, & frequentissimam necessitatem partus Cæsarei spectat, si modò benè & cum iudicio, debito tempore & loco administretur.

De quibusdam Symptomatibus, quæ dici possunt periculose, huic sectioni accidere posse.

CAP. III.

DVO potissimū sunt Symptomata, quæ hīc metuenda esse, obiici posset: Syncope & Conuulsio, seu Spasmus. Syncope quidē, propter insignem sanguinis effluxum, in quo robur & virtus hominis consistit: si enim sanguis nimius profundatur, summa virium prostratio succedit. Verū cū superius demonstratū sit, in hac sectione boni & laudabilis, vtilisque humoris, nō magnam fieri iacturam, sequitur hoc loco Syncopes

pes aut lipothymias (quæ vulgari nomine animi deliquia dicuntur) periculose non esse metuendas.

Remanet ergo Spasmi aut Conuulsionis metus, qui partium nervosarum ad sua principia est retractio. Symptoma sane periculosum & sæpe lethale: verum hîc, aut nulla, aut parva cõuulsio est metuenda. Eius verò causæ, vt superius in sectione Peritonæi dictum, sunt vel internæ, vel externæ. Interiores in genere duæ sunt, inanitio & repletio. Inanitio quidem, quoad vterum incisum, maior non sit, quàm esse debeat, quàmve fiat in partu naturali: sanguinis enim profusio, quæ sola ferè id causare posset, adeò magna (vti prædictum) non est. Altera verò causa, repletio puta, adhuc minus adest, cum sectione hac, si adesset, per hæmorrhagiam sit ablata, quæ plethoræ est curatio, & præsertim si huius sanguinis inutilis euacuationẽ perpendamus. Inter causas exteriores referri potest frigus externum, partes interiores mulieris incisæ petens, aut sectione oblæsas partes exteriores lædens: verum diligentia industrij & prudentis Chirurghi huic rei facile occurri poterit. Supereft ergo dolor,

lor, qui medio modo se habere, & his binis causis participare videtur, qui ad harum causarum aliquam referri potest.

*Dolorem, qui ex incisione Vteri contingit,
Spasmodum causare non posse: &
quòd Vterus eò loci, ubi sectio
fit, parum sensibili
sit.*

CAP. IV.

CONtra assertam sententiam nostram, obijciunt tristis effectus doloris: multis enim videtur dolorem necessario summum esse debere, in parte adeò nervosa putata, & per consequens sensibili. Verum ad id, ut prius responsum fuit, ita etiamnum respondetur, non dari nervos in Vtero, qui notam mereantur, aut summo sensu sint præditi in profundo & interiore capacitate Vteri, quò loci sectio fit. At si aliqui nervi dentur, ij valde sunt confusi, instar membranæ semicarnosæ, quæ diuersis insensibilibus fibris intertextitur, multaque adsunt vasa, quæ humoribus summè repleta sunt, qui omnium maximè sensus acuitatem, qui adesse posset, obtundunt. Et videtur nervus

pus is, qui ad Vterum descendit, peculiariter Vtero inferuire, propter fœtum potius quàm propter matrem, quo fœtui spiritum animale deferat. nō secus quàm venæ naturalem, & arteriæ vitalem deferunt: si modò spiritus hic animalis canali aut meatu, quemadmodum non sine ratione dubitari potest, opus habeat: etsi sint quibus videatur posse absque tali auxilio eò peruenire, idque irradiatione quadam per alias partes. Verùm Philosophicum hoc est, nec huius tractatus. Mulier igitur cùm pro se hoc sensu & motu nō indigeat, quem nervus ad Vterum defert, id totum, tanquam beneficio nature, Vtero relinquit, vt eo utatur, tam pro se ipso, quàm vt & fœtui, si quando opus sit, communicet. Hinc fortè fit, vt Vterus suos motus habeat, & proportionem habita, proprium etiā sensum, eūque præter mulieris voluntatem: ita vt Vterus alterum dicatur animal. Ea ratione verò fit, vt seipsum extendat, contrahat plus minùsue, prout opus est: ita tamen vt mulieri molestiam non inferat, si modò naturaliter fiat. Sed si ex causa aliqua præternaturali fiat, tūc noxa in aliis partibus corporis magis, q̃

in ipsomet Vtero persentitur, ratione doloris, siue corpus, siue animus afficiatur. Sæpius enim etiam modestissimas mulieres impatientes reddit, ipsarum mores, mētes, turbat, rationemque lædit, siue sit ratiocinando, siue se mouendo, aliove modo. Talis sensus obscuritas, cū non ob aliam, quàm propter hanc causam ea in parte sit, tum etiam vt ea, quæ molestiam pariūt, discernat: idcirco singulari naturæ prouidentia eò loci obtunditur: quod etiam aliarum partium substantiæ propriæ & internæ, quæ tamen Vtero magis principes sunt, contingit: vt Spleni, Renibus, Hepati, Cerebro, Spinali medullæ, imò etiam Cordi, vt ex suprà citatis ex Cornace & Massa pater, vt præteream id, quod Pulmonibus, Venis, Arteriis & Ossibus etiam accidere solet. Sed dicet quis, manifestos tamen dolores persentiri, vti fit in Inflammationibus, Erysipelatibus, &c. Ad hoc respondeo, esse ipsius Vteri os, & eius appendices, ligamentave, quæ dolori, aut voluptati facilè subiecta sint, quæ sanè in sectione nostra nō læduntur. Huic rei fidem facit, (vt dictum fuit) exiguus aut nullus dolor, quem persentiunt, non modo

dò mulieres Cæsareæ, dum in parte altiori inciduntur, sed etiam mulieres eæ, quæ ruptura, causata à prolapsu Vteri, laborant, parum doloris persentiunt; imò sæpius nullum perferunt, quando partes prolapsæ, & quidem duriter, tractantur: dum videlicet Vterum reponere studeamus, quò loci sanè sectio fit Cæsarea, de qua quæstio est.

HISTORIA.

Sententiam meam magis confirmat historia cuiusdam Mulieris, quam ante aliquod tempus vnà cum aliis Medicis & vidí, & ægrotam tractauí, quæ post mortem in præsentia testium fide dignorum aperta fuit: in cuius Vteri carnosæ substantia, (non in cauitate, neq; superficie gibbositateve externa) collectionem adeò admirabilem, tam humorũ, quàm carnosarum excrescentiarum, membranarum, tendonum, ossiculorum item instar gummatum, lupias aliâque corpora diuersæ substantiæ, coloris, odoris, aliarumque qualitatum habebat, vt pondus omnium esset librarum mercatoriarum quadraginta. Et tamen ab annis tribus, & longiore etiam tempore, quo tempo-

ris spatia materia eò loci erat contenta, nullum dolorem, qui alicuius esset momenti, persenserat, licet tantæ sordes, tantæque moles in Vtero continerentur: tamen toto illo tempore, tam naturales & vitales, quàm animales functiones perfectas & integras habuit.


Verùm posito & concessio eo, quod propter huius partis membranosæ læsionem Spasmus fieri deberet, (qui rarò, nisi à punctura causatur, & tamē sectione partis punctione læsæ curatur) attamen cùm partem secamus id impediri, imò ipsum Spasmodum curare deberet. Præterea etiam licet alterutrum Symptoma, Convulsio scilicet aut Syncope, propter sectionem hanc accideret, aut propter aliam quampiam causam, (quæ etiam in partu naturali sæpius contingere solent, ubi tamen sectio nulla fit) attamen occurrere posset iisdem remediis, quibus auxilio esse solemus iis, quæ naturaliter enuntur: utpote in Syncope, diuersis corroborantibus: in convulsionibus verò fortibus conuenientibus. Quorum remedium materia, forma, & administratio alibi proponi debet.

SECTIO

SECTIO VI.

Fœcunditatem, post sectionem Cæsaream remanere, probatur.

CAPVT I.



TS I multæ ex propositis historiis mulierum, quarum Vterus diuersimodè læsus erat, tam sectione Cæsarea, quàm longè grauiori modo, satis testatum faciant (cùm postmodum Vtero gestarint) fœcunditatem post huiusmodi operationes Chirurgicas integrè reseruari. Vi deo tamē nihilominus fore aliquos, qui eo non sint futuri contenti, qui id fieri non posse duabus rationibus non leuibus probaturi sunt. Vna est, Vteri intemperies, quam ex prædicto largo sanguinis profluuiō prouenire præsupponent. Verū huic rationi iam respōsum, dum ostendimus, quòd licet hæmorrhagia foret magna, quæ tamen non est, eiusmodi tamen sanguinē inutilem esse, & per consequens ipsius præsentiam naturæ optimè dispositæ molestam, vti vice versa ipsius profusio valdè utilis est. Quoad alteram rationem, solutionem continui,

iam ostensum eam parvam esse, post Vteri contractionem, dum infans inde extractus est.

Cicatricem, quæ post vulnus uteri incisi coalitum remanet, fecunditatem non impedire.

CAP. II.

VERùm cōtra solutionem datam obitici potest: quòd si pars incisa adeò, ut diximus, se coarctauerit, tum & cicatricem parvam habebit, & eam valdè crassam, duram, & difficulter cedentem, ob multiplices fibras, quæ obscurè hinc inde intertexuntur: quæ omnes huiusmodi cicatrice firmiter colligantur. Quare uterus, inquiunt illi, eò loci satis dilatarì non poterit, ad commodè fœtum inlatum collocandum, & æqualiter continendum: & sic cicatrix hæc, ut ipsis videtur, aut conceptionem, aut gestationē, aut fœtus auctiōem, aut robur Vteri, quò minus valeat in partu fœtum expellere, qui tū ex omnibus partibus æqualiter dilatafi debet, impedire poterit. Sed etiā quod peius est, poterit cicatrix hæc (inquiunt) in perpetuū causare malum
illud

illud quod Hippoc. 2. de Mor. mul. Con-
 tortionem matricensem vocat, quæ neces-
 sariò sterilitatem causat. Verùm quò ad
 primum, responderi potest, si consolida-
 tio ex prima intentione facta sit (de quo
 problematicè alibi fuit disputatum) nul-
 la aderit cicatrix, quæ partem illam læsam,
 magis quàm alteram possit breuiorem
 reddere. At si sit ex intentione secunda,
 & adsit cicatrix, vterus sufficienter ad-
 huc se dilatabit, ad bene continendum
 infantem, eò quòd reliquum vteri facilè
 se dilatabit. Quòd si quis instet, etsi hoc
 detur, tamen cum vterus magis in vnum
 quàm alterum latus detrahatur, propter
 cicatricis duritiem futurum ut & fœtus
 vnà in id latus adducatur, & hoc pacto
 deformis reddetur. Verùm nego ego, quod
 propterea malum aliquod matri contin-
 gat, neque etiam infanti aliqua deformi-
 tas: quippe quod ex suprà dictis infan-
 tibus, qui post talem sectionem concepti,
 & nati fuere, nullus fuerit, neque gibbo-
 sus, nec claudus, nec mæcus, aut alio mo-
 do deformis. Ruptura enim, quæ in mu-
 lieribus sectis (bono omine) remanet, cõ-
 ducit infanti ut melius locetur, seque di-
 latet, & extendat, neque vllò modo qua-

si coactus detinetur, vt in omnibus ob-
 seruatum fuit: nec etiam aliqua ex ma-
 tribus mali aliquid perpeffa est. Addo e-
 tiam, foetum figurā & conformationem
 suam nō ab Vtero accipere, tanquam ex
 proplastice, quidquid ab aliis in contra-
 rium hac de re disputatum fuerit, sed so-
 lum ipsi foetui est conuenientis domici-
 lij, hypocausti & penarij instar, nō secus
 quā terra grano frumenti, aliisq; semī-
 nibus: syluestris aliāue arbor, ipsi taleæ,
 quæ inseritur: calor item foetrix ouo ad
 generationem membrorum ex ipsius al-
 bumine. Virtus enim foetum in vtero in-
 formans, semini tam virili quā mulie-
 bri inclusa, tacitè insita & abscondita est,
 (quemadmodum longè exactius alio in
 loco à nobis fuit disputatum) quamuis
 etiam vterus ratione aliquarum qualita-
 tum multū adiuuet, si modò vera est Hip-
 pocratis sentētia, qua statuitur mares vt
 plurimum in dextra, foeminas verò in si-
 nistra vteri parte fieri. Quare ergo non
 posset commodè vnum continere, cum
 duo etiam locū habere possint? vel cur
 nō duos, cum sæpius tres contineat? præ-
 fertim cum aliquando absque gemellis
 vnā cum foetu Mola, aut aliud onus gra-
 uius

uius quàm sit fœtus cum omnibus suis inuolucris, contineatur; nec tamen animaduertatur, q̃ aut noxam infanti intulerit, aut q̃ valdè molestum matri fuerit. Quò ad vltimum argumentum, quod ex autoritate Hippocr. est desumptū, quod erat de Contortione vteri, quæ ṽt plurimum ob attritionem, in difficili partu factam, aut ex casu, aut ex imbecillitate naturali, vel accidentaria, & resolutione alterius lateris, aut ex conuulsione, ratione plenitudinis alterius partis orta accidit: clarum est quòd cum hoc nihil commune habeat: propter cicatricem enim hac in parte nihil debilitatus est, neque relaxatus (sed contrà potius corroborari deberet) neq; in alteram partem conuulsus (ṽt iam dictum) est: quare argumentum ipsorum nihil concludit.

Alter probandi modus, quo fecunditatem cicatrice non impediri ostenditur: argumento ducto à forti ad debile, quod consistit in assertionem noui Paradoxi, quod tamen verum esse, & experientia & rationibus Medicis comprobatur.

CAP. III.

CVM argumenta hæc, quæ allata fuere, ab experientia & rationibus sint petita, satisfacere quidē deberēt: verū vnum adhuc confirmationis gratia addam: cū Pessarīum, satis quidē magnū, latum & crassum, Vtero inseri possit, & in fundo ipsius vteri prius prolapsi, sed dein repositi, retentum (quo vterum in corpore contineat) nec conceptum, nec gestationem, nec etiam partum (quod & historiis & rationibus me probaturum spero) impediāt: certē nec etiam cicatrix horum quicquam causare debet. Quod ut æquo animo suscipias, amice Lector, rogo, neue hoc primo statim intuitu absurdum tibi videatur, tanquā omnium opinionibus contrarium, & præsertim ut præcipuis autoribus, tam veteribus, quàm neotericis contradicēs, cum quorum discipulorum ne minimo quidem me conferre volo, ut sententiæ meæ applaudam, nisi quatenus & experientiis, & auxilio rationum veritate inexpugnabili roboratur. Quibus confidens, postquam diu restitisssem, hæc proponere ausus sum, tam ad præcedentium confirmationem, quàm ratione ea, quod vero Medico

dico curæ esse debet, vt bona fide in com-
 munem hominum vtilitatē conferat, id
 quod nouum, & vero consentaneum in
 praxi obseruauit, in remediorum admi-
 nistratione, quæ illi solenni iuramento
 in bonum publicum fuere communica-
 ta. Hac enim ratione factum, vt nimirum
 ex additionibus talibus, artes ad eam
 perfectionem, quam habet, peruenerint.
 Primò ergo diligenter ex suprà citatis hi-
 storiis, rationibus & autoritatibus nota-
 re oportet, vterum modò magis, modò
 minus prolabi, tam propter causas exter-
 nas & violentas, quàm internas, & id vel
 ratione humorum, aut sine humoribus:
 quæ vteri ligamēta labefactant, & resol-
 uunt, aut ipsius orificium & ceruicem di-
 latant. Hoc enim non solùm ex solo ali-
 quo tumore, aut ipsius solidi corporis
 plenitudine, quòd potius vterum in cor-
 pore retineret, quàm quòd propelleret,
 accidere solet. Quod inde manifestum
 fit, cùm minus prolabatur & relaxetur,
 menstruis instantibus (quo tamen tem-
 pore succulentus, plenus, & grauis est)
 aut tempore gestationis, quàm fiat post
 fluxum menstruorum, aut post puerpe-
 rium: propterea quòd menstruum, ante-

quàm profluat, tumidum reddit, aut infans, quia antequam in lucem edatur, vterum implet: hæc, ne procidat per orificium proprium & ceruicem tum nimis angustam, quàm vt vterus adeò dilatatus prolabi possit, impediunt, ita vt tum temporis mulier quasi curata videatur. Verùm cum non diu in corpore vterus per se remaneat, Medicus arte auxilium fert, vt Hippoc. lib. de Morb. mul. docet. Sed & experientia noua ostendit, præ cæteris remediis, cõferre certialicuius Pessarij insertionem, quod fortè casu inuentum, aut potius (meo quidem iudicio) ab industrio Medico, qui id quod natura tempore gestationis facit, aut instantibus menstruis imitaturus erat: & hoc quo impediatur, ne hæc domus, vterus nimirum (vt sic loquar) per proprium ostium egrediatur. Pessarium verò hoc, non simile est iis, quæ solùm in ceruicem vteri inseruntur, propter varios & diuersos vteri morbos, quos aliquibus peculiari nomine Lemniscos vocare placuit: sed & commodum & idoneum est, ad indendum & retinendum in propria ipsius vteri concauitate. Pessi, aut pessarij, aut Emmoti nomen, aliundè mutuantes, ipsi tribui-

tribuimus (aliis nominibus deficientibus) cum de eo in specie ab antiquis nil fuerit traditum. Qui voluerit, Syphonem (Gallis *soupompe* dictum) nominare poterit, ad similitudinem instrumentorum hydraulicorum, quæ à Gallis *pompes* nominantur, cum quibus in usu similitudinem aliquam habet. Illa enim vterum in corpore retinet, quemadmodum hic ipsam aquam in hydraulo.

De Pessarij huius inuentione, & diuersitate.

CAP. IV.

QUod à veteribus de hoc pessario nihil vnquam perfecte traditum fuerit, mirum non est, cum infinita sint leuia & commoda auxilia, quæ à mulieribus experientia quotidiana inueniuntur: quæ non minus ingeniosæ sunt in morborum propriorum auxiliis adinueniendis, quam natura verecundatur viris morbos suos exponere, qui inter ipsas secreti habentur, ita ut plerique ex ipsarum Medicis ignorent: credo ego, apud ipsas hoc Pessarium diu loco secreti habitum fuisse. Verum hoc tempore Chirurgorum aliqui hac de re, sed diuersimodè libros com-

scribunt, & lectiones habent: nimirum quoad materiam, ex qua hæc Pessaria facta sunt, quoad figuram, & quoad usum. Aliqui enim ex sola cera, alij ex argento, aut auro excavato, alij ex subere cera tecto conficiunt. Præterea aliqui figura rotunda, alij ouali, alij triangulari, aut quadrangulari, inæqualibus tamen lateribus, aut in angulos obtusos formant: alij forma cordis depressi, alij ex rotunditate oblonga & obtusa figurant: alij denique rotundos in latitudinem, quæ in medio aliquando, aliquando verò non perforata sint, parant. Sic etiam multi indentes, funiculum ad alterum extremum alligant, quò commodius quando voluerint extrahere, possint: alij absque funiculo indunt, ita tamen ut sine magna molestia, quando visum fuerit, extrahere possint, non secus quam si funiculus alligatus esset. Sunt verò alij, qui nunquam eximunt, quale est hoc pessarium, de quo sermo est, quod quando in interiori vteri capacitae est, tamen nihilominus mulieres viris cōcumbere possunt, etiam maritis, si modò ipsæ velint, ignorantibus: siquidem non solum locus laxus & amplius est, in quo continetur,

tur, sed etiam figura æqualis & polita est. Nec impedit etiam quò minus mulier concipiat, eundem conceptum retineat, vtero gerat, & pariat. Quod sanè admirandum auxilium, tutumq; est, quo tanto malo præcipitationis vteri occurrì potest, ita vt sæpius malum omnimodè curet, postquam aliquo temporis spatio in corpore gestauère, ita vt eo opus postmodum non habeant. Imò etiam si mulieres prius propter vteri præcipitationem concipere non potuère, vt concipiant auxilio est. Si enim Epíploon os vteri comprimens, vt 5. Aphor. 46. Hippocrates habet, conceptū impedit, quanto magis tantus vteri prolapsus id impediet, qui in seipsum relaxatur, quasi seipsum oppressurus, nisi hoc modo in his occurreretur: quemadmodum in aliis fit, corpus emaciando, quod sæpius diæta conuenienti à nobis præstatur.



138 FRANC. ROVSSETI DE
HISTORIAE ALIQVOT
CIRCA HOC PRO-
POSITVM.

*Paradoxum, quo ostenditur etiamsi mu-
lieres Pessarium tale in Vteri corpore fe-
rant, nihilominus tamen ipsas & conci-
pere, & Vtero ad præfinitum à
natura tempus ge-
stare.*

C A P. V.

en Puissaye. CVM iampridem mihi recitatum fq
ret Puissaye mulierem quandam es-
se, quæ gestando hoc Pessarium, plures
habuerit liberos: & postmodum etiam
ab Obstetrice Picarda, Preignon nomi-
ne, (quæ à magnatibus propter insignē
cius in arte & experientiam & dexteri-
tatem summè expetebatur) eadem mihi
essent narrata, nunquam tamen vt nec &
alij, fidē adhibere volui. Interim tamen
non desij pluribus in locis ita diligenter
hoc perquirere, donec tandem quod vo-
lui cognouerim, præsertim cum nuper
etiam huius medicamenti effectum vi-
derim, quod prius mihi non minus vi-
sum incredibile, quàm olim fuit etiam
doctissi-

doctissimis sub zona torrida habitatio, quæ tamen non ita pridem opera quorundam Nautarum nobis exposita & patefacta fuit, idque contra celeberrimorum, qui vnquam fuere, tam Mathematicorum, quàm Cosmographorum scripta doctissima, quæ indubitanter pro veris habebantur. Quare vt etiã pessarium hoc cognoscerem, elapsis diebus Verno *à Verneul* *près Senlis.* liij prope Senlicetum & in vicinia anno 1579. omnibus modis laboraui, ita vt & viderim & allocutus fuerim, & familiariter etiam cum pluribus mulierculis contulerim, quæ tali pessario vsæ fuere, & adhuc vtuntur, quarum pleræque nomen celari volunt: verùm eæ, de quibus in sequentibus erit sermo, hoc tanquam omnibus vicinis notum non tegunt. Aliquæ etiam ipsarum sunt, quarum ne quidem mariti ipsas pessario vtî sciunt: propterea harum etiam nomen subtere oportet.

Clementia Heraudie, dicta Finet, Geruasij du Mont opificis vxor, (quæ iam olim Gisortio Normandiæ Vernolium *de Gisors en* *Normandie.* cōcessit) Ioannis Herauldie Finet dicti, olim Gisortij Tonsoris filia, cū valdè iuuenca nupta fuisset, ante decimūtertium

ætatis annum prolem habuit, quæ res
 fortè in causa fuit, cur vteri procidentia
 laborârit. Ex Galeni enim sententia, li-
 bro de Natural. facult. sæpius ob fortem
 conatum in partu vterus prolabitur.
 Quare cùm ab ipsa vterus, etsi rursus cor-
 pori inderetur, contineri non posset, pa-
 ter ipsius, qui Chirurgus erat, pessarium
 tale illi præparauit, qualia ipsa nunc pa-
 rat, & aliis mulieribus, quæ eo opus ha-
 bent, exhibet; cuius nomine sæpius tam
 à vicinis, quàm ab iis, quæ in locis remo-
 tis habitant, consulitur. Hæc dum pessa-
 rium tale ferret, tertiò concepit, vtero ge-
 stauit, & peperit: quamprimum enim es-
 set enixa, rursus vtero indebat, eo solùm
 absterfo, & butyro oblinito, nec alio no-
 uo utebatur. Ita ut iam ab annis quadra-
 ginta & ultra, vno eodémque pessario so-
 lùm vsa sit, absq; vlla ipsius pessarij cor-
 ruptione, aut ipsius suberis putrefactio-
 ne. Dein etiam eius loci, vicinæque Ob-
 stetrices (præsertim verò la Mineuse no-
 mine) constanter mihi affirmârunt, ipsas
 iam pridem plurimis mulieribus in par-
 tu adfuisse, quibus prædicta Clementia,
 pessaria dederat: inter cæteras autem mi-
 hi nōminabant mulierem la Nurette di-
 ctam,

etiam, quæ filium ante annos nouem erat
 enixa, qui mihi ostensus fuit: cui, cum
 ante exclusum foetum, pessarium proci-
 disset, ipsa quarto à partu die, cum vte-
 rus rursus prolapsus foret, denuò indi-
 dit, quod postmodum semper ad mortem
 usque absque molestia, in vtero reserua-
 uit. Præterea tale etiam pessarium ab ea-
 dem Vernolij Geneuefæ Salantin nomi-
 ne, adhibitum fuit, cui in primo matri-
 monio ob difficilem partum vterus pro-
 ciderat. Quod cum per annos quatuor
 gestasset, interim licet grauida facta, pes-
 sarium tamen hoc toto gestationis tem-
 pore etiam tulit, quod tribus ante par-
 tum septimanis sponte prolapsum (quod
 sanè propter eam quæ sequitur de reclu-
 sione oris vteri in grauidis disputatio-
 nem, notatu dignissimum est) ita tamen
 ut idcirco ante præfinitum à natura tem-
 pus, enixa non fuerit. Infans trium nunc
 annorum est, nec hætenus ipsius mater
 pessario opus habuit, cum ab vteri prola-
 psu rectè fuerit curata: ita ut ab eo tem-
 pore rursus filios gemellos adhuc viuen-
 tes pepererit, quod sanè multis de causis
 (quas breuitatis habita ratione omitto)
 memorabile est.

*Confirmatio predictorum, que rationi-
bus aliquot, contraria soluenti-
bus argumenta, ab-
soluitur.*

CAP. VI.

CVM scripserim pessarium hoc in in-
teriorem vteri cauitatē inferendum
esse, doctorum aliqui sunt, qui contra-
rium sentiunt, sentientes pessarium in
collum vteri solūm inseri, nec posse vltē-
rius quā ad os vteri immitti. Verūm i-
psorum obiectionibus (quæ potius ab
autoritatibus, vel præiudicio aliquo, quā
ex rationibus solidis dependent) respon-
dendum, quibus solutis clarē ostende-
mus, non solū possibile, sed etiam ne-
cessarium esse, vt ad pessarium hoc in-
dendum os vteri recludatur; quod dua-
bus rationibus absoluere possemus. Pri-
mō quidem Problemate, iam pridem à
quibusdam studiosis doctissimis, primū
quidem in fine cuiusdā Anatomies, dein
etiam Monspeßuli in disputatione, vt
vocāt Quodlibetaria, proposito. Quod
quidem tametsi rationibus haud euerti
possit (remoto omni præiudicio) ne ta-
men aliquorum lectorum aures delica-
tas

tas offendamus, in aliam disputatio. m
 problema hoc reiiciam, quod in Scho-
 lis, potissimum verò Anatomicis, com-
 modius exponi poterit, subiecti & ter-
 minorum quibus vti oportet ratione ha-
 bita. Quare ad alteram rationem, quæ
 magis seria est, descendam, quæ talis est:

Si totus vterus in modum sacci inuer-
 sus, (vt contra Græcos ex Arabibus pro-
 bauimus) ex interiore corporis parte,
 extrorsum prolabi potest, imò sæpius vl-
 tra medium femorum, & mole duos pu-
 gnos excedente, tum oportet necessariò,
 vt hoc magnum, crassum & oblongum
 vteri corpus, per ipsius os transierit, &
 rursus etiam absque magna difficultate
 pertranseat, quando is in naturalem lo-
 cum reponitur, & id antequam pessarium,
 de quo agimus, indatur: quod tamen q̃
 fit ipsius vteri corpus, longè minus est.
 Quare ergo non subito & tum etiã quan-
 do recenter os vteri dilatatum est, facile
 pessarium hoc inderetur: quod cum se-
 mel inditum est, in vtero ita se disponit,
 vt nec ipsum, nec etiam vterus excidat, si
 modò pessarium vt conuenit sit paratũ.

Quare amplius non miror, si mulieres
 iis pessariis vtentes, quæ multi Chirur-

gi rem non intelligentes, suo more parata & effigiata adhibent, & in collum vteri, nō autem in capacitatem indunt, parum, aut nihil omninō fructus perferant: sed econtrā sæpius plus q̄ prius molestiæ perferūt, tam quoad dolorem, quàm impedimenta in actionibus muniisque domesticis. Adde etiam, quòd potius vteri prolapsum causant, quàm quòd retineant, cū vteri collum, per quod delabi debet, dilatatum retineant.

*Corollario alia instantia, quæ contra oris
vteri in mulieribus gravidis aper-
tionem adferri potest,
soluitur.*

CAP. VII.

CUM hanc disputationem de apertione oris vteri, vsque ad mulieres gravidas perduxerimus, (quod sanè hodierna die paradoxum est, vt sunt & alia plura) paucis pro eius probatione, rationem eam quæ sequitur, subiungemus. Quæ sanè ratio sententiæ Hippocrateæ correspondet, licet Aphorismo 51 lib. 5. nobis contrarius esse videatur: quo in Aphorismo perspicuis verbis exponit:

Os

Os vteri in iis, quæ vterū ferunt, comprimi. quod
 sanè nō de adeò exquisita & perfecta oc-
 clusione intelligi debet, quemadmodū
 Galenus intellexisse videtur, qui inquit:
 à conceptu vsque ad tempus ipsius par-
 tus, ita occlusum esse os vteri, vt ne qui-
 dem apex alicuius acus indi possit. Quæ
 sanè opinio introducta & per manus tra-
 dita fuit: siquidem primo intuitu vide-
 tur, quòd si secus se haberet, futurum vt
 semen statim elaberetur: quod tamen e-
 tiam absque hac perfecta occlusionē ab
 vtero expetitur, recipitur, agglutinatur,
 & retinetur, nisi ob violentam concus-
 sionem effluat, vti ei ancillæ, de qua Hip-
 pocrates, accidit. Vocabulum hoc Græ-
 cum σύλληψις, aut Latinū conceptio, causa
 fortè fuit huius opinionis, quasi signifi-
 cans vterum necessariò vndiquaque sper-
 ma complecti debere. Verū Galenus
 in Commen.aphor. i. lib. 6. in voce Lien-
 teriæ, satis ostendit, sæpius rem non ta-
 lem esse, qualem vocabulum vsu rece-
 ptum denotare videtur. Sed præter in-
 stantiam, circa hoc Pessarium ab ἀντοψία
 desumptam: contrarium tamen huic sen-
 tentiæ multis naturæ effectibus ostendi
 potest, cui ex artis decreto lex nulla sta-

K

tui potest: inter quæ sunt: primò quidẽ Superfoetationes, de quibus adeò multa scripta fuere, siue sint naturales, quando nimirum foetus vnus post alterũ concipitur, vti probabimus: siue non naturales, sub quibus omnis generis moles informes, molas item & irritos inutilẽsq; conceptus colloco: ex quibus superfoetationibus nulla vnquam fieret, si os vteri non recluderetur, vti multi sentiunt. Verũ quidem est receptam opinionem esse, rudiores molas ex solo spermate muliebri oriri. Hoc si verum esset, tum argumentum nostrum hic locum non haberet. Hæc enim ouis subuentaneis, ouis nimirum gallinarum sine gallo degentium assimilatur, quæ oua licet sint sterilia, nihilominus tamẽ forma, figura & sapore, cum aliis conueniunt. Sed eiusmodi irriti & inutiles conceptus, cum vero Embryone foetũve nihil similitudinis habent. Verũ cum talia rarò aliis quàm mulieribus maritatis, aut viro concumbentibus, grauidis, aut nõ grauidis accidunt, idcirco multi sunt, qui contrarium sentiunt, statuentes semen virile imperfectum, & facultate formandi foetum priuatum cum semine muliebri concurrere.

rere. Cuius causa ab utero attrahitur, qui eum retinet, & sanguine menstruo alit, quod non faceret, si muliebri solum semen adesset, absque virili, quod tamen uterus appetit. Qui huius opinionis sunt, parum certe aliquarum puellarum aut monialium, aut viduarum honorem curant, quibus nescio quomodo talia accidere solent: quare ipsorum sententiae esse nolo, & propter ipsas à proposito (in praesens) desistam. Quoad naturales superfœtationes, hoc verum esse, quod duo infantes, dierum aliquot interiecto numero, unus post alterum conceptus sit, sufficienter ostendunt, quod iam pridem Pithuueris semel observavi, in muliere quadam, quæ tribus septimanis post priorē partum (e cuius puerperio iam erat egressa) secundum infantem enixa est. Hanc rem, historia Dominae de Malorthye, quæ omnibus nota est, comprobat, quæ ita se habet.

SVPERFOETATIONIS

historia.

Domina Maria è Novo castro, cū^{de Neuchâ-} de Neuchâ-
ex Barone Cremalliensi nouē libe-^{siet} siet
de Cremaille

K 2

à Chasteau-
nierry.

ros suscepisset, secundo contracto matrimonio cum D. de Malorthye, ex quo grauida reddita, tres filios vnà vtero gestauit: hinc factum (vt cùm parua sit statura, sed tamen fertilis) vt adeò fuerit grauida, quòd circiter quintum mensem ex filiis vnum tantum sit enixa. Quare cùm existimaret D. Theobaldus (vt & ipsa) celebris Medicus ad Castrum Theodorici in Campania, alios duos filios, nihil aliud quàm lochia retenta esse, aut molas, irritòsve conceptus, ipsi post octauū ab abortu diem, forte medicamentum, ad hæc expurganda aptum exhibuit, qđ sanè abortum secundum duorum aliorum filiorum causauit: qui adeò integri & viuaces fuere, vt ipsemet Medicus, quem consilij sui poenitebat, testaretur, nisi medicamentum purgans vim ipsis intulisset, licet prius abortū fuisset passa, quod tamen absque dubio ad rectam peruenissent maturitatem. Ab illo tempore sepius grauida facta, & ferè semper gemellos tulit, modò pueros, modò puellas. Verùm dum semel vtero gestaret, à cuiusdam canis vehementi impulsu adeò læsa fuit, vt statim malè habens non dubitarit quin apud eā fœtus esset mor-

tuus

tuus: quare quindecim dierum spatio
 post, duos infantes peperit, quorum al-
 ter mortuus erat: quem diu antè mor-
 tuum fuisse manifestè erat colligere: al-
 ter verò viuebat, sed adeò debilis, pro-
 pter malum à fratre gemello communi-
 catum, ita vt triduo integro sugere non
 potuerit: diligenti tamen cura factum,
 vt indies melius se haberet, qui nunc an-
 norum est octodecim, & Regis Galliarū
 assecla. Quas Historias, ex epistola qua-
 dam, quam habeo, à D. de Malorthye, ad
 Dominā Bellouocam Nangiensem scri- *de Beauuañ*
 pta desumpsi, in qua omnia in specie de- *de Nangi.*
 ducit, quàmque manu propria subsigna-
 uit, postquam à D. Seureo docto & exer-
 citato Medico Melodunensi diu preci- *à Melun.*
 bus sollicitatus fuisset: eum enim roga-
 ram, vt hoc officij amico, idq; in bonum
 publicum, præstaret. Infantium hoc mo-
 do nascentium, postremum natu Roma-
 ni, vt monet Plinius, Vopiscum cogno-
 minem fecerunt: quam vocem ex Græco
 ortā interpretor, quasi *ὁ δὲ ὅπτα κούμην*,
 infans post natus.

Proposito nostro conueniunt super-
 foetationes, nō solūm si infans vnus post
 alterum nascatur, sed etiam si simul con-

cepti, diuerso tamen tempore lucem hanc aspiciant, vt ex Aphor. 37. & 38. lib. 5. Aphorismorum Hippocratis colligere est, in quorum primo inquit: *Si mulier vterum gerenti mammae repente graciles fiant, abortit.* In altero verò: *Mulieri geminos gerenti, si altera mamma fiat gracilis, alterum abortit: & si quidem dextra mamma gracilis fiat, matrem: si verò sinistra, foeminam.* Hinc manifestum euadit, quòd licet alter foetus matrem in grauiditate conseruet, vt non abortiat, nihilominus tamen alterum abortu reiciat: & sic consequenter ex ipsiusmet Hippocratis sententia liquet, os vteri etiam in grauidis, imò summè recludi, quo foetus mortuum tanquam rem, quæ sibi ponderi & molestiæ est, reiciat: ita tamē vt viuus adhuc foetus, qui non in lucem prodit, sed reseruatur, nil molestiæ perferat.

Dein, plures grauidæ sunt, quæ tam absque propria, quàm ipsius foetus molestia, copioso fluore vterino phlegmatico, menstruisque albis laborant: quæ omnia aliundè quàm ex cauitate vteri profluere nequeunt, quidquid in diuersum ab aliis dicatur. Etsi enim concedendum foret, quod tamen minimè necessum,

sum, sanguinem menstruum in grauidis ex venis cruralibus profluere, & ex iis venis, quæ collo vteri sunt insertæ, quæ solùm sanguinem continent: dici tamen non potest eiusmodi humores & excrementa, quæ nullo modo sanguinea, sed cruda, viscosa, crassa, interdum putrida, pallida, viridia, sed sæpius decolora sunt, in tanta copia, aliunde quæ ex quadam ampla concauitate, vbi humores hi collecti fuere, promanare: non autem ex quopiam loco, qui perpetuo fluxui obnoxius sit, vt est collum vteri, quod in recipiendis, & statim reiiciendis excrementis vteri pari munere fungitur cum naribus, quæ crassum, aut copiosum mucus statim euacuant, qui primò collectus, & longo tempore in superioribus concauitatibus, supra ossa Ethmoidea infusus fuit. Necessariò enim oportet, vt eiusmodi vteri excrementa, si talia sint, qualia ex vteri collo promanare conspiciuntur, primo fuerint recepta aut genita, diuque in quadam earum partium concauitate retenta, quæ alia esse non potest, quæ ipsius vteri capacitas, ex qua cum hæc excrementa promanant, tam in iis quæ grauidæ sunt, quæ non sunt, si modò

excerni debeant, vt ipsius os recludatur oportet.

Verùm licet eiusmodi excremēta, aut fluores vterini vnus aut alterius superfœtationis, conceptionem præcesserint, aut eam sint secuti, nihilominus tamen hoc ad sententiæ nostræ confirmationem facit. Si enim præcesserint, æquè admiratione dignum, quomodo postmodum concipere potuerit, quàm mirum videtur fieri posse conceptum supra cicatricem aut pessarium, ex subere cera obducto, & bene composito: quod tamen fieri posse, statuimus. Contrà verò huiusmodi molæ, aut fluores menstruorum alborum, quemadmodum etiam superfœtationes, si post conceptum superuenēre, tum os vteri grauidę recludi oportet, quo fluxui eiusmodi humorum exitus detur, quemadmodum etiā ad receptionē noui spermatis, alio iā prius recepto.

Tum, hoc inde etiam apparet, si plurimorum sententiam magis verisimilem sectemur, quæ est de emissionē spermatis grauidarum viris concumbentium, in quibus non secus quàm prius, sperma ē vasis in vterum excludetur, vteri que colūm lubricum reddit, quod sine oris vteri

teri reclusionē fieri nequit.

Quartò, norandum, grauidarum aliquas, præsertim valdè sanguineas, ut quotidie obseruare licet, & qua de re etiam plures scripsere, ordinariè menstruas suas purgationes, & eas copiosas, habere: absque tamen foetus nocumēto, ut qui plus alimenti, quàm indigeat, habeat: ratione etiam cuius sæpius sanguinem venæ sectione ipsis detrahimus, ad grauiora symptomata, non solum ipsius plethoræ, sed etiam cacochymia, quæ breui subsequitur, euitanda. Hippocratis tamen tempore periculosum hoc erat, quia eius ætate copiosior sanguis, quàm nostro tempore fiat, mittebatur. Hanc ob causam 5. Aphor. 30. ut à venæ sectione abstinēatur, monet. Veruntamē sanguis hic menstruus grauidarū, etiam ex ipsius vteri capacitate promanat (ut alibi à nobis fuit ostensum) & quidem ex aliquorum acetabulorum reueratione, quibus foetus per secundinam non aligatur: si enim ex his venis efflueret, abortus sequeretur, quod tamē non fit: sanguis autem hic profluens, non magis foetui suis membranis inuoluto molestiam infert, quàm suprà dicta excremēta alba,

aut putrida faciant. Attamen tum fortè
(non tamen necessariò) natura immédia-
tè per venas aliquas ipsius colli vteri, &
etiam aliquādo per nares & per hæmor-
rhoïdes se exonerat: quæ tamen loca mi-
nus quàm sit ipsius vteri collum sunt ac-
commoda, imò etiam quod sæpè obser-
uauit, vomitu sanguineo, qui tempore
menstruis præfinito fiebat, quæ res in ta-
libus naturæ reuulsionibus admiranda,
non tamen arte medica imitanda.

Quinto, rationis loco, Analogia vte-
mur & similitudine inter vterum natu-
raliter in corpore retentum, & huius ma-
li curationē, auxiliūq; artificiale, qđ
mouemus. Mulier enim quæ solū post
menstruorum fluxum, & cum vtero non
gestaret, vteri procidentia diuexabatur,
se curatam, aut saltem subleuatam per-
sentit, cum grauida est, aut quando tem-
pus menstruorum instat. In primo ho-
rum duorum casuum, infans qui prohi-
bet ne procidat (vt facit etiā pessarium)
non in collo, sed in concauitate vteri se-
dem habet. Quò ad alterum, certum est
sanguinem menstruum, dum vterum in-
tumescere facit, (quod & pessarium eo
dilatando facit) ne elabatur, parī pacto
prohi-

prohibere, cum materia, internæ ipsius
vteri substantiæ, non autem collo ipsius
sit imbibita.

Sextò, melius adhuc exinde hoc appa-
ret, quòd viri propter pessarium hoc sa-
tis magnum (quando semel vtero indi-
tum est, & inde non retractum) non in-
termittant frequenter cum mulieribus
conuersari, & quidē absq; noxa aut im-
pulsu, imò vt etiam maritos lateat, si mo-
dò mulieres ipsos celare velint. Quòd si
solum in vteri collum pessarium esset in-
ditum, propter ipsius magnitudinem i-
psos latere non posset. Quare necessariò
sequitur, vt in concauitate vteri tale pes-
sarium contineatur.

*Pessarium non impedire, quin aptè semen
& recipiatur, & vtero rectè
adhareat.*

CAP. VIII.

VERùm metuendum non est, eiusmodi pessarium (si modò vtì oportet,
formatū & compositū fuerit) impedire
posse, quò min⁹ sperma viri & mulieris,
vtì conuenit, recipiatur, agglutinetur, &
parietibus internis ipsius vteri adæreat,

quod & alterū in Medicina Paradoxum
 esse videtur, sed tamen cum Hippoc. do-
 ctrina conueniens. Si enim tale semē re-
 ceptum, vni solū ipsius vteri parti ad-
 hæreat, & ab ea alimentum sumat, satis
 est, modò pro ipsius conseruatione & nu-
 tritione, sufficiētia acetabula adsint, nec
 magis omnibus opus habet, quā infans
 duabus mamillis, si vna sufficienter ali-
 menta (vt sæpè accidit) ministret. Qua-
 re pessarium hoc ex subere paratum, nō
 impediet, cū sit mediocre, leue & poli-
 tum, & sic per consequens Embryonem
 nec comprimere, nec detrudere, nec læ-
 dere potest, quod in brutis polytocis,
 præsertim catellis vtero contentis, obser-
 uare licet: quorum singulorum secundi-
 næ separatim adhærent, à se inuicem sa-
 tis distinctæ. Ratio hæc punctum mere-
 tur, non solū propter huius dubij ex-
 plicationem, sed propter nouam, veram
 & necessariam ipsius Aphorismi 59. lib.
 5. interpretationem, quo in Aphorismo
 Hippocrates ostendit, mares dextra, fœ-
 mellas verò sinistra vteri parte continē-
 ri, quod de adhæsione intelligi debet:
 quod & ipsæ mulieres persentiunt, idq;
 vel ex pondere aliquo, vel ex motu Em-
 bryonis,

bryonis, in vno magis quàm altero latere, & hoc vsitatum & certius ipsarum secretum est, de sexu infantis prædicendi. Eadem hæc interpretatio, plures obiectiones, quæ contra Hippocratem fieri possent, soluit, præcipuè autem explicat Aphorismum 38. lib. 5. in quo agit, ut antè ostensum, de Gemellis: quorum si alter ex vno latere abortu excludatur, alter tamen ad præfinitum à natura tempus gestetur, necessariò sequi ut non vnà iisdem acetabulis adhæreant: secus enim si esset, vnà excluderentur, sed quilibet p propria acetabula secundinè adhæret.

Solutio aliarum obiectionum, & probatio, huius pessarij usum, nouum non esse: licet assertio hæc, qua statuitur mulierem pessarium gestando nihilominus concipere posse, observatio noua sit.

CAP. IX.

HÆC sunt, amice Lector, quæ vera esse adinueni, & huic tractatui inferere volui, ut rem propositæ materiæ non dissimilem, tam quoad subiecti materiam, quàm quò ad rei nouæ & parado-

xi affirmationem : quod tamen necessa-
 riò verum esse debet, aut sensus non so-
 lùm vnius, sed omnium, fallaces erunt,
 à quibus tamen principium & modus
 verum à falso discernendi, depēdet. Ad-
 do etiam vtilitatem, quæ inde percipi-
 tur, imò & necessitatem, si rectè & dextrè
 adhibeatur, idque tam in commodum
 & leuamen matris, quàm ne spes adima-
 tur vtero adhuc gerendi, dum eo etiam
 pessario vtuntur, quod secus non fieret.
 Rei veritatem omni inuidia remota tibi
 patefeci, dum & locorū & personarum
 nomina proposui, quo iis in locis, & e-
 tiam alibi, huius rei veritatem cum iudi-
 cio perquirere possis, vsque dum tibi sa-
 tis fiat, quemadmodum etiam à me fa-
 ctum est, donec temporis tractu in poste-
 rum, huius rei maiorem comprobatio-
 nem accipias. Obiicies sat scio, hac de re
 nil vnquam traditum fuisse, tam à vete-
 ribus, quàm neotericis, qui tamē in alia-
 rum rerum inuestigatione diligētes fuē-
 re, nec etiam in vsum receptū, nec obser-
 uatum esse, à tot Chirurgis acutissimis.
 Quod sanè lubens concedo, ne cum con-
 tentiōis in disceptationē veniam, quod
 etiam de sectione nostra Cæsarea intel-
 lectum

lectum volo: attamen rem tibi exposuimus, quam perpendes. Non enim omnia ea, quæ olim facta sunt, literis fuere tradita, ut nec ea singula quæ rara & secreta fuere ad nostram cognitionem pervenire: semper enim quædam fuere remedia, præcipuè inter mulierum secreta propriis morbis convenientia, quæ quasi per manus sibi inuicem tradidere: quemadmodum & olim inter Medicorum secreta fiebat (imò ab ipso Asclepiade) qui plurima ex secretis solum suis, quasi hæreditario iure detegebant, idque solenni iuramento dato, se ea aliis non exposituros, quod ex iuramento Hippocrateo coniectare licet. Inter mulieres hoc accidere, multo est verisimilius, præsertim in celandis iis, quæ ad partes genitales spectant: siquidem & viros ipsos, qui tamen minus ipsis verecundi sunt, pudet earum partium affectus exponere, ita ut solum familiarissimis & quidem quam tardissimè hæc exponant. Quod à Plutarcho in libro de Curiositate traditum fuit, dum inquit: Si Herophilus, aut Erasistratus, aut Æsculapius ipse homines ut dictum existentes, morborum remedia & sanitatis instrumenta in manibus habentes,

ultrò aliorum ædes accederent, inquiren-
tes esset ne vir aliquis circa anum, aut
mulier aliqua cancro pudendorum la-
borans, qui ipsorum indigeret opera: il-
li certè tanquam aliorum secretorum in-
dagatores, abigerentur.

Verùm hæc parua & leuia, sed peruti-
lia, & certa remedia melius & rectius in-
ter plebeios, qui qualicunque experien-
tia contenti sunt, quàm inter magnates
in augustioribus locis conseruantur. Sic
enim sæpius fastuosus & arrogans Do-
ctor quispiam, sed parùm exercitatus Me-
dicus (qui Legislatores instar, naturæ im-
perare putat, non autem ipsi uti deberet
auxilium fert, iis remediis, quæ à natura
quasi digito & ad oculum ipsi ostendun-
tur) aliud nō facit, quàm ut vel inuidia,
vel contemptu motus, quò minus alius
quispiam minoris nominis melius ipso
ægro succurrat, impediat. Hic error est,
qui nos cæcos reddit, & sæpius in præiu-
diciū maiorum nobis occasionem adi-
mit, quò minus plurima bona remedia
cognoscamus, quæ aliqui volunt nobis
expectanda esse, sed frustra, ex Rhabar-
bari exhibitione, & venæ sectione, quæ
sæpius tam barbara sunt, quàm sangui-
naria,

naria, nisi ea certo cum moderamine & deliberatione potius fiant, quam tyrannico imperio, quod rectè docti, boni, modesti & exercitatissimi sanitatis dispensatores facere norunt.

Verùm demus, hætenus hac de re à nemine quicquā scriptum fuisse, ad hæc nostra vsque tempora, quibus ingeniosus & industrius aliquis ex euentu variorum affectuū consuetorum, vel inasuetorum, qui mulieribus accidunt hæc inuenerit (vt etiam in sectione hac Cæsa rea vsu venit, licet obiiciatur hoc fortè temeritate quadam factum) attamen pati, bonum aliquod qualecunque sit interire, sacrilegium foret, quando tale bonum Deus per eiusmodi media & tales quos vult ministros, nobis patefecit, quocunque etiam tempore id cōtingat. Attamen crederem ego (quoad vteri in loco conuenienti solū retentionē, non autem quoad concipiendi facultatem) hoc ab Hippocrate Aphor. 47. lib. 5. intellectum fuisse, vbi inquit: *Si Vterus intra coxas situs suppuratur, necessarium est emmotum fieri.* Si modò alibi quoque eius rei meminisset, eo nimirum in loco vbi speciatim vteri prolapsi curam tradidit; aut

L

si quispiam è veteribus ea de re quidpiam scripſiſſet: aut denique ſi huius Aphoriſmi interpretatio à Galeno tradita, aliò non pertineret, qui circa vocabulum διαπύση ſubſiſtit, quod pro διαπύσησιν aut διαπύση ab illo tempore fortè poſitū, quo Aphoriſmi hic ſit ſenſus: *Si Vterus intra coxas ſitus deciderit, aut deſilierit, neceſſariū eſt emmotum fieri.* His non contrariatur iplius vocabulum *Emmoti aut Linamenti*, emphafeos allegatio, cūm ex diuerſis materiis, vnū idemq; remedium fieri poſſit. At ſiue res ita ſe habeat, ſiue minimè, nolo tamen autoritatem tantorum interpre- tum, quos habuit, cauillari, quos ego & veneror, & imitari volo, qui ſæpius non metuere modeſtè ea, quæ ab iſtis erant inuenta, in vtilitatem poſteriorū propo- nere. Quo tacitè nos monuerunt (quod & meum eſt propoſitum) vt idem in gra- tiam noſtrorum faciamus: præſertim ve- rò quando de veritate quæſtio eſt, quæ cūm Temporis ſit filia, à patre ſuo didi- cit, non omnia vno eodemq; tempore producere. Sed vtcunq; res ſe habeat, id tanquā alia bona acceptare debemus, & à manu non ingrata recipere, quando tempore ſuæ maturitatis nobis ſe offert,
 prout

prout & per ea media, per quæ Deo (qui
 autor omnium temporū est, & omnium
 seculorum parens) placuit ea nobis com-
 municare. Cui sit gloria, honor, cum gra-
 tiarum actione in æternum. Amen.

AD CHIRVRGOS
 BREVIS EXHORTATIO DE
*sectione Casarea, quomodo, quæue
 ratione administranda sit:
 eiusdem*

FRANCISCI ROVSSETI.



REDO ego promissis me ste-
 tisse, dum abundè satis testa-
 tum feci, sectionem hanc tutò
 fieri posse, ita vt non sit me-
 tuendum obiici posse, temerariè hanc se-
 ctionem adhibitam fuisse, alterius vita
 in periculum coniecta, quo alterū à mor-
 te vindicaremus: licet secus ambo in
 summo nimis periculo versarentur, cum
 ipsorū salus in angusto esset posita. Qua-
 re hîc summam manum imponam, tibi
 (amice Chirurge) & sectionis huius ad-
 ministrationem, & etiam præceptorum

methodicam conscriptionem committens, vbi data occasione re feliciter peregeris, cum vtrumque tanto magis tui sit officij, quanto magis industrius es, & scientiam maiorem es adeptus: quantam scientiam, plures eorum, qui hanc sectionem, ut potuerunt, administrarunt, non habuere, quibus tamen feliciter successit: quare ei, a quo solo omnis felicitas procedit, sit laus. Sed tamen ut adhuc tibi gratificer, simque auxilio iis, qui non adeo in arte sunt exercitati, donec (hæc vbi sæpius exercueris) ipsis meliorem instructionem proponas, quemadmodum tractatio hæc meretur: quædam vniuersalia quasi in genere deliberatiuo, nec tamen curiosius proponam, ut facit nimis phantasticus Pictor, qui dum manum a tabula remouere non potest, existimans magis affabrè se picturum id quod satis commodè erat delineatum, nil facit aliud, quam totum opus confundere & deuastare.

Primo tibi considerandum erit, aliquane sit spes alio faciliore modo factum nanciscendi. Dein, sitne mulier robusta, & an signa lethalia adsint: præcipuè autem an non nimium ab Obstetricibus, aut ob summos & violentos in partu

partu conatus læsa fuerit: aut quorundam Tonforum carnificina crudeliter dilacerata, quod frequētius ab ipsis, quàm à matronis fieri solet. Si enim eam tum mori contingeret, causa mortis sectioni tuæ, non autem ipsorum erratis adscriberetur. Sic, postquam (inuocato tamen prius numine Diuino) aliquis, qui tibi ad id commodus visus fuerit, iussu tuo, mulieri animum addiderit, & ut primò Deo bene confidat, dein etiam de tuo auxilio rectè speret, admonuerit: cōueniet te instrumenta hæc pauca habere, ad hoc opus peragendum necessaria: ita tamen ut hæc instrumenta ab ipsa non conspiciantur. Nouaculam nimirum acutam, nouaculam rotundæ aut globosæ cuspidis, acum cuspide triangulari filo instructam: spongiam mollem: pannū lineum mollem, veterem, complicatum, confutum & iam imbutum decocto calido, de quo in sequenti agetur, vel alio simili decocto, quo dein bene expresso, melius quàm spongia vteris, tam ad sanguinem imbibendum & exsiccandum, quàm ad labia ipsius vulneris fotu adstringente, & calore suauis ac blando fouenda.

Præterea etiā linteamina sint in prom

L 3

ptu, quæ ipsi mulieri substernantur, & circumponantur, quo sanguis qui promanabit, tegatur, cuius etiã parua quantitas magnam profusionem ostentat, & tam mulieri patienti, quàm astantibus terrorem incutit. Adfint etiã fasciæ, linamenta, splenia, stupæ bene pexæ, puluilli, vñtatis medicamentis adstringentibus, imbuti: quæ omnia in primo post sectionem apparatu, separatim habere oportet, aut eadẽ, si tibi ita videatur, coniunges. Postmodum ubi te monitore, virinam, si fieri poterit, reddiderit, (quo vesica vacua deorsum concidat, & minus impediatur, quamvis ea locum sectionis non attingat) situanda est, si vires valeant, supra lecti extimam partem in dorsum inuersa & inflexa, ita vt tibiæ aliquantũ propendeant, sed firmiter coniunctæ seruentur, ipsa verò blandè à familiaribus robustis & animosis sustineatur. Aut si vires sint prostratæ semidecumbens continenda (hic enim situs à Syncope præseruat, quod in sectione venæ eorum, qui lipothymiis obnoxij sunt obseruare solemus) ita tamẽ vt versus pedes aliquantum propendeat, tibiæ verò æqualiter sint extensæ.

Tum

Tum vnum aut alterum quod voles latus eliges, hoc enim in idem recidit, vt ex suprâ citatis historiis colligere licuit. Attamen si Hepatis aut Splenis aliqua durities adsit, consultius videtur fore, si oppositum latus incidatur, idque variis de causis, de quibus alibi acturi sumus.

Si verò Hernia sit, in latere eo, quod incidere est animus, & quod censeatur intestinum ibi, nimirum inter Peritonæum & Vterum non hærere (difficiliter enim ibi esse potest, quia Vterus in muliere valde grauida prius quàm intestinum se offert) tum ibi sectio fieri poterit, eò enim citius quàm in oppositum latus Vterus decumbit. Hac ratione fiet, vt postmodum ægrota, non ex vtroque latere sit Herniosa. Et licet intestinum se ibi offerret (quod tamen fieri nō potest) nil idcirco mali esset, modò in altum non uacula non adigatur, ne ipsum lædatur. Olim enim in curatione Herniæ, magna supra rupturam incisio, absq; tamen noxa fiebat, vt Celsus & Ægineta testantur.

Hoc facto, optimo atramento locum incidendum notabis, linea oblonga & recta per abdominis longitudinem du-

cta, cuius exsiccatio expectanda, ne rursus deleatur, quo recto tramite abdomen secetur. Fiet autem sectio inter umbilicum & ilia, tribus vel quatuor digitis ab inguine pecten versus, & id secundum recti Musculi longitudinem, cauendo tamen ne vel caput, vel cauda ipsius Musculi lædatur. Notandum autem hoc loco, quod si sectio paulò altiori in loco potius, quàm nimis infernè fiat, eam meliorem & tutiorem ratione hæmorrhagiæ fore: minus etiam molestam, si Hernia remaneat; adhæc minus etiam doloris causabit. Sed & eodem atramento, in quatuor aut quinque æqualiter distantibus locis, quatuor aut quinque paruas lineas transversales decussatas, super lineam primam per abdominis longitudinem ductam, notare oportebit, & ut exsiccentur, curandum: supra quas puncta futuræ futuræ sibi inuicem rectè respondentia locanda, quò recta fiat Gastroraphia.

His peractis, sectio ipsius Cutis, supra lineam dextrè adhibenda, ad pinguedinem vsque, sed cautè, nouaculam adigendo: cuius vulneris longitudo erit, dimidij circiter pedis, plus minúsue, prout
mulier

mulier magno paruove corpore fuerit, postea eodem prioris sectionis tramite, prudenter & quidem secundum longitudinem, Musculi ipsius Epigastrij incidendi, & etiam peritonæum. Sed cautè inquam peritonæum secandum erit: sub eo enim ipsius vteri corpus tum prætumidum se offert, ipsis intestinis, quæ abscondita subiacent, incumbens Tum implorato diuino auxilio, vterus incidendus erit, ita tamen vt alta non fiat sectio, ne foetus, si adhuc fruatur vita, lædatur: si enim mortuus sit, tū citius omnia peragi possunt, cauendo solūm ne nimium mater lædatur. Incipienda erit sectio in summo ipsius vteri, & deorsum inter latus & anteriorem partem ducenda, quò iis locis, vbi sunt Epididymi, vasa spermatica, & Testiculi muliebres, caueatur.

Quod vt tutius fiat, consultū erit, tum ad manus habere nouaculam alteram, dorso crassiore, acie acutissima: ita tamē vt ipsius acuminis principium globulo plumbeo aut buxco muniatur (ad instar cultri eius, quo vtuntur ij, q̄ omasa præparant, & intestina repurgant) ne acumine infans, dum se in vtero mouet, aliòve pacto, lædatur.

L 5



Post factus & secundinæ extractionē,
 linteamine tenui, molli, blando & veteri,
 octies vel decies breuiusculè complica-
 to, & sequenti decocto imbuto (quo
 loco spongia vti licebit) diligenter &
 blandè is, qui aderit sanguis, abstergen-
 dus est: ita tamē vt blando calore fouea-
 tur, quò duabus satisfaciamus indica-
 tionibus, & quidem cōtrariis, idque eo-
 dem tempore, habita ratione breuitatis
 temporis, quo id fieri debet. Decoctio
 sit talis:

Recipe herbarum Artemisiæ, Absin-
 thij, Agrimonix, Betonicæ, Althææ, Flo-
 rum Maluæ arborescentis (quam Rosam
Fleurs de Ro- ses premie- res. transmarinam aliqui vocant) si reperia-
 tur, foliorum aut florum Granatorum,
d'Esclantier. Rosarum syluestrium odoratarum, Rosa-
 rum rubr. exsiccatarum ana m. j. rad. A-
 ristolochiæ longæ & rotundæ, Cyperi,
 Schœnanthi ana circiter ʒ. s. Fiat om-
 nium decoctio vsq; ad tertiæ partis con-
 sumptionem, in vini crassi rubri & au-
 steri lb. vj. (sunt duæ pintæ Parisienses)
 dein coletur: colaturæ addatur Aquæ fa-
 brorum hemina, id est, quartarij duo (est
 dimidia cheopina Parisiensis) & rursus
 vnâ bulliant. In hoc decocto temperati
 caloris,

caloris, lintheamen complicatum, eo modo, vt dictum fuit, intingatur, & exprimatur: hoc eadem opera & saniem absterget, & partem læsam fouebit, sanguinis fluxum sistet, partē defatigatam corroborabit, & lochia, quæ fluere debent, promouebit. Sed hoc loco studiosè dictum illud, *Festina lenè*, obseruandum.

Hæc ubi ratione Vteri peregeris, & eum blandè in locum conuenientē, absque tamē sutura, reposueris (Vteri enim in seipsum contractio, quàm sutura melior est) tum statim Gastroraphia adhibenda (id autem festinanter fieri non debet) vulneri ipsius abdominis, ne frigore interiora afficiantur, obseruantes, & aptè vulneris labra committenda secundum lineas decussatas, vt iam dictū fuit. Quæ quidem res & secundi alicuius operam requirit, qui intestina, quæ tum iuxta vulnus, quod consuitur, occurrūt, intrò trumat, ne ipsa vel acu lædantur, aut inter puncta future occludantur, dum locum eum, quem prius Vterus iam retractus obtinuerat, occupant.

Nec etiā nimis cunctanter res agenda, vt prædictum, vel in curiosa gastroraphia administranda, vel aliquid cum

ægrota periculo experiundo, ne totum opus corrumpatur: siquidem experientia compertum, quod in iis, quæ incisæ omnium optimè conualuère, nil aliud quàm cutis, & quidem paucis punctis consuta fuit, nec tamē propter herniam, quamvis valdè magna foret, aliquid molestiæ pertulerunt. Nam (vt est in proverbio Gallico) melius est infantem mucosum relinquere, quàm nasum omnino auellere.

Post futurā Abdominis, reliqua, quæ in aliis etiam recentibus vulneribus fieri solent, erunt administranda, vsque ad cicatricis generationem: frigus tamen summè cauendum: fiet autem id per vnguenta, cataplasmata, emplastra, fots, puluillos, stupas bene pexas, pro ratione temporis, & indicationibus conuenientibus.

Ratione autē Vteri, duo potissimùm conuenient: Pessaria nimirum, & iniectiones in Vterum. Pessaria erūt effigiatæ in formam penicilli, pollicis crassitie, aut paulò minores, & satis longa, quò vsque in concauitatem vteri absq; offensa indi possint. Parabitur autem ex lintheo, aut ex candela cerea perforata in modum

dum penicilli fistulati (quas Tentas canuleas vocant) linteo, aut bombace obducto, butyro recenti, pinguedine gallinæ, oleo rosato, vitello oui inuncto: qđ sæpius extrahendum, & rursus intrudendum erit. Proderit tale pessarium, tum ratione longitudinis, tum etiam ratione perforationis, quo saniei pateat transitus; dein etiam vt collum & os vteri muniat, ne saniei acrimonia afficiatur: Hippocratis consilium imitantes, si modò communem interpretationem sequi velimus: *Si vterus inter coxas iacens suppuretur, necessarium est emmotū fieri.* Quòd si sæpius id extrahamus, nō impediet quò minus puri, humori pituitoso, aut grumis ipsius sanguinis detur exitus, sed potius ea secum ducet.

In eundē vsum Clysteres vterini conuenient, qui ipsum fouebunt, abluent, abstergēt, roborabunt, & consolidabūt: quæ parabuntur ex decocto Artemisiæ, agrimonix, absinthij, althææ, plantaginis, rosarum rubrarum: floribus aut foliis malux arborescentis, nepetæ: radicum aristolochiæ, falsæ parillæ, cyperi, fchoenanthi, quæ omnia decoquentur in aqua chalybeata, addendo parum vini

crassi austeri, & optimi hydromelis aliquid. Horum nihil, aut parum, in suprâ citatis historiis obseruatum fuit, quæ nihilominus tamē rectè, & citò curatæ fuere. Quare si prædicta omnia reperire nō liceat, non tamen ob absentiam (vt est in vulgari prouerbio) vnus Monachi, Abbat̃is electio intermittenda.

Victus ratio sit ex cibis euchymis, & sit, quoad vires concedent, tenuis. Mulieres enim modò enixas, & tali pacto exercitatus corroborare conuenit: at in vulneribus & apostematibus interioribus, exquisita victus ratio requiritur: quare medium seruare oportet.

Quòd si alius non respondeat, Clysteribus ex saccharo rubro, diapruno simplici, butyro recēti, oleo rosato, cum iure gallinæ pinguis, absque herbis & sale paratis vt̃ oportet. Reliqua pro iudicio Chirurgi & prudentis Medici, qui fortè aderit, fient.

Verùm quemadmodū Varro doctissimus, ex numero primariorum Romanorum, de Philosophiâ scribens, de ea non peculiariter tanquam dogma aliquod propositurus scripsit, sed solū vt̃ iuuentuti eius gustum aliquem proponeret.

neret. Sic etiam, candide Lector, me fecisse cogitabis, non quòd præcepta necessaria tradiderim, sed solùm ut te eius monerem, cuius partim ex inspecto opere, partim verò ex dato aliis cōsilio, quibus bene successit, obseruationē habeo, tibi id, quod hactenus obseruavi, digito ostendens, quò hæc tanquam ex tua officina profecta agnoscens, & etiam seriò postmodum ei incumbens id & tuearis, & prosequaris, ne præda, quam tuo labore eris assequutus, priueris. Ad qd̄ præstandum tibi Dominus successum largiatur, quo feliciter ad humani generis utilitatem, ipsiûsque gloriam hæc præstare & perficere possis. Cui ut & Spiritui Sancto, sit honor & gratia per IESVM CHRISTVM Filium suum, Dominũ nostrum, in secula. AMEN.


FINIS.

MARONIANVM AVTORIS
AD LIBELLVM.

*Nunc te stramineum pro tempore fecimus, olim
Si foetura gregem supplenerit, aureus ibis.*

APPENDIX
VARIAS ET NOVAS
HISTORIAS CONTINENS,
quibus ea, quæ in præcedenti Tra-
ctatu continentur, com-
probantur:

à
CASPARO BAVHINO
addita.

 VM in Tomi secundi Gynæ-
ciorum, Sectionis alterius
Præfatione, pollicitus sum
ea, quæ à Rousseto propo-
sita sunt, confirmare, est ut fi-
dem solvam. Verùm quum eo in libro
quinque potissimùm proponantur:

1. Qua ratione fœtus viuis ex matre
viuente extrahi debeat, & possit.
SECT. I. & II.
2. Vesicæ sectionem, vulnúsve non
esse lethale. SECT. III.
3. Vteri cū fœtu putrefacti historiæ.
SECT. IV.
4. Vteri vel, spontè elapsi, vel absq;
morte exsecti exēpla. SECT. IV.
5. De

5. De variis Pessariis, & quomodo ea
conceptum non impediant, idq;
superfoetationis exēplo, SECT.
VI.

Conabor hæc exemplis & historiis par-
tim mihi per literas communicatis, par-
tim ab Authoribus descriptis, & partim
ex propria obseruatione petitis, illustra-
re & comprobare.

I.

EXEMPLA ALI-

*QUO Tὸν ὑπεροτομοτοκίαν
comprobantes.*

HISTORIA. I.

CVM circa annum salutis 1500. Eli-
sabetha Alespachin, Iacobi Nufer
ὁρχόμης, in pago Sigershausen (præfetu-
ræ Gottliebanae in Turgauia, parochiæ
Altishvuilanæ) vxor, primo vtero ge-
staret, & iam doloribus partus per ali-
quot dies diuexaretur, ad se Obstetrices
tredecim, & aliquot lithotomos voca-
uit, à quibus, frustrà tamen, opem spera-
bat, cum nec foetus excludi, nec etiam do-
lores mitigari possent. Quare iam despe-
rata salute, maritus vxori cōsiliū suū

M

communicat: quòd si consentiret, velle se quò speraret, annuente Domino fœlicem successum in ipsa suam experiri industriam. Annuente ergo ipsa ad Archipræsidentem Frau vuenfeldensem abiit, rem vti se habebat, exposuit, conatum aperuit, licentiamque sibi dari rogauit. Re intellecta, Archipræsides primùm quidem difficiliorem se exhibuit: dein verò fiducæ mariti confidens, annuit. Quare licentia impetrata, domum redit, Obstetrices alloquitur, & hortatur, vt quæ cordatiores sint, sibi & vxori in Hypocausto assistant: timidiore verò ex conclauì recedant: moliturum enim se aliquid, quo, benedicente Domino, salutem Vxoris speraret. Obstetrices ergo, consilio magna cum admiratione intellecto, ex ipsis vndecim è conclauì recessere: duæ cordatiores cum Lithotomis mulieri parurienti adstitere. Quare Maritus implorato primùm diuino auxilio, & ianua diligenter clausa, Vxorem mensæ imponit, abdomini vulnus (non secus quàm porco) infligit. Verùm primo ictu ita fœliciter abdomẽ aperuit, vt subito infans absq; vlla læsione extractus fuerit. Cùm iam vndecim Obstetrices, quæ præ foribus

bus stabant, infantis vagitum audirent, intrare (sed frustra) expetebant: non enim intromissæ fuere, antequam fœtus mundatus, vulnusque Veterinario more confutum foret, quod postmodum absque alio superueniente symptomate, fœliciter coaluit. Eadē enim post hanc *τεμοτοκίαν*, secundò gemellos enixa est: quorum vnus Iohannes Nufer nomīne, pagi Sigershausen Præfectus, annū iam agens sexagesimum, anno octuagesimo tertio adhuc in viuis fuit. Post hos gemellos, quatuor alios liberos enixa est. Exsectus verò infans, primū anno salutis septuagesimosextimo, diem suū clausit. Huius etiam mulieris liberi atque nepotes adhuc viuunt superstites.

HISTORIA II.

VIuum valentemq; educi fœtum posse, tum omnibus quidem integris ipsius rebus, tum etiam matris: vtero nimirum ad latus vmbilici alterutrū dissecto prudenter. Cuius argumenti disceptationem, quādo rationibus multis & operibus, etiamque euentis nouissimè confirmauit Doctor Franciscus Rousseus, vir vitæ & artis clarus, integritate &

utilitatis publicę amantiſſimus: rati deſiſtendum nobis ab hoc incœpto, cenſuimus indies rem noſtram, hoc eſt, Hippocrateam, eodem pacto vniuſcuiuſque Doctorem opera ſcriptoquę amplificari oportere. Sed inter omnia duo ſunt, quę haud poſſumus ſatis demirari. In primis etenim Buncum Tonſorem iſtunc iuuenem & inexercitatum diſſectorem aliquando rogabamus, anno nempe ſalutis 1571. quum ad medicinam faciendam vocati veniſſemus in Vinetũ (quę villa eſt ſui quondam poſſeſſore domino clariffima, Regis Cancellario digniſſimo, bono viro, piſſimoquę Hoſpitali) quānam id arte præſtaret, indiſtriāque. An cutim primũ diuidere ſolitus eſſet: deinde an hos vel illos potius Epi-gaſtriꝝ muſculos, poſtremoquę Peritonæum, ipſumquę tandem Vterum: an quęque hæc ſeparatim ſcilicet, an verò ſimul vniuerſa. Quę nobis percontantibus, nec ſine ſtudio & admiratione, totus ipſe obſtupuit, obmutuitquę: cumquę vrgeretur magis, falſus eſt is ingenuè noſtras interrogatiunculas ænigmatũ plenas ſibi videri. Se ſecurum tunc ab omni metu, ventrem foetus granditate diſtendit

rum

tum quàm maximè, non secus scalpro solitum diuidere, quàm abscessum aliud omne genus. Partes dissectas non re, nec verbo potuit vnquam rogatus discernere, & ne vllam quidem appellare.

Alterum nos non dissimiliter coniecit in admirationem, quod postquā vir eius mulierculæ (vtrumque enim perplacuit conuenire) excessisset è viuis, cui nomen fuit Stephanus Massicault, & alteri se Petro Chancelou mulier iunxisset, nō desierit concipere, nec vtero gestare, neque etiā legitimo tempore perfectum parere. Ergo quod tantoperè visum insolens fuit summo artis dictatori, in vsum tandem trahetur, & consuetudinem: longè melioribus muliercularum rebus vt & permagno posteritatis cōmodo, hoc est, in securiorem parētum valetudinem, & auctiorem generis humani propagationem. Mauricius Cordæus Commen. 1. ad 1. lib. Hippocratis de Morb. mulieb. text. 11.

Quamuis historia hæc apud Authorem nostrum secunda sit sectionis primæ cap. 4. cū tamen quædam scitu non indigna apud Cordæum habeantur, addere eam placuit.

HISTORIA III.

CASPARO BAVHINO D. ME-
DICO IOAN. ALBOSIVS
Medicus Gallus

S.

GRatissimæ mihi fuerunt tuæ literæ
(Doctor eruditissime) tum quòd in
ista solitudine (nisi speciatissimus tuus
frater Iohānes Bauhinus, hisce tenebris
illuxisset) mihi vnà cum patria nostram
artem abdicasse viderer : tum quòd isto
veluti classico me adhuc nostro fulmine
tempestatis Gallicæ attonitum, ad duel-
lum & scribendi vicissitudinem prouo-
cares. Quid verò mihi dulcius, quàm ve-
teris studij memoriam repetere, mellissi-
moque tuo colloquio nostræ miserrimi-
mæ sortis ἀγῶνας temperare, tædia demul-
cere, & temporis iniurias fallere ? Age-
bam igitur animam, somno curisque se-
pultus, nisi tua Musa, quæ tot tantosque
tibi libros parturit, ab isto veterno exci-
tasset. Quòd autem aliorum studia cum
tuis coniungis, facis id quidem non in-
decorè. Sed si nostrum Lithopædion,
quantulumcunque sit, in eam familiam
adscribi

adscribi desideras, propter spectaculi novitatem, rogo ut nos admoneas primo quoque nuntio, ut, &c. Sed iam accipe (Doctore lectissime) quod excuso iam illo opusculo in nostra vicinia acciderit, cuius hic etiam habemus testes locupletissimos. Agitur iam triennium, à quo Ioannes Iacotius, Chirurgus paganus, & ex media plebe in ora Altiſiodorenſi ad pagum D. Mauricio dicatum, vulgari nomine Tirouaille degens, me obvium & ad alia nostra munia properantem inuitavit, ut parum à recta via deflectens, in proximum vicum (dictum Marry) diuerterem, ut miserrimæ mulierculæ conſulerem, cui nuper foetum dissecto abdomine exenterasset. Ego verò plebei Chirurgunculi (ut hi sæpè in artis operibus experimēta querunt, quouis dispendio) temeritate perterritus, in rem præsentem venio, accersitis nobiscum nobili viro Domino de Vault Præfecto Altiſiodorenſi (Balljuum vocant) eiusque illustri vxore, nostri amantissimis, cum paupercula propè ad eorum Castellum habitaret. Foetum tunc deprehendimus in cunis, alacriter se gerentem, sed vagientem, famisq; impatientissimū, cum matercula

inedia exhausta, dolore, febre, vigiliisq;
 confecta, peneq; exanimis, nihil de par-
 tu cogitaret. Abdomē interea matris de-
 tegere voluimus, in cuius parte dextra
 vulnus conspeximus, oblongū quidem,
 sed cuius labia adhuc subcruenta nulla
 alia *ῥασορραφία* coalescerent, quàm decem
 assicularū nexu, quæ punctim cuti post
 sectionem infixæ, adhuc hærent. Tum
 verò & Matri & foetui ita prospectum,
 ut vterque sit etiam hodie superstes, Nu-
 minis benignitate potius, quàm Chirur-
 gi consilio & prudentia.

Paulò post id tempus noster Rousse-
 tus à me admonitus, nos conuenit, ut ac-
 ceptis à nobis literis Chirurgum saluta-
 ret, cum multa in idem opus haberet ex-
 auditu, alia verò pauca. At verò

Segnius irritant animos, demissa per aurem,

Quàm quæ sunt oculis subiecta fidelibus. —

Sic Iacotius (aberat autem à nobis tan-
 tum diei vnius itinere) Rousserū in pro-
 ximam illam domunculam deducit, ubi
 vidit foetum iam grandiore, matre so-
 spite, quorū vterq; in hūc diem viuit, &

—vescitur aurā

Purpureā, nec adhuc crudelib⁹ occubat umbris.
 Porro in commendationem huiusce for-
 tunati

CASPARI BAVHINI. 185

runati euentus potius, quàm prudentis
consilij, ipse Rouffetus Chirurgum se-
cum abducit, cuius opera, ad sectionem
quorundam *ἐμπυῶν* feliciter vsus est, sed
anno superiore ex morbo interiit. Sic
Rouffetus desiderium expleuit, testisq;
fuit oculatus eorum, quæ antea iam scri-
pserat. Quòd si huius historiæ præcipua
capita opusculo tuo inserere placuerit,
facies id quidem pro tua prudentia, acce-
ptis & datis à nobis in eam fidem mutis
vadibus, quos hîc habemus fortunarum
comites. Mitto quoque Hexastichon,
quod exarauimus in Autoris commen-
dationem, quod si probaueris, adiungi
curabis, &c. Datum Montembel. 20. De-
cembris 1585.

HISTORIA IV.

CASPARO BAVHINO IATRO-
PHYSICO FRAN. SAGVYERIVS
Medicus Gallus

S.

TVas accepi literas, suauissimas, &
mihi gratissimas duplici nomine.
Primum quòd per eas certior sum reddi-
tus de tua bona valetudine: deinde q

M 5

scripto confirmasti tuam erga me bene-
uolentiam, utcumq; prius viua voce de-
claratam, propter quam multū tibi de-
beo, nunquam, Deo iuuante, animum
mutaturus. Cæterū quantum ad rem,
de qua ad me scribis, attinet, dicam pau-
cis, &c. Existimabam me reperturum in-
ter alias historias Medicinales, quas a-
pud me habeo, eam, quam tibi pollici-
tus sum, *περὶ ὑπεροπομοτοκίας*, sed falsus sum:
relicta est inter alia aduersaria, quæ domi
meæ in Gallia omīssa sunt. Quām pri-
mū autem sese offeret occasio, dabo o-
peram, ut ad me integra deferatur, & tan-
dem ad te. Memini quidem appellatio-
nis pagi & Chirurgi, in quo & per quē
aduenit ille partus Cæsareus: memini &
anni & mensis quo id accidit, sed nomen
patris & matris memoria excidit. Pagus
est in ducatu Burgundiæ, & vocatur Mar-
silli, non longè à Castro, dicto, Mons D.
Ioannis. Chirurgus erat patria Beluēsis,
sed domicilio Arnetensis: Arnetum ve-
rò vrbs est distans ab Heduis decem mil-
liaribus Italicis, nomen illius Antonius
Robinus, sua arte maximè dignus. An-
nus agebatur post millesimum quingen-
tesimum octuagesimum secundum, Aprī-
li

li mense. Mulier per bídium fuerat gra-
uiter excruciatá, cùm tamen iuuenis ef-
set, & rustica, forti animo, incisionem,
quæ fœliciter successit, passa est: sœtus
non diu ab extractione vixit: mater man-
sit superstes. Non amplius possum ad te
de hoc negotio scribere: si aliquando li-
cuerit, parentum nomina mittam. Ver-
sionem tuam & menti Autoris, & rei ge-
stæ explicationi maximè conuenire, si
quid valeo iudicio, autumo & tueor, at-
que propter eam multũ tibi debere pro-
fiteor, linguæ Gallicæ ignaros, quod sit
libri Rousseti argumentum, cognitione
omnibus dignissimũ, sed præcipuè Me-
dicis & Chirurgis. Plura cùm non sup-
petant, quæ ad ad te scribam, finẽ faciam
huic Epistolæ. Deum Opt. Max. humili-
ter & ex animo rogans, vt te diu artí Me-
dicæ propagandæ & enucleandæ seruet
incolumem. Vale vir clariss. & tuum Sa-
guyerium, q te colit, diligit & obseruat,
amare perge. Monsbeligardi nonis No-
uembr. Anno Domini 1586.

HISTORIA V.

Concubina Sacerdotis cuiusdam in
Zupfingen Heluetiæ pago Bremgar.

tenfis ditionis, Barbara Fhírerá nominata, terriò grauída, cùm partuí vicina esset, per octídium pariendi conatus cum maximis vteri cruciatibus persensit, neque tamen peperit, sed exacto illo tempore, cessantibus conatibus, quum diu postea ægra permaneret, tandem in ventre illius, paulò supra vmbilicum vesica quædam nucis iuglandis magnitudine erupit, quæ cùm illi maximos dolores per trídium causaret, tandem ipsa admodum rogante, à muliere quadam subula pertusa, & disrupta fuit. Qua adaperata, admodumque propter ventris tumorem dilatata, mox fasciculus fœtū continens apparuit, qui postquam à Chirurgo Iohanne Burgisio Bremgartenfi, deliberatione primùm diligenti cum Obstetricibus habita, approbantibus singulis, parte aliqua dissectus esset, fœtus cubitus prominēs, in conspectum se dedit, quem cùm forfice ad id parata arripuisset, integrum fœtum, sed semiputridum artificiosè per foramen illud extraxit, nihil tunc grauius passa matre, nisi quòd animo, dum fœtus extraheretur, parumper defecerat. Dein alio adhibito Chirurgo Brugenfi, candela cerea accensa, & foramini

mini nonnihil indita, postea etiam manibus in abdominis cauitatem immisiss, anne quid restaret, diligenter explorarunt: & cum nihil superesse deprehendissent, vulnus emplastris ligaturisque curando, trium septimanarum spatio integrè consolidarunt. Mulierque à partu rectè & decenter, vti aliàs fieri solet, purgata, ab Anno 1582. quo hæc facta sunt, ad Anni 1584. diem 24. Augusti, quo extincta primùm est, adhuc vixit, miserè tamen afflicta, quòd ventrem fasciis inuolutum & suspensum ab eo tempore, quo hæc passa fuit, gestare deinceps coacta fuerit.

Historiam hanc à clarissimo viro D. FELICE PLATERO Archiatro, Collega meo honorando, accepi.

HISTORIA VI.

DE vulnere Vteri, ne id nobis effluat, literis (si placet) & posteritati quàm primùm tradatur, quod accepimus quidem ab alio, sed fide summa (quam tamè alioqui superare videatur) condigno Parisiensi Doctore. Albertus Faber ex Ruelio nepos perdoctus & coæqualis noster, quum maximis Reipublicæ tempo-

ribus & valdè iniquis, lares patrios deseruisset, cum multis eiusdem suæ sortis Anno 1569. externos secutus exercitus, Sacrumcæsarem tandem aliquando ap- pulit, qui totam hanc morbi calamita- tē suis (vt dicitur) oculis vidit. Eò nam- que cum venimus, iam perfecta morbi curatio fuit. Simplex veraq; morbi nar- ratio erat huiusmodi.

Mulier quædam rustica fœtum octi- mestrem gerens, dum ad forum vrbis Sa- cricæsaris mandasset se viæ, è ferocienti equo excussa, in saxum prægrande, hoc est, eius angulum, ad vmbilici regionem impegit. Ea integrum à casu diem obmu- tuit, sensu motuque priuata. Perendieprehendit acuta febris eam, & comitata quidē sæuioribus symptomatib⁹. Nam- que animo liquit, vomuit, delirauit. Re- purgatur interim Medicorum præscri- pto aliquoties, ac iterato sanguis detra- hitur. Imperata sunt denique, quæ sum- pta admotaque æstus febrilem infrin- gerent, & sanguinis intus latētis vim re- tunderēt perniciosam. Trigesimo postea die, remissioribus symptomatis quibus- que, secundum vmbilicum quidam tu- mor, magnitudinis vt minimum manus conclu-

cōclusæ, sese prodidit. Eoq; rupto, fœda
 sanies, virulentaq;, vnà cū tabo primū
 exiit, quam purulentæ particulæ carnis
 sequebantur, postremoque fœtus ipsius
 ossa frustillatim effluxerūt. Decimo tan-
 dem ab hinc mense, vlcere concluso, per-
 ductoque ad cicatricem, mulier conua-
 luit. Attamen deinceps non potuit con-
 cipere, nec vtero ferre: nec illi, vt prius,
 tam larga manu menses profluxere. Cui
 aliæ per plures aliquot historiæ consen-
 tiunt, quas partim accidisse ipsi vidi-
 mus, tanquā oculati testes modò loquu-
 ti: partim etiam aliis dignis fide omni-
 bus accepimus. Maur. Cordæus Com. 1.
 ad lib. 1. Hippoc. de Morb. mul. tex. 11.

Et si Historia hæc ex professo *ὕστερον
 μοτορίαν* non comprobet, eius tamen sum-
 ma eò redit, vt ostendatur, quòd fœtus, si
 abdomen ad alterutrum vmbilici latus,
 prudenter fuisset dissectum, fortè salua-
 ri potuisset. Ad sectionis tamen 4.
 cap. 4. historiam 5. & 6. re-
 ferri potest.



*Vesica sectionem non esse lethalem,
historijs quinque com-
probatur.*

CUM Medicinæ parens, Hippocra-
tes lib. Aphor. 6. aphor. 18. dixerit,
Vesicae dissectionem lethalem esse, factum ut non
solum apud doctos, qui sententias Hip-
pocrateas pro oraculis (& rectè quidem,
modò dextrè intelligantur) habent: sed
etiam apud idiotas pro confesso fuerit
habitum, vesicæ, intestinorum, ventricu-
li, &c. vulnera esse lethalia. Verùm cum
exemplis comprobari possit, vesicam
dissectam coalescere posse, sanè ut Præce-
ptorem tueamur, nō absurdum fuerit, si
cum interprete Galeno, ὡς ἐπὶ τὸ πλεῖστον id
fieri, Præceptorem voluisse, dixerimus.
Non enim hoc loco de collo vesicæ, qd̄
carnosum, & quotidie sanari, cum lapis
fuerit extractus, videmus: sed de fundo
ipsius loquimur, quod propter substan-
tiam suam nerveam, tenuem & exsan-
guem coalescere non posse volunt. Ve-
rùm vesicæ substantiam non totam ner-
ueam, sed partim carnosam, partim ner-
uosam esse dicimus. Licet enim tunica
interior

interior tenuis quidem, neruea, & candidissima, omnique staminum fibrarumve genere intertexta sit: altera tamen, quæ exterior, carnosæ est: non autem similis carni muscutorum (non enim eadem ubique carnis forma: quæ enim Muscutorum est, magis rubet, & mollior est, quæ sit ipsius ventriculi, vesicæ, uteri, & omnium intestinorum caro, ut Galenus 7. de Admin. anat. & Comment. 6. in sextum Epidem. ex sententia Hippocratis loquitur) sed qualis est ventriculi & intestinorum subalbida (qua de re fusius, volente Deo, in libro 2. nostræ Anatomies, cuius liber primus iam prodiiit) ratione cuius vulnus coalescere posse dicimus. Et licet Fallopius tract. de Vulner. abdominis, capite 20. testetur se vesicam, quæ pillula plumbea erat perforata, sanata vidiſſe: tamē historiis id comprobemus; quod propositum nostrum existit.

HISTORIA I.

ANno 1558. cum Hispaniarum Rex Philippus Regi Galliæ bellum intulisset, duo nobiles ex Marchia, qui eius militiæ socij erant, & stipendia sub Rege Philippo merebantur, cum iam in itinere

N

re cum aliis compluribus essent, forte fortuna coorta inter ipsos dissentione congregiuntur. In quo certamine is, cui à Kalckreut nomen est, alterum Conradum à Bernheim infestissimè adoriens, bombardæ ictu petit. Verùm globus crumenæ lamina ex chalybe obductæ, in qua ictus pulueris & pilarum gerebat, casu illisus à latere eius resiliit, & palmi infra vmbilicum spatium intra corpus penetrans, vesicam homini traiecit, in eadem subsidens, impetu eius ex primo afflictu fracto. Hoc accepto ictu, equo decidit, & à Satellitibus subleuatus, Lipsiam ad Chirurgos exanimis reduci-
tur: qui dum vulnus ei obligat, animadu-
uertunt vesicam sphærule sauciatam esse. Ibi desperantes, obligato valedicunt, omni curationis studio abiecto: nemo enim tantum sibi sumere voluit, ut plagam vesicæ inflictam sanaret, quam ex Hippocratis Aphor. lib. 6. aphor. 18. insanabilem & mortiferam didicerant: cui tamen Galenus in Commentario supra eundem aduersatur. Sic igitur derelictus, omnique cura destitutus saucius, accitis Ministris suis, domum se reportari expetit, aut viuum, aut mortuum. Quod cum facerent

facerent Satellites, & iam Torgam Lipsia aduexissent, æger cupidus virg, Chirurgum oppidi peritissimum Leonhardum Vuolcium, & me quoque precibus accersit. At primum rem omnem ut accidisset, prolixè nobis recenset: deinde gemebundus opem nostram implorans, obsecrare se ait, ut desertum ab omnibus nostra beneuolentia complecteremur, & curandum susciperemus. Chirurgus itaque laxatis ligamentis, & cognito vulnere periculo, mox vitam simul atque curationem denegat desperato. Tandem mea intercessione motus, cum pollicerer meam quoque operam, ac fidem coniuncturum, suscipit, & religat summo studio. Ibi tum hebdomadas undecim vrinam non canalem perfluxit ordinatum, sed per plagam manauit: per eam autem omnis substantia cutis carnisque vstulata ab ictu erat, eique materies quædam glutinosa ex acredine lotij, sanieque circum circa adherescens, in lapidis soliditatem obduruerat: ita tamen ut vrinæ meatus de die in diem exiguus pateret, qua stillaret, donec elapsis quinque ab ictu septimanis, substantia ea vstulata, putredine sensim laxata, una cum calculo accre-

to, à Chirurgo instrumēto extracta fuit, & vrina iam immediatè vulnus permānuit. Porro substantia soluta & exempta, ambustæ & lentæ admodū cuti per-similis erat, duarum stipularū crassitie, digiti transversī latitudine, lapidosam eam materiā ambiens, qua vrina exitum habuerat: quæ quidem tophos, qui in thermis congelantur, ferè superabat firmitate, colore cinereo, tactu aspera, ut è grossis arenulis conglutinata. Sic igitur ampliato meatu, & purgata vesica, liberataque à reliquis sordibus, calculis, viscositate, sanie, & aliis, quæ de globo bombardico, lorij acrimonia consumpto supererant, & orificium vesicæ obstruxerant, vulnus sanari ritè (Deo auxiliante) cœpit: idque tam breui tempore penitus adeò coaluit, ut nec ambulanti, nec equitanti, nec curru vecto, impedimento molestiæque esset. Post hæc vxorē duxit nobilis, & in hunc vsque diem valetudine est commoda & firma.

Historiam hanc habet Ioan. Kentmanus libello de Calculis in corpore humano repertis, cap. 11. quem Conradus Gesnerus (cui historiam hanc annis sex post curationem communicavit) edidit.

HISTO.

HISTORIA II.

IN Gallia Narbonensi cū essem, circa annum 1555. accidit, dum spectacula ederentur, atque inter reliqua Taurus cum Leone certaret, vt cū Tauro fugienti Heluetius Tigurinus Regis Nauarræi Satelles se opponeret, ab eo cornibus petitus, altero in pectine circa regionem vesicæ intruso, penitus transuersim perfoderetur, atque vrina in lumborum regione emanaret: qui tamen Chirurgi Monspeffulensis opera sanatus, sine omni incommodo diu postea superuixit. Quo exemplo, vti & aliis edocti, ea vesicæ vulnera, quæ in carnosa illius parte accidunt, vel alia quoque, vbi caro illi contigua est, qua accrescente occludi & callo obduci possunt, eadem ratione sanari posse nonnunquam statuimus.

Historia hæc à Cl. viro D. Felice Platero Archiatro mihi communicata fuit.

HISTORIA III.

ANno 1581. Septembri mense, nauæ Griphsvualdensi in Pomerania, cui Ioanni Iacobo nomen erat, culter in dextrum abdominis latus, quatuor transuer

sis digitis supra pudenda defixus fuit, ita ut toto triduo vrina non per vrethra, sed per vulnus efflueret, qui tamen hoc pacto probè fuit percuratus.

Primò ergo Enhæmata applicita, dein vulnus, nullis tamen turundis propter vesicæ metum inditis, sed linimento consolidante imposito, obligatū fuit: tum emplastrum conueniēs ex gummatis & magnete confectum, superimpositum. Intrinsecus verò, quotidie bis haustus decoctionis Fabariæ, quæ apprimè his vulneribus utilis, propinatus. A calidis cibis abstinere, pauco potu contentum esse, & in lecto supinum se continere oportuit. Hac cura usus, triduo post vrina rursus per vrethram effluxit, & successiuè penitus curatus, ita ut nec stillidium vrinæ, aliudve symptoma molestum superuenerit.

A Felice Vvirtzio, nunc nostrate Chirurgus.

HISTORIA IV.

Petrus Hase, posteaquam carunculis in medio Pene constitutis laborasset, tandem in scirrhum abiêre: varia, irritò tamen conatu attentata fuere, ut partes

tes induratae consumerentur : tandem adeo scirrhus excreuit, vt omnimoda vrinae suppressio fuerit subsecuta, quæ per aliquot dies perstitit, donec tumor cum inflammatione in inferiore inguinis parte obortus, eo ad suppurationem accedente, aperiendum curauit. Apostemate aperto, puris parum effluxit, & statim vrina subsecuta, quæ deinceps voluntariè per vlcus, & nõ amplius per Penem reddebatur. Hic vltra anni spatium vixit, de nulla vrinae retentione conquerens, sed tandè alio superueniente morbo interiit.

Ex Epistola Ioannis Bauhini, Illustr. Principis Friderici Comitis Vuirtembergici, & Montembelgardensis, &c. Archiatri, Fratris chariss, ad me 5. Ianuarij, 1587. data,

HISTORIA V.

Piscatori Basiliensi, Gyfi nominato, sarciti laboranti in teste dextro, cum subito vrina penitus suppressa esset, nec ullis remediis, vel immisso quoque cathetere pmoueretur, adeoq; ventris distensione conatuque mingendi assiduo angeretur, & ad extremum vsque periculum peruenisset, consilio nostro ad se-

ctionem sarcitis, quā aliqua ratione causam huius suppressionis esse, certis coniecturis statueramus, & quæ alioquin, cū mole nimia in immensum excreuisset, auferenda erat, deuentum fuit. Ibi cū sectio in inguine (vt moris est) primū fieret, Lithotomusque in separanda carnositate, quæ eò vsque protensa erat, laboraret, casu vesicam illuc quoque nimia distensione ampliata, productamque vulnerauit, atque vrina maximo impetu in altum prosiliit, subitoque æger omni molestia liberatus est. Postea verò teste illius lateris execto, sarcitim successiue mensis ferè spatio amputauit: vrina interim continuò, vnà cum frequēti arenularum copia per vulnus emanāte, nec per penem nisi guttatim extillante. Tandem vulnere sanato, fistula in inguinis regione remansit, per quam immisso cathetere breui, quem continuò gestat, vrinam iam toto biennio, incolumis alioquin, reddit, neque per Penem amplius emingit.

Huic sectioni Clarissimus vir Felix Platerus, vt & ego inter cæteros interfuer-

re.

EXEM-

III.

EXEMPLVM VTE-
ri cum foetu putre-
facti.

*Fœtus mortuus quatuor mensibus
retentus, viuentē
matre.*

SArtoris Basiliensis vxor, Catharina Frechin, annorum circiter triginta, quæ quater prius pepererat, quintò grauida facta, cùm iam pariendi tempus instaret, atque in ipso labore fœtus quandam conuolutionem, leuesque aliquot pariendi conatus sentiret, tandē iis omnibus cessantibus, rursus ad se rediit, ita vt licet plerunque se in lecto & hypocausto ob imbecillitatem quandam conrineret, nullis tamen agitaletur doloribus, idque mensium decem spatio. Quo tempore intermedio, cùm an grauida esset, ex eo quòd supra vteri gestationis tempus tamdiu superstes maneret mulier, nec grauiora pateretur accidentia, in quæstionem veniret, & de mola, aliòve

aliquo tumore inter Obstetrices consul-
taretur, tandem consilio meo habito (li-
cet eam viuum nō viderim) de fœtu mor-
tuo pronunciaui: exhibitisque medica-
mentis fœtum propellentibus, menses
primū promouit: quibus fluentibus, a-
deō leuata fuit, vt tribus inde septima-
nis cibum sine fastidio sumeret, ambula-
ret, & in publicum quoq; sine molestia
prodiret: postmodum denuō rogatus,
pessaria subieci, vnde mox chorda vm-
bilicalis propendere cœpit: quæ tamen
cū putris esset, tandem amissa fuit. Ve-
rū cū nullus sequeretur abortus, nul-
lūque esset omnino fœtum excludendi
conatus, vt is pmoueretur, mulier quæ-
dam ventrem illi variis modis aliquo-
ties cōpressit, deorsumq; impulit. Quo
facto, fluor vterinus, in quo putris, alba,
fœtidissimaq; materia ex vtero proflue-
bat, subortus est, quo octo septimanarū
spatio perseverante, accedente interim
febre, corpus adeō contabuit, vt nihil
præter durissimum tumorem è transuer-
so vmbilici in ventre amplius emineret,
ac demum viginti septimanarum spatio
supra decimum mensem, quo vterum ge-
starat, tempore exacto, exspiraret. Rogatus

tus

tus ut corpus aperirem, primo ventris intuitu, vesicas geminas lividas in latere umbilici, ubi tumor durus, inæqualis adhuc transversim eminebat, deprehendi: quibus levi negotio, cum tenuissimæ essent, disruptis, statim vertebræ ipsius fœtus, unâ cum scapulis & costis obviæ erant. Transversim enim collocatus & supinus, dorso inflexo, uti in orbem convolutus iacebat, versus exteriora prominabat. Qui exemptus diductusque, adeo putris erat, ut præter cutem & ossa, quæ tamen levi negotio dissoluebantur, & quod fœmella erat, nihil aliâs liceret, vel fœtor immensus sineret cognoscere. Hoc saltem manifestum erat, transversum illius situm, atque eximiam magnitudinem, quam longitudo illius, & capitis amplitudo, prolixis admodum capillis iam ornata, declarabant, impedimento fuisse, quò minus in partu prodire potuerit. Sicque retentum viginti septimanarum spatio, computruisse, & simul vicinas partes undique infecisse. Cum univ ersus vterus unâ cum involucris & omenti portione aliqua, musculisque epigastrii illius loci desiderarentur, totâque illa regio pure, fœtore & nigredine in-

fecta essent, & ad extimam vsque cutem, vbi vesicæ apparuerant liuescentes, corrupta. Quo in loco, si sectio ante extremam illam viscerum corruptionem facta fuisset, fœtus eximi, matre fortassis superstite manente, potuisset.

Historiam hanc communicauit Cl. Felix Platerus: sed & egomet ossa cranij capillis ornata, post aliquot dies adhuc summè fœtentiâ, licet diligenter abluta forent, vidi.

IV.

EXEMPLA XVI. VTERI, VEL
ex procidentia, vel gangrena, vel
aliter vitiati, totius citra va-
letudinem ex-
secti.

HISTORIA. I.

MVlti abscessu in aliqua vitæ neces-
saria parte oborto, præter opinio-
nem consanuerunt, cum & iecoris fibram
& omenti partem, peritonæique & to-
tam vuluam subinde redemptam fuisse,
nec mortem inde subsecutam, memoriæ
prodatur. Ægineta libro 6.
capite 88.

HISTO-

HISTORIA II.

SI processu temporis id quod prolapsum est putredinē fuerit expertum, id ipsum auferetur, nullius metu periculi. Etenim vulua vniuersa ablata, vbi computruerat, mulierē superuixisse commemorant. Idem lib. 3. cap. 72.

HISTORIA III.

SI pars prolapsa temporis progressu per negligētiā computruerit, & ex assidua vrinæ irrigatione, & adhærentibus sordibus exulcerata fuerit, auferatur citra vllius periculī formidinē. Narrant enim, totum vterum putrefactum aliquādo ablatum esse, & mulierem nihilominus superuixisse. Aetius Tetrab. 4. Serm. 4. cap. 76.

HISTORIA IV.

Recordati fuerunt quidam Medici, q̄ aliquando putrescunt ligamenta matricis omnia, & exit matrix omnino, & permanet mulier absque matrice, & viuit sine diminutione aliquarum suarum operationum. Et dixit mihi quidam amicus meus, de quo & eius veritate mul-

tum confido, q̄ vidit mulierē, cui omnino matrix exiuerat, & remansit viua, faciendo omnes suas operationes naturales integrè & perfectè, & sic esse debet absque dubio, cū non sit membrū principale, nec aliquibus membrīs aliquas præstet utilitates: nec præstat aliquod iuuamentum in conseruando vitam, nec inuentum fuit ad illud. Auenzoar libro 2. tract. 5. cap. 4.

HISTORIA V.

VIdi vnā Papiæ, de qua dicebatur, quòd ab ea exierat tota matrix, secundum partes putrefactas in diuersis temporibus, & superuixit per aliquot annos post, & erat ex nobili genere. Matth. de Gradibus Comment. ad cap. de Exitu & dispositionibus matricis, lib. 9. Rasis ad Almanforem.

HISTORIA VI.

VIdi mulierem Andreæ Salsitiæ, cuius matrix corrupta tota, emissā est, & vixit postea multis annis, exercēs negotia familiaria. Nicolaus Florentinus Serm. 6. tract.

3. cap. 26.

HISTO-

HISTORIA VII. TRES
continens historias.

POtest vterus pati omne genus morbi, sæpè procidit, & totus potest extrahi à corpore, durante valetudine. Vnam matricem corruptam, ego vidi extrahi integrè in terra Carpi à Genitore meo, quæ sanata est, & diu vixit. Ego etiam Bononiæ extraxi vnam aliam integrè, quæ erat gangrænata, Anno 1507. mense Maio, quæ superuixit sana. Vnam aliã scilicet matricis receptaculum præcipitatum extra ventrem & corruptum, me præsentē nepos meus ex fratre Damianus extraxit integrè, & in cœtu Doctorum, & multorum Scholasticorum, Anno 1520. die 5. Octob. Ista vltima nomine Gentilis, erat vxor Christophori Brianti Mediolanensis, habitantis Bononiæ, quæ hora ista 1523. 10. Iunij est sana, & exercet negotia familiaria, & relatu ipsius & sui mariti, in coitu emittit semē, & habet menstrua temporibus debitis, res notatu digna. Carpus in Isagoge anatomix.

Author noster paucis historias has, Sect. 4. cap 5. hist. 5. attingit.

HISTORIA IIX.

Vidi matricē mulieri Bononiensi cū
mola trusatili, hordeum & id genus
frumenta degluberet, elapsam, & cucur-
bitæ instar inflatam, Carpum Chirur-
gum, me cooperāte nouacula abscinde-
re: quam tandem toto biennio Bononię
crebrò mihi obuiam, & superstitem vi-
di, donec Bononia emigrarem. Langius
Epist. tom. 2. epist. 39.

HISTORIA IX.

Ingeniosus nostri seculi Medicus Vgo
linus Pisanus me, licet iuniorem, aduo-
candum censuit: ut vnā cum illo mulie-
rem quandā curaremus, quæ vuluæ per-
nicioso vlcere vexabatur. Huius nos ma-
litiā, omni studio & diligentia tollere,
sed frustrā conati sumus: nam corrupta
interim vulua, & frustulis comminuta
descendens, non prius fluere destitit, q̃
tota putrescens decideret: & sic mulie-
rem ingēti malo liberauit, quæ licet vul-
ua carens, sana tamen superuixit annos
decem. Beniuenius de Abdi-
tis, capite vnde-
cimo.

HISTO-

HISTORIA X.

COmpluti mulierem vteri procidentia laborantem vidimus, cuius vterus extra computruit; Chirurgus tamen totum abscidit ad collum vsque, & non paucis deinde annis vixit. Auicennas totum vterum abscissum refert, & iecoris partem, & vixisse. Et Galenus lib. 4. de Vsu partium, refert se abscidisse totum ferè omentum: sed hoc non adeò graue est. Christ. à Vega, Com. ad aphor. 18. libri 8. Hippocratis.

HISTORIA XI.

NOS cuidam foeminae ætatis annorum triginta quatuor, vterum putrefactum abscindere præcepimus, decem ab hinc annis, quæ adhuc viuit. Idem libro 3. cap. 10. Artis medicinalis.

Historiam hanc Author noster Sect. 4. cap. 5. hist. 4. etiam habet.

HISTORIA XII.

MVlieri cuidam ferè trigenariæ sanæ, menstruali, & benè famatæ conceptionis signa paulò post secundas nuptias, quas anno 1571. contraxit, cum ex

○

priore matrimonio prolem nullam concepisset, apparuerunt. Progressu temporis obortus est ad partes imas & pudenda, ponderis sensus, dolore & urinae retentione adeo molestus, ut Christophoro Mombeo Chirurgo vicino suo, in suburbis S. Germani commoranti, patefacere se infortuniumque suum, coacta fuerit. Is viso tumore in perinaeo, fotu & cataplasmatibus anodynis & remollientibus, dolorem sedauit: sed mox ad pudendi labrum interius vomica, velut ab abscessu rupto apparuit, sanie subrubra, citrina & pallida, multo tempore manans. Interim haud euanescebat ponderis ille sensus, quin potius augebatur indies, ita ut ab anno 1573. ne se quidem in lecto in hoc illudve latus conuertere posset, nisi admota manu hypogastrio ad oneris leuamen: sed & tum quidam veluti globus, toto corpore & pondere suo sibi prouolui videbatur, in quodcumque latus decumberet, nec stans, nec sedens, alui excrementa reddere valebat, nisi pondere illo sursum manibus ad diaphragma sublato. Incessura, vix crura promouere poterat, quasi sibi semper ex interfoemineo aliquid penderet, quod progres-

progressum remoraretur. Ex interuallis, vomica illa recludebatur, sanie solita manans: sed tum capitis, membrorumque omnium dolor, animi deliquia, fastidia, vomitus, suffocationes, miseram urgebant, adeò vt ab empirica muliere persuasa, facile adducta fuerit, vt antimonium hauriret: cuius tanta fuit & tam effera vis, vt post multas cum multis torminibus vomitiones, & aquosas per aluum deiectiones, visus sit sibi anus procidere. Sed admonita à familiari quadam sua, cui se videndā crediderat, haud ab ano id procidere, sed à vulua. Anno Domini 1575 Chirurgos vocauit, me, Iacobum Guillemeau & Antonium de Vieux, qui sibi auxilio afflictæ sanitati essemus. Expensa re tota, & diligenter animaduersa, communi consilio censuimus, id quod prociderat, extirpandum esse: quod atro colore, foetore, & aliis eiusmodi signis putridæ ac corruptæ rei argumenta manifesta præberet. Ergo per duos dies sensim frustatim & sine dolore corpus extraximus, quod aduocatis Medicis, Alexio, Gaudino, Feureo, Violaneo & nobis vteri corpus esse visum est. Cuius rei fidem fecere, vnus ex testi-

culis, qui integer extractus est, crassiorq;
 item membrana reliqua ex mola, quæ
 suppurata, rupto abscessu, sensim diffu-
 xerat: reuulso omni eiusmodi corpore
 melius ægra habere cœpit: & tamen an-
 te extirpationem nouem totos dies vri-
 na suppressa fuerat. Dehinc omnia sibi,
 naturæ suæ, & stato cursui reddita sunt,
 totumque trimestre sana, & egregiè inco-
 lumis mulier superuixit, donec suborta
 repentè pleuritide, interiit. Dissecta à me
 & sedulò singula exquirenti, nusquam
 comparuit vterus, sed eius loco callo-
 sum quoddam corpus, quod natura quæ
 nunquam in nobis oriatur, iacturam e-
 ius partis quasi reparatura, vel lacunam
 potius alui repletura, substituerat. Pa-
 ræus lib. de Hominis gener. cap. 41.

HISTORIA XIII.

EXactis pluribus annis, accersitus Chi-
 rurgus ad mulierem quandam in pa-
 go Grotzingen, non procul à Caluu, cui
 cum ex toto matrix procidua facta esset,
 nec Chirurgus, nec astantes mulierculæ,
 quæ alioquin fungebantur Obstetricum
 munere, quid esset, sciebant: ego vterum
 esse dicebam, qui instar inuersi pilei de-
 cidisset

cidisset etiam refrigeratus aliquot diebus nigrescere incepisset. Itaque ne fluxus sanguinis incideret, Chirurgo auctor fui, vt vtrinque ligaturas institueret, & postera die (erat enim infelix astro- rum aspectus) abscinderet: id quod ob molestum onus mulier ipsamet serio ex- petebat. Resecta procidua parte, mulier melius habere coepit, & relicta portio momento se retraxit, nulla notabili hæ- morrhagia succedente. Quæ postmodum peste quoque correpta, multis annis su- perstes remansit. Tandem vir secessit in alium pagum Colmbach, ad ferinas ther- mas situm: saltuarium enim egit, &c. Bel- locatus Præceptor meus Italus, Paduæ sublatum vterum duabus absq; dispen- dio affirmavit. Esaias Meichsnerus de Obseruat. propriis, ad Clariss. D. Schen- ckium missis.

Historiæ hæc tredecim mihi à Cl. viro D. Iohanne Schenckio de Graffenberg, Friburgensi Medico, ex magno suo Ob- seruat. opere, transmissæ fuere.

HISTORIA XIV.

VXor Cantoris Iauraiensis (Silesiæ vrbs est) gracili admodum corpore,

214 APPENDIX HISTOR.

naturæ biliosæ, nonnihil ad melancholiam declinans, in partu ab Obstetrice quadam inclementius, quàm par est, tractata, cum graui & acuto vteri dolore, vinculorum eundem sustinentium, vel ruptorum, vel luxatorum, saltem causa, structuræ vitium passa est: ideoque post partum aliquoties vteri substantiam, in pudendi sinum, non extra tamen eundem sibi prolabi sensiit, eoq; plus, quò plus oneri alicui subleuando eniteretur. Hoc malo per annos aliquot durante, neque in peius, nec melius vergente, bis prægnans facta, difficilius quàm antea peperit. Et paulò post domū scopis mundans, mensa quadam onusta sublata, vteri corpus magna cum molestia extra sinum ipsi prolapsum est: quod tamen fomentis decentibus calefaciendo, molliter loco suo ipsa restituit: licet postea leui momento rursus exciderit. Hinc menses primum inordinatè fluere, vterus malè affici, nonnunquam suffocari, caput scotomiam pati cœpit. Subsequente assiduò fluxu albæ & acris materiæ, itémque sanguinis interdum corrupti, & in grumos collecti. Et cum parum obtemperaret, in mali principio Medicis, in peius omnia
ruere,


ruere, atque ex fœdi odoris materiæ effluxu, doloreque loci eiusdem continui, vlceris maligni, vel apostematis suspicio oriri, quod & euentus testatus est. Nam postquam vterus sæpius hoc modo excideret, vt vrinæ vias aliquando omnino præcluderet, ægrotantiq; grauissima symptomata inueheret: quamuis manu prudentioris Obstetricis aliquoties suo loco restitueretur: attamen perforatus tandem, atque inuersus esse, ante pubis orificium dependens, & copia vrinæ impletus, deprehensus est. Idcirco meo cōsilio leuiter compressus, vrinam exceptam per foramen, proculdubio ex corrosione factum, reuoluit, adeo vt inuerti rursus & subleuari melius, inq; sinum pudendi rursus inseri potuerit: quauis pristino suo loco restitui, ob dolorem nequirit. Spatio igitur vnus mēsis malo hoc ter quaterue recurrente, dictoque modo vrina expressa, vniuersus deniq; vteri interior venter, totus corruptus & lacer excidit, intolerabili ferè fœtore dependens, quem nullo prorsus sensu præditum, vtpotè partem emortuam, & gangrenosam, Obstetricem excindere vnde & vsque quaque iussi. Locum ve-

rò affectum, vapore odoratarum herbarum & seminum decoctorum foueri, à quo etiamsi meliusculè habere cœperit, vrinamque liberius emiserit, quid tamē postea factum sit, discedens non rescui.

Historiam hanc D. Christophorus Rumbaum Medicus Iaurauiensis, mihi (cū apud nos summum in arte titulum assumeret) communicauit.

V.

DE PESSARIIS.



PESSARIORVM duo sunt genera: alia enim in ceruicem solum vteri induntur, & quibusdam Lemnisci dicuntur: alia in propriam vteri cauitatem intruduntur. Horum materia diuersa est: aliqui enim ex sola cera: alij ex subere, cera tecto: alij ex ferro albo, cera obducto: alij ex argēto, aut auro excauato conficiunt. Horum etiam figura diuersa existit: alij enim ouali, alij rotunda, alij ex rotunditate oblonga & obtusa, alij inæqualibus lateribus aut in angulos obtusos, alij forma cordis depressi efformant: sic aliqui perforatos, aliqui non item, effingunt.

Verūm

Verùm diuersimodè etiam induntur: alij enim ad alterum extremum funiculum alligant, quo cùm lubet extrahere, possint: alij absque funiculo intrudunt: ita tamen, vt cùm volunt eximere possint: alij denique nunquam eximunt, vt sunt illa, quæ ad vteri capacitatem intruduntur. Et licet Authores de his, dum de vteri agunt procidentia, quædam proponant, attamen placet Pessaria, vel Circulos, quibus Pessariorum loco in vteri procidentia nostrates vtuntur, pponere.

PESSARIORVM FORMAE


Nostrates filum sumunt subtilissimũ, quod delicatè obuoluunt, globum ouali figura, ouo tamè paulò minorem, efformant, què cera virginea obtegunt, ac in vteri collum indunt. Solet autem globus hic, dum menstruis laborant, elabi.

Alter modus.

Aliæ verò hoc pacto conficiunt: accipiunt nucem iuglandem excavatam, quam cera virginea affabrè obducunt, forma & magnitudine ferè oui galinacei, & in internam vteri concavita-

rem Obstetricis opera ingeri patiuntur. Quod ut facilius fiat, fluxu menstruorū ferè deficiente, foribus ac infessibus macticis ad oris vteri relaxationem vtuntur :

Pessorum ouatorum effigies.



dein, Pessarium indunt: tum, locum astringētibus & corroborantibus fouēt, & decubitum supinum atque tranquilum præcipiunt. Tale Pessariū apud nobiles Germaniæ matronas, si vteri procidentia laborēt, in vusu esse consuevit: cuius hæc est forma:

A Monstrat Pessarij corpus.

B Funiculum (si quis velit) ad femur religandum.

CIRCULI VTERINI.

Pessariorum loco in vteri procidentia, circulis aliquæ uti solent matronæ: quare Circulorum formam à socru mea, P. M. (quæ in arte medica fuit versatissima) mihi communicatam, quibus in multis vsa est matronis, proponam.

Accipe

"Accipe radicem Vitis syluestris, & ex ea circulos rotundos, modò maiores, modò minores, pro ceruicis vteri magnitudine, paruitatēve conficito: dein accipe Ceram virgineam q. s. cui adde Resinæ albæ, aut Terebinthinæ parum, liquefiant simul: tum Circulos prædictos huic ceræ resinæ mixtæ toties immergi- to, vsq; dum crassitiem debitā acquirant.

Circulus talis in vteri collum inditur, qui si minor sit, quàm oporteat, excidit: sin verò iustam habeat magnitudinem, sine vlla noxa remanet, nec facile elabitur: & melius est vt non eximatur, sed vt vsque dum spontè excidat, relinquatur: quòd si verò excidat, nec dum curata sit mulier, alius indendus erit.

Circulus alter.

Iohannes Bauhinus, Illustr. Principis Vuirtembergici, &c. Archiater, frater meus chariss. ad procidentiam vteri Circulos ex filo argenteo rotundo cum furca trifida ex eadem materia parata, confici curat. Hic sine vi in collum vteri intruditur, qui interdum facile, nisi educatur, hæret: sin verò à pondere vteri pro-



pellatur, fascia retinendus erit. Hactenus de Pessariis.

VI.

DE SUPERFOETATIONE.

SUMMVS Medicinæ dictator 5. Aphorif. 51. *Qua utero gerunt, iis os uteri comprimi, dixit: & Galen. in Com. Si os uteri claudatur, conceptionis indicium statuit.* Hinc factum, ut pro cōfesso fuerit habitū, os uteri in prægnantibus nō reſerari, cūm 14. de Vſu part. 3. Galenus dicat, à conceptu vſq; ad tempus ipſius par- tus ita occluſum eſſe os uteri, ut ne qui- dem apex alicuius acus indī poſſit. Ve- rūm rationibus, quæ in hanc rem adduci poſſent, in præſens relictis, dicimus os uteri etiam in prægnantibus reſerari: id ex eo liquet, quòd mulieres etiam graui- dæ ſperma reiiciāt: probatur quinetiam exemplis ſuperfoetationis & molarum, quæ poſt fœtus conceptionem generan- tur: nec huic rei aduerſatur Anatome, fa- cilè enim id fieri poſſe, ea nobis oſtendit: ſecundina enim dicta tunica, vni tantūm
uteri

vteri partī adhæret, vt rectè nobis Valuerda in sua proponit Anatome. Sed superfoetationem aliquot exempla proponamus, quæ rationes contrarium sententium satis infringent. Verùm Plinij verba, quæ in hanc rem habet, afferamus, dein nouis historiis, Germanico sermone mihi cōmunicatis, rem cōprobemus.

Plinius libro 7. capite 11. Naturalis historiæ, inquit: Præter mulierem pauca animalia coitum nouere grauida: vnum quidem omninò, aut alterum superfoetat. Extat in monumētis etiam Medicorum, & quibus talia consuetari curæ fuit, vno ab ortu duodecim puerperia egesta. Sed vbi paululum temporis inter duos conceptus intercessit, vterque perfertur: vt in Hercule & Iphiclo fratre eius apparuit: & in ea, quæ gemino partu, alterū marito similem, alterum adultero genuit. Item in Proconnesia ancilla, quæ eiusdem diei coitu, alterum Domino similem, alterum Procuratori eius. Et in alia, quæ vnum iusto partu, quinque mensium alterum edidit. Rursus in alia, quæ septem mensium edito puerperio, insecutis mēsis geminos enixa est. Hæc tenus Plinius.

HISTORIA I.

ANte annos circiter triginta, Ioannis Pflieges, Rustici vxor, in Rixheim, Suntgauiæ pago, duobus Basilea miliari-
ribus, gemellos vtero gestauit, quorum
primus iustum post partū annum vnum
superuixit: alter verò sex septimanis
post fratrem suauissimam hanc primū
aspexit lucem, qui non ita pridem adhuc
(octo habens liberos) in viuis fuit.

HISTORIA II.

CHristiana Schlechtin, Michaelis Vo-
gel, Prætoris pagi Büllickheimensis
(duobus cum dimidio Basilea miliari-
bus) vxor, priori marito, cū quo decem
habuerat liberos, defuncto; alterū cum
prædicto Prætore matrimonium contra-
xit, & circa quinquagesimum circiter æ-
tatis annum grauida facta est (postquam
in matrimonio annis fuisset triginta.)
Gestationis tempore completo, Anno
1575. Aprili mense, & quidem die Do-
minica, circa diem S. Georgio sacrum,
doloribus partus corripitur, puellam fe-
liciter, quæ postmodum Maria nomina-
ta, enititur, quæ dies solū quindecim
super-

superuixit. Finito puerperio, cū ad consueta pperaret munia, septimanis quinque, & totidem diebus post primum partum, dum in vineis esset, nihil minus q̄ de altero partu cogitans, nouis doloribus partus corripitur: quare domum reuerſa, filium, qui patri factus est cognominis, enixa est, qui in hodiernum diem adhuc uiuit. Post hunc partum amplius vtero non gestauit: verū vt parentes, sic & filius, in hodiernum adhuc diem uiuit.

HISTORIA III.

ANno Christi 1584. posteaquam vir nobilis, D Philippus Ludouicus ab Hirshorn (cuius sedes fuit in Palatinatu, tribus ab Heidelbergamiliariibus: in oppidulo, quod eiusdem nobilis viri nomen sibi vendicat) rebus humanis exemptus esset, neque vllum post se hæredem reliquisset: vidua interim ipsius vterum ferente: statim ipsius defuncti agnati, & feudorum successores (vt qui vehementer dubitarent, ferrētne masculum grauida vidua, an potius fœmellam) non solum omne ius successionis feudorum, in omnem euentum, à feudorum dominis

obtinuerant: verùm etiã quia libenter plenam & fundamẽtalem notitiam omnium feudorũ & reddituum habuissent: ideò statim à morte prædicti nobilis, superstitem ipsius viduam, adhuc immaturam defuncti mariti mortẽ lugentem sua in domo operuerunt: eiq̃ue clauẽs ad cryptas & cellas è lumbis, non sine vi & vehementia detraxerunt. Quæ res adeò miseram & tristẽ viduã affecit, vt coniectis in verticem suum manibus, vociferari & eiulare magis cœperit: vt quæ grauiter molesteq̃; huiusmodi sæuitiam & agendi modum ferret. Quin etiã paucis interiectis diebus, tandem peperit, & quidẽ egregium puellum, sed mortuum, & caluaria carentem.

Cæterum cùm agnati & hæredes defuncti Nobilis, ea de re certiores facti essent, persuaserunt sibi, suam ipsorũ spem iam expletam, & ipsos sui compotes vori factos fuissẽ. Quare ius suum in vtenda, fruenda hæreditate feudorum persecuti sunt. Sed Deus Opt. Max. velut è saxo alium partum masculum, & paternorum bonorum hæredem viduæ illi mœstæ & desolatæ suscitauit, atq; donauit.

Etli enim non ita pridem puellum enixa

nixa esset, tamen subtumida à partu remansit: nihil aliud suspicata, quàm vel tumorem præter naturam, vel aliquem morbum in suo residere corpore. Id quod etiam aliquibus Medicis (quorum consilium separatim requisitum & auditum est) visum fuit. Causam enim morbi quiduis aliud existimârunt, quàm quòd ipsam grauidam adhuc esse, suspicarentur. Quare consilium ei dederunt, vt ad Thermas fontis acidi ad Rhenum (bey Elsal am Rhein) sese conferret. Ad quas illa Thermas, secuta ea in re Medicorum consilium, vt vidua mœsta & orba, vnica ancilla comitata, profecta est.

Verùm enim uerò vt tandem mense Iulio 1584. eò loci venit, ob Thermas: accidit, vt ibi inueniret Electoris Saxoniae Augusti (qui paulò antè in fata concesserat) viduam: nec non alios, aliasque Principes: qui ita loca præoccupârunt, vt ipsamet in diuersorio locum manendi non inueniret: præsertim cum nemini notum esset, quæ, qualisue matrona foret, quæ vnica tantum ancilla comitata venisset. Porro tandem eius loci Præfecto, quænam esset, significans: & suum ei casum, qui nō ita pridem acciderat, com-

memorans : ægrè ab ipso hospitium adsequentem noctem obtinuit.

At verò ea ipsa in nocte, cum iam decima ageretur hebdomada, à priori & proximo partu, Deus Opt. Max. ipsam & mœstam atq; adflictam, & apud peregrinos, pulcherrima prole mascula, eaq; viua, ditauit. Id quod statim fando peruenit ad aures Illustriss Principum.

Et quidē ei Elector Moguntinus lautum ac nobile puerperium instituit: defunctus verò Elector, eidem mille Thaleros dono dedit. Quin etiam omne ius hæreditariæ successionis & feudorū ab aliis repetitū, & huic ipsius filiolo, hæredi videlicet legitimo, restitutum est.

HISTORIA IV.

ANna Cancerina, Christ. Schollers Sutoris nostratis vxor, cū iam annis aliquot fuisset in matrimonio, aliquoties grauida facta, feliciter enixa est: dein cum rursus vtero gestaret, accedente debito partus tempore, posteaquam toto triduo leuibus doloribus partus fuisset diuexata, Anno 1587. Ianuarij 25. hora 6 matutina, casu Embryonem è corpore elabi sensit, qui digiti vnus longitudinem

nem æquabat: verum eadem die vespere
ad horā sextam maximis conatibus par-
tus diuexata, alterum iusto partu fœtum
perfectum & viuente exclusit. Ambo
autem, vt narrauit Obstetrix, vna conti-
nebatur secundina. Sed de hoc hætenus.

UTERVS BI-

PARTITVS.

ANNE mulieres ex, quæ superfœ-
tare solent, aut plures fœtus, quàm
duos generant, bipartitum vterum ha-
beant, quemadmodum canes, lepores, &
similia animalia, quæ multos generant
fœtus, mihi dubium mouit Fratris mei
chariss. Ioh. Bauhini obseruatio, qui cir-
cā annum 1565. dū ordinarius esset Lug-
dunensium Medicus, & Chirurgis A-
natomen demonstraret, in quadam puel-
la vterum bipartitum, qualem canes ha-
bent, obseruauit: quod vt rem valdè ra-
ram, doctissimis Medicis Lugdunensi-
bus, ac multis aliis demonstraui. Ea er-
go dere, Anatomici, si mulierū corpora
talía occurrant, cogitabunt, cuius nomi-
ne hoc proponere libuit.

P A R E R G A D V O.

I.

I N T E S T I N I C I T R A

*mortem vulnerati**historia.*

VM in Præfatione libri primi nostræ Anatomies, qui est de totius corporis humani partibus externis, polliciti sumus, nos huic Opusculo addituros intestini secti historiam, eam nunc proponamus: hæc enim simul probabit Peritonæum læsum spasmus non inducere; vulnera item musculorum abdominis non esse lethalia. Res ergo ita se habet:

Adamus Brantz Rusticus pagi Richani, ditionis Basiliensis, cum diu ^{ἐντερο-}
^{κήλη} laborasset, tandem sectionem pertulit, probeque curatus fuit. Verum biennio post (annos circiter triginta natus) in eundem penè morbum incidit: ita tamen, ut non solùm intestina, sed & omentum delaberetur; idque, non ut prius, in scrotum, sed ad latus inguinis sinistri, tumor ex Peritonæo rupto obortus: quo
cum

cum morbo diu fuit conflictatus. Cum autem malum ingrauesceret, ab omni opere abstinere fuit coactus: quare quò se sustentaret, stipem quærere eū oportuit. Dum ergo anno 1586. intensissimo existente frigore ostiatim stipem peteret, factum ut ex femoralium attritu, non solum cutis, sed omnia cuti subiecta usque ad omentum attererentur: hinc cum malum iam sphacelum minaretur, lecto se continere eum oportuit. Cum ergo lecto iam affixus esset, per patrem suum, pagiq; Præfectum & consilium meum, & Lithotomi operam imploravit: & licet in Anatome publica (quæ in decimū tertium diem à me fuit producta) tum essem, ut qui & sectoris & præsidis munere fungi soleā, occupatissimus: diem tamen illum, frigore ita concedente, ægroto, & misero, & pauperrimo tribuere volui.

Deductis ergo mecum in pagum studiosis aliquot Medicinæ (inter quos fuere D. Iacob. Gregorij Pannonius, nunc Medicinæ Doctor, & Daniel Pynusius Polonus, iuuenis, ut totius Medicinæ avidissimus, maximè verò in studio tam Anatomico, quā Botanico diligentissi-

mus, ideoq; mihi familiarissim) vnà|cū Lithotomo, eiusq; comitibus ægrotū, eiusque casum inspeximus: tum consilium iniimus: & licet à sectione, tanquā à casu penè deplorato, abstinendum esse consultius duceremus, ægroti tamen precibus victi, cum Celso, melius esse experiri anceps remedium, quàm nullum, arbitrati sumus.

Quare rei difficultate, quæ cum summo esset iuncta periculo, exposita, rem aggressus est Lithotomus. Sed priusquā progrediamur, qualis fuerit tumoris exterior facies, paucis exponamus, tum sectionem subiungamus.

Detecto ergo Abdomine, in sinistro Hypogastrij latere, tumor infantis caput æquās, apparuit, cute cum subiectis partibus exulcerata: stylo ergo profunditatem sumus explorati, qui in ipsum abdominis cauitatem sine molestia vlla intrudebatur, & quidem penè absque omni ægroti dolore, qui vix dum stylum persentiebat: quod sanè argumento erat etiam Peritonæum ipsum læsum esse. Sed & pinguedo, quæ supra tumorem conspiciebatur, facileque stylo, sine vllō ægroti dolore amouebatur, omentum id esse

esse satis ostendebat.

Re itaque, vt dictum, deliberata, ægrotus eo modo quo solent ij, qui Herniæ causa inciduntur, primùm tractatus, mox tabulæ superimpositus, ligatur: tū magnum in abdomen vulnus fuit inflitum. Quo facto, intestina prolapsa, irritò tamen conatu, reponere tentauit: adeò enim flatibus erant distēta & omento annata, vt ne vix quidem manibus ab ipso separari possent.

Cū ergo intestina quasi capta continerentur (eo modo quo solet fieri in iis, q̄ ruptura Peritonæi supra vmbilicum laborant, quibusque voluulus superuenit) (cuius rei apud nos etiam ante paucos annos habuimus exemplum: qui tamē, magna Peritonæi adhibita sectione, probè curatus, in hodiernū adhuc diem viuit, mihi Galeni authoritas & magna illa Peritonæi sectio ab antiquis vsurpata, in mentem venit. Galeni quidem authoritas, qui magnitudinē vulneris musculorum abdominis periculosam non esse, satis ostendit, dum præcipit eiusmodi vulnera in toto abdomine esse dilatanda, si minora videantur, quàm sufficiant repositioni intestinorū, aut omen

ti, si sint prolapsa, nec reponi possint. Magna verò Peritonæi sectio, cuius Galenus, Cornel. Celsus, & Paulus Ægineta, dum de Gastroraphia agunt, meminere: ubi monent, Peritonæi vulnus, si angustius sit, quàm reponendis iis, quæ extra abdomen prolapsa sunt, conueniat, ampliandum esse.

Quare subitò ut Musculorum abdominis vulnus, & Peritonæi ruptura dilataretur, ne intestina diutius foris propenduntia refrigerarètur, consultum visum fuit. Dilatato ergo vulnere (sine tamen magna hæmorrhagiâ) nec dum intestina reponere potuit, quare cultello ab omenti & ad latera à Peritonæi membrana, cui erant adnata, ea separare oportuit, quod tamen sine læsione fieri nō potuit: hinc factum, ut ex tenuibus intestinis vnum leuiter læderetur.

Hoc peracto, cum intestina ab omni ferè omenti parte essent soluta, intestinumque læsum foret consutum, omnia in abdominis capacitatem fuere reposita, tum leui gastroraphiâ vulnus consutum: totaque hæc operatio, absque vlla lipothymia fuit absoluta.

Cum postmodum excrementa nō per aluum,

*Vide cap. 23.
tract. de Vul
ner. Fallopij.*

aluum, sed per vulnus reiiceret, aliquoties clysmata ad aluū sollicitandam fuere iniecta: nunquam tamen clyσμα, licet larga manu decoctum fuisset administratum, ad vulnus peruenit, sed vt iniecta, ita etiam fuere reiecta.

Vulnus autem abdominis (non verò intestini, ne quidem in hodiernū diem) coaluit: fæcū verò nihil omninò, etiamnum per anum reiicit, sed per ipsum intestini vulnus, quod circa vmbilici latus sinistrum remansit: verūm dolorem nullum perfert, nec quando excrementa effluxura sunt, persentit: forti tamen ligatura vtitur, & difficilioribus rusticis operibus præesse non potest.

Causam quærentibus studiosis, cur, cum excrementa per vulnus reiiciantur, clysmata non etiam eò pertingant. Ad hoc respōsum fuit, clysmatum materiam ad intestina tenuia, meo quidē iudicio, naturaliter non peruenire, quod & autoritate & ratione probamus.

Clara est authoritas Galeni 5. Meth. med. 11. quæ habet: *Superioribus intestinis ulceratis, vtendum esse medicamentis per os assumptis. Quod enim per sedem iniicitur, inquit Galenus, ad ea quæ sunt vicina ventriculo subire ne-*

quit. Non minus perspicua eiusdem altera 13. Meth. med. 17. sentētia, vbi inquit Quæ per sedem infusa sunt, ea omninò ad ieiunum vsq; ascendere nequeunt, imò si admodum nitaris, fortasse tenue tantum intestinum contingent.

Ratio verò à VALVULA COLI INTESTINI desumpta est, quæ id impedire potest: sed cum de hac Valuula breuibus tantum in Præfatione libri 1. Anatomes nostræ dictum fuerit, fusius de ea nunc verba faciamus,

VALVULA IN INTESTINO

*Colo, Anno 1579. à me
reperta.*

DV M Lutetiæ Parisiorum, studiorum gratia versarer, inter cætera studia priuatim in Anatomico studio cum Cl. viro D. D. Thoma Coccio populari, me exercere, contigit vt Anno 1579. dum inter cætera quæ à me dissecebantur, curiosius intestinorum structuram rimarer, ea penitus à Mesenterio liberarim, & ad eorundē fibras & tunicas considerandas, abluerem, aqua modò per ieiunum, modò per rectum intestinum infusa. Quod cum facitarem, aquam per
ieiunum

Ieiunum infusam facile, & quàm citissimè elabi obseruauí: per Rectum autem infusam Colon intestinum nō pertransire, etiamsi intestinum leuiter comprimeretur. Quare, quidnā eò loci occurreret obstaculi, perquirere lubuit.

Inueni ergo in Colo intestino, eò loci, ubi tenue intestinum, Ileon puta, finit, & appendix lumbricum referens, Cæcum quibusdam dictum intestinum, apponitur, ad Coli nimirum principium, insignem VALVVLAM, latitudine penè vnguem ipsius pollicis æquantem, crassam, membranofam, &c. Quod tanquā nouum, à nemine hætenus literis traditum, tum temporis multis, præsertim verò Clar. viro D.D. Guilielmo Capello, Professore Medico, & Præceptore meo humanissimo, ostendi.

Sed & hætenus in publicis Anatomis Academiæ nostræ, quibus in octauum nunc annum præsum, eius à me facta fuit mentio: maximè verò in duabus Anatomis, quas anno 1586. administraui (posteaquam à Succenturiato meo D. Daniele Prynusio mundata fuissent intestina) totí amplissimo confessui oculis subieci, aqua & per superiora, & per in-

inferiora infusa : eandem etiam palpan-
dam exhibui. Eadem etiam intestina,
quò rectius eorum longitudinem (quæ
24. erat nostratium vlnarum) dimetirer,
in iisdem Anatomis folle insufflari cu-
raui, tumq; temporis ne quidem flatum
Valuulam hanc pertransire fuit obser-
uatum.

Cùm verò dubius essem, an in bru-
torum etiam intestinis talis reperiretur
Valuula, hoc anno, nimirum 18. Iulij,
dum hæc scriberem, in studiosorum Me-
dicinæ gratiam, Canem, aliasque alio-
rum animalium partes, in quintum seculi
diem: idq; eius nomine, quò ea, quæ pu-
blicè hætenus in Anatome, & quidem
methodo secandi docuisssem, ipsorum o-
culis subiicerem : eam etiam Valuulam
in canis sectione inquirere visum fuit.

Cùm ergo inter plures doctissimos &
studiosissimos, qui sectioni astabant
spectatores, D. Antonius Boucardus Lo-
tharingus, huius studij, vt & rei herba-
riæ curiosiss. mihiq; amiciss. hoc sibi la-
boris sumpsisset, vt Canis intestina mun-
daret, aqua tam per superiora, quàm infe-
riora infusa, impleret, & inuerteret: eam
etiã Valuulã ipsis ostendi, quæ tamẽ non
Valuu-

Valuulæ humanæ, sed Circulo similis erat. Et hæc est Valuulæ huius inuentio, & inueniendi modus, qua in re prolixior fui, non sanè eius nomine, vt me esse inuentorem iactitarem, sed vt Lectori pateret quādo fuerit inuenta, & quomodo inuenienda sit, cū sciam etiamnum Clarissimos viros eam & negare & inuenire non posse.

Vsum huius Valuulæ quod attinet, eum esse arbitror, ne excrementa ex tenuibus intestinis ad crassa delata regurgitare possint: nec obstat id, quod sæpius mihi fuit obiectum, morbum nimirum Iliacum dictum, contrarium ostendere: quo probare nituntur, Valuulam hanc non omnē penitus viam intercipere. Sed quid rationibus opus est, cū *ἀντιπρὸς* obiectionem soluat? & quod nihilominus Iliacus possit fieri morbus, nō negamus: tanta enim cum violentia morbus is accidit, vt non solum Valuula hæc cedere, sed etiam facilè frangi possit, cū ipsa excrementa etiam pylorum, cui natura Circulum apposuit, referent. Sed de his & similibus in nostris libris Anatomicis, Deo iuuante, fusiùs sumus acturi.

*CORPVS SINE HEPATE
& Liene inuentum.*

ANno à Christo 1564. die verò 11. Septembris, hanc vitam reliquit Dominus Matthias Ortelius, Mercator oppidi Antuerpiensis celebris, natione Germanus. Duodececima verò facta fuit eius corporis sectio, à Chirurgis eius rei peritis, me præsentem Medico, vt constitutionem partium nutritioni seruientium videremus, præcipuè Hepatis & Lienis: nam aliquot annis antea Hydrope laborauerat, q̄ morbus, affectus Hepatis, vel primario, vel secundo necessario comitatur, cumque sub septo transuerso, seu diaphragmate, atque costis spuriis, Hepar & Lienem quæreremus, ne vestigium quidem illarū partiū inuenimus. Casus profectò inauditus, & admirabilis: at substantia omnium intestinorum carnosæ prorsus erat, & multò solidior, q̄ ipsa muscutorū caro, vt soliditate Cordis carni ferè respōderet, & vena caua ex ipsis intestinis suam originem sumebat, eo ferè modo, quo vena porta in ipsis intestinis solet implantari. Hæc sanè causa

sa fuit, quòd toties inflammatione & abscessu intestinorum laborarit: facilius enim quod carnosum, quàm quod membranosum est inflāmatur, & abscessibus torquetur. Nā carnosæ partes plus, membranosæ verò minus sanguinis & humoris participant.

LAMBERTVS TVLVATANVS


Medicus, ciuibus Antuerpiensibus
adiuratus, manu propria
hanc historiam texuit.

Ego Thomas Comaus, Chirurgus & Tonsor Antuerpiensis, attestor, me Dominum Matthiam Ortel Augustanum, pie memoriae, post eius obitum, in praesentia Domini Lamberti Tulutani Medici, mea ipsius manu secuisse, & in eius corpore inuenisse, ac vidisse, quemadmodū praefati Medici testimonium asserit, in cuius rei fidē manu ppria me subscripsi.

THOMAS COMAVS.

Historiam hanc Cl. vir D. D. Iohannes Iacobus Schiſſerus Medicus Augustanus, cū à Clariss. viro D. D. Thobia Cneulino accepisset, mihi per literas communicauit.

FINIS.



P O R T E N -
T O S V M L I -
T H O P A E D I O N ,

S I V E

E M B R Y M P E -
*tre factum urbis Se-
nonensis.*


Adiecta leui & succincta exercitatione:
eaque Academica, de huius indu-
rationis causis natu-
ralibus,

A

IOAN. ALBOSIO *Haduo, apud
Senonas Medico:*

cui accessit


SIMONIS PROVANCHERII *Medici
Senonensis, de eadem re
Opinio.*



B A S I L E A E.

**Historia EMBRYONIS in vtero mater-
no per annos xxix contenti petre-
facti, & post matris mortem exfecti,
hic describitur.**

IOANNES ALBOSIVS
Hæduus, & apud Senonas
Medicus, Lectori
S.



NOSTRA huius spectaculi, quod prisca ætas aut non vidit, aut de eo scriptis, quæ ad nos pervenerint posteritati fidem non fecit, nos excitauerat superioribus mensibus ad exprimendam huius prodigij iconem, quam ad amicos naturalis Philosophiæ studiosos, utrò citroq, mitteremus: tum quia esset de earum genere, quæ ab illustri causa, ut scribit Plinius, perpetuitatem merentur: tum lib. 34. cap. 4. Natur. hystoriæ. etiam, quia præter alios multos graues viros, Pareus ille Protochirurgus Regius (cui nostra ætas multum debet) nos ad id studium excitasset. Sed cum Doctorum nemini esset ea in re satisfactum, quòd quererentur istud esse veluti in Comædia no-

Φεν πρῶτον, postularentq, ut personam
 loquentem faceremus, & utraq, lingua,
 quò etiam ignaris linguæ Latinæ studere-
 tur, & ad exteros quoq, Portenti fama &
 forma, non sine aliquo usu perueniret: pa-
 rere, visum est aquisissimum, tum quia fo-
 ret piaculum tam portentosam rem silen-
 tio præterire, qua monemur nos λίσσασθαι
 διοι petere supplicibus votis à Deo, qui re-
 rum omnium est prima causa efficiens, &
 πρωτοπλάστης, ut nobis det cor carneum,
 quod iam ad omne scelus occalluit: tum e-
 tiam ut nostra urbecula, quæ suorū stem-
 matis, virtute, & veteri gloria adhuc ful-
 get, noua veluti præconis voce, toti Gallia,
 imò & toti orbi, summi numinis ostenta
 promulget. Protypum autem efformaui-
 mus de nouo (quò sint δ' ἔπειτα Φροντίδες
 σοφώπαι) ut te, quem latere nihil volu-
 mus, quasi in rem præsentem deducere-
 mus, & infantulum, & in sinu uteri laten-
 tem, & suo tegmine explicitum, & in hæc
 & illam dimensionem, quantum cedere
 potuit corpusculi (per multas horas aceto
 macerati) diuities, protensum conspiceres.

Adiici-

Adiecimus etiam nudam historiam, nullisq; coloribus fucatam (verissimam tamen) huiusce Anatomes, adhibitis ad eam confirmandam oculatis & fidelibus testibus, Iohanne Perigois, Simeone Prouancherio, & Iohanne Rouffelet Medicis & collegis nostris: item & Glaudio le Noir, & Iohanne Cottias Chirurgis, à quibus extractum fuit Embryum illud, Stephano Bouvier Pharmacopæo, manum operi admovente. In historia autē calce, obiter inquirere visum est, veluti per ἀπόρημα Pyrrhonis illius Sceptici exemplo, tanta duritiei causas, ut tecum ludere liceat, non contendere (cū sape verisimile à vero longissimè absit) utq; eo veluti praludio, doctiores prouocentur ad acriora certamina, quibus huius μεταμορφώσεως in tenello natura corpore, Physica ratio quæcunq; fuerit (cū in eo opere τὸ θεῖον etiam illucere putemus) melius innotescat. Opellam hanc nostram, qui tibi si non prodesse, saltem placere studuimus, amice Lector, æqui boniq; consule. Datum Senonis Idibus Octobris 1582.

In iconem Lithopædij ἐξάσινον]

IOAN. ALBOSII.

Finxit Deucalion saxis post terga repulsis,
 Ex duro nostrum marmore molle genus.
 Quî sit vt infantis, mutata sorte tenellum
 Nunc corpus saxis proxima membra gerat?
 Flectebat priscos diuina potentia mores
 Nullo hodie flectas saxeæ colla iugo.

Iocus puerilis PETRI ALBOSII impu-
 bis ad Patrem obseruandissimum
 IOAN. ALBOSIVM Medi-
 cum, de eius Litho-
 pædio.

Quæ noua progenies ista est? Irâne Deorum
 Nata mihi soror est, Gnataq, nata tibi?
 Non agnosco tuos in duro marmore vultus,
 Namq, pium, tenerum, molleq, pectus habes.
 Degener huicq, animus nulla pietate parentem
 Respicit, aut fratri est blandior illa suo.
 Attamen arte tua (quæ virgo sepulta iaceret)
 Viuit, & est heres nominis vsq, tui.
 Isti ergo inuideo sortem, nisi saxeæ moles
 Et cedat fratri, cedat & illa patri.

De

De Lithopædio Senonensi, in Zoilum
sui partus Cæsarei calumniatorem,
FRANCISCVS ROVSSE-
TVS Medicus
ad

IOAN. ALBOSIVM Medicum
amicissimum.

*Hæc lapidosa caro, cùm tempestiua sub auras
Vitales primam vellet inire viam.
Insoniti fertur spirans Lucina nouercam
Præclusisse via parturientis iter:
Sic frustra eluctans, diuiso ventre parentis
Matre tamen poterat sospite salua trahi.
Terruit exempli nouitas, suspecta recluso
Sic vtero matrem viuere posse negans.
Ergo ibidem lustris propè sex coniuncta coegit
Matrem, facta diu saxeæ massa, mori.
Cur potius quæso, gestati tempore tanto
Accipit hæc foetus saxeæ forma fidem?
Quam noua Cæsareo monstrans Chirurgia partu
Sospite qui foetu viuere foeta queat?
Vtilis hæc multis venit ars, at inutilis iste
Aspectus, solo nos nouitate mouet.
Vt pateant oculis subiecta fidelibus ambo,
Sæpius hæc illis, visa fuere tamen.
Et dubitamus adhuc manifestis credere, quamuis
Non fuerint priscis scripta voluminibus.*

Nempe Dei bonitas, largo mage fonte ministrat
 Natura tacitas prodiga semper opes.
 I nunc, atq; omni dic omnia Zoile seculo,
 Aut vni potius nota fuisse viro.

Ad puellam in vtero materno lapide-
 factam, SIMEONIS PROVAN-
 CHERII Medici, Epi-
 gramma.

Cuius non esset suppressa memoria morte
 Querenti, aterna surgit origo duplex.
 Per magna virtutis opus via prima docetur,
 Ingens per vitium proxima deinde patet.
 Has ego, nec plures, ineunti lumina vitæ
 Credebam geminas constituisse Deum.
 Nunc admitto nouam, qua tu mea filia viuus,
 Vita expers: viuus, nec tibi vita fuit.

Aliud eiusdem.

Per genus & sexum viuas mea filia quantum
 Est hominis, nunquid vita perennis erit?
 Nam de plebe tuum genus est, es femina sexu
 His viuas, brevis est vita futura tibi.
 Pro mortis damno reddit te fama perennem,
 Mortis quàm vitæ, sors igitur melior.

ENAR.

ENARRATIO


τῷ λιθοπασιδίῳ,

S E V

EMBRYI CVIVS-
DAM LONGA TEMPORIS
*mora in Matris utero in saxeam duri-
tiem concreti, quod ex gestantis cadauere
extractum est, in vetusto Gallorum Seno-
num oppido XVI. Maij. Anno
CICIDXXCII.*

ADIECTA QVOQUE EST
succincta & levis quædam exercitatio,
eaque Problematica, de istius induratio-
nis causis naturalibus, vt postea penes
Lectorem sit huius iudicij
summa.

HISTORIA EMBRYONIS
petrefacti.



VLIER Senonensis, nomine
Columba Chatry, quæ Lu-
douico Carità homuncioni
(quadrato tamen & bene ha-
bito) ex vulgari plebe & sarctori vestia-

Q 5

rio nupserat, ab annis quadraginta octo, fracta ætate & valetudine, hîc occubuit decimosexto mensis Maij, annum ætatis agens sexagesimum octauum.

Hæc ante annos viginti octo, quæ nunquam antea vterû gestârat, licet iam pridem nupsisset (nihil de sanitate prius admodum conquesta) certissima habuit inchoati hominis indicia. Nam qui statis periodis erumpere solebant menses, illi statim substituerunt. Pica primis mensibus laborauit, tempestiuum Embryonis motum & frequentem persensit, tumore lumborû & abdominis paulatim subcrescente, mammisq; lacte turgentibus. Tandem autem decurso penè veræ gestationis curriculo, labores puerperij graues & abdominis dolores experiri incepit, vrînâ ad aliquot dies suppressa (Medicis tunc varia & dubia de illa νοσφορία sentientibus) quæ postea corrente veluti alueo & magna vi erupit, profuso illo ichore, non tam ex vesicæ meatu, vt credibile est, scaturiente, quàm ex mulieris oculis, Amnio tunica disrupta, cum vnâ cum istis serosis recrementis (quas mulierculæ aquas vocant) aliquis concreti sanguinis trumbus emerit.

ferit. Inde autem & mammæ concidere *Hipp aphor.*
visæ sunt, motus infantis aut ignauus, 38. lib. 5.
aut nullus, labores mulieris tolerabilio-
res. Quibus omnibus attonitæ fuerunt
Obstetrices, quæ antea certissimum puer
perium expectassent.

A ludibrio autem istius foeturae, to-
tum triennium lectulo illa decubuit, ad
extremam vitæ calcē de valetudine con-
quista, de tumore, de duritiæ, de tormi-
nibus alui (quam obuiis quibusque &
Chirurgis & Medicis tractandam exhi-
bebat) de inutili & graui illo pondere,
quod pro vario gestantis motu, modò in
hanc, modò in illam partem procumbe-
bat. Denique de languente & deprauata
appetentia, quā subinde acetariis & ab-
sorpto omphacio sollicitabat, alioqui
perpetuò ἀσθενῶσα. Illamque, ferunt vicinæ,
inter suos sales sæpè dictitasse (vt erat ge-
nio satis lepido) se foetum vtero gerere,
qui tandem parenti foret exirio, & inter-
necioni, quanquam cū seriò loquere-
tur, maleficiū acceptū potius accusaret.

Postquam autē fato esset functa, eius
vir officiosus in vxoris manes (quā tan-
diu & tantoperè excruciatam viderat)
accerſiuit vnum atq; alterum ex nostris

Chirurgis, ambo valentes arte & artis
vfu, quibus (licet de scirrholo tantum
tumore cogitarent) dissecto mulieris ab-
domine, & reiecto infrà peritonæo, vte-
rus sese offert, aspectu quidem rugosus,
& versicolor, vt crista illa pendula, quæ
Gallis Indicis ex summo capite prola-
bitur, vel potius vt operimentum illud
cutaneum, quod illorum collum ambit.
Tactu autem durus, testaceus & crassus,
instar τῶν ὀσπριοδέρμων. Tum nouaculam
in portētosam illam molem & gypseam
iniiciunt, qua ad aciem cultelli reniten-
te, scalprum altius adigunt. Eorum au-
tem alter inflicto casu in cranium vulne-
re, & in aliquot costas, tandē humerum
dextrum impetit, à quo erumpens ossis
caput, certissimam fecit fidem ossium il-
lic latitantium. Ex quo scalpellum aliò
transferunt, & magna vi, sensim tamen,
& rectà, vterum secant, diductisque du-
rissimis vulneris labris, infantem in or-
bem implicitum, & extransuerso in vte-
ro positum, introspiciunt in penitissimo
sinu, & altissimis latebris stabulantem,
in suamque veluti Cystin, quam Allan-
toidem tunicam fuisse puto, callosissi-
mam reconditum.

Quo

Quo spectaculo inexpectato obstupefacti, Medicos conuocant, quos in re inaudita consulant, adhibeantque in testimonium & iudicium rei huius, quæ penè fidem omnem superet. Interea multis ad nouum prodigium accurrentibus, & opus Chirurgorum interturbantibus, venit ipsis in mentem totam istam molem ex illo veluti antro & manibus, & vncis Chirurgicis, quâ valerent, vi abstrahere vt arborem ex suo caudice, domumque comportare, vt priuatim & apud se accuratiùs corpusculi anatomen sectarentur, & cum peritis de portento nouo & inaudito, consilia conferrent.

In præcipiti autem & violenta illa laniena non licuit opus festinantibus introspicere, quod substratum esset infantulo Chorion, quæ vteri acetabula, qualia vmbilici vasa, quis esset Allantoïdis cum vtero & cum fœtu nexus, cum vterus ipse, præcipuè ad coxam dextram, ad nates, & ad partem spinæ dorsî cum cute infantuli omnino coaluisset.

Situs infantis erat penè sphæricus, facie ad thoracem affixa, sublati ad nares genibus, vnde postea ex patulæ retusæ & resimæ conspectæ sunt. Ossa capitis

tenuia quidem, sed firma, & instar cornu
nitentia, cute capitis multis in locis pi-
losa, caput in sinistrum brachium ita
procumbebat, ut à protuberante hume-
ro auris & os Occipitis impellerentur,
quod incauatum ea parte introcessisse
conspicerentur. Cubitus ad summum
humerum reflectebatur, porrecta sola
manu, quæ in pugnum adeo firmiter con-
tracta, & summi digiti ita palmæ hære-
bant, ut licet apparerent seriatim inter
se distincti, re ipsa tamen in vnum idem-
que verè lapideum corpus concreuif-
sent. Dextrum autem brachium ad vm-
bilicum manum extendebat, quæ ad car-
pum inaduertenter abstracta fuit, & in
aluo matris relicta. Fœmur, genu, tibia
sinistra, dextris incumbabant: quibus
tamen erant ita implicata, ut talus fini-
ster pedisque planta, in dextrum Pedion
implantarentur, quibus excauatum ce-
deret, & penè indissolubili nexu collig-
garetur. Vtrumque crus in ventrem &
pectus reflectebatur, certissimamque fœ-
minei sexus notulam tegebat. Tibia v-
traque ad nates intorquebatur, pedibus
& pedum digitis ita inter se compactis,
& lapidefactis, ut facto ex oculis & ta-
ctu

Et iudicio, totum istud opus dixisses
esse alicuius Phidiæ, qui vel ex ebore,
vel ex marmore maturæ ætatis Embryi
absolutissimam Icônem expressisset, ma-
ximè cum in ea duritiæ corpusculi mo-
les non concidisset, imò cum cute nitida
integram suam & συμμετείαν & πολυσαρκίαν
retinuisset.

Partes autem internæ, viscera nempe
omnia, Cor & Cerebrum habebant na-
turaliter, eo dempto, quod ultra modum
induruerant, minus tamen quàm exter-
næ, ita ut hodie exertum istud corpuscu-
lum, neque putredinem minetur, neque
teredinem. Ex quo postea dentem exe-
mit inopinanter quidam obuius, qui
prodigium cōtrectabat, ut dentis sedem
in ipso alueario adhuc conspiceret liceat.

Hæc de matris & fœtus admini-
strata Anatome dicta
sunto.



EXERCITATIO

PROBLEMATICA DE I.

*stius indurationis causis
naturalibus.*




IA M de istius indurationis naturalibus causis aliquid disseramus. Huius autem prodigiosi abortus, nisi sensus nobis faceret fidem, frustra quæreremus, rationum momenta. Sed cum visus & tactus, certissimi inter sensus externos iudices, rem ipsam bis mille hominum oculis spectandam exhibeant, manibusque tractandam (ut hodie quoque idem inter nos & spectare & palpare subinde licet) tria videntur superesse liberalioribus ingeniis discutienda.

Vnū, quī factum sit ut corpusculum istud, quod constituta & naturali puerperij periodo, & inter tam graues cruciatus extinctum fuisse constat, tandiu in istis latibulis asseruatū, non computrueris, aliorum abortuum more, quos vel derepentē Matricidas esse videmus, vel paulatim & ex longis interuallis excusos fuisse, à grauibz authoribus accepimus.


Hanc!cone








Fold Out BACK PAGE





Fold Out FRONT PAGE



mus: vel facta sibi per ventrem inferio-
rem via, membratim excussos, cum hîc
tres putredinis causæ videantur concur-
risse: nempe corpusculi temperies cali-
da & humida, qualis est puerorum. Lo-
ci natura, cum vterus intertextus sit mul-
tis venis & arteriis, & visceribus (in qui-
bus residet naturalis caloris fons) proxi-
mus. Cum ille sit in mulieribus veluti
sentina, in quam totum corpus suorum
excrementorum sarcinam deponat, cum
denique sit pudendis proximus, quæ Ga-
lenus *σπινθηρώδη* pronunciat. Tertiò im-
pedita perspiratio, cum in prægnatibus
uteri os arctissimè, usq; ad excussionem
fœtus coarctetur. Sic enim, ut fert illud
insigne Philosophorum & Medicorum *Galen. in 3.*
axioma, calida & humida, calido & vdo *Epid. Com. 3.*
loco conclusa, & aere non perflata, citis- *¶ 1. de diff.*
simè situm contrahunt, & putredinem. *Febr. cap. 8.*
¶ 8. Meth.
Deinde, naturali in viventibus deper- *7. ¶ 11. cap.*
dito calore, extraneum succedere necesse *4. ¶ 8. ¶*
est, cuius est vrere, putrefacere, corrum- *in 3. Epide.*
pere, & tandem in cineres resolvere, præ- *Com. 7.*
cipuè si subiectum nactus sit calidum & *Auic. lib. 1.*
humidum, quale est puerorum corpus, *Fen. 3. ¶ lib.*
quod cū multo humore scateat, verè, ut *4. Fen. 1. ¶*
loquitur Aristotel. *ἡ φαρμακία* dici potest. *tract. 2.*

R

Alterum quæstionis caput positum est in inuestiganda illa intemperie, siue simplici, siue composita, quæ tantam duritiem peperit, & ab iisdem fontibus emanat præcedentis dubitationis solutio, cum ea durities sola, vel quæ eam attulit, causa (nihil enim eximiè siccum putrescit) corpusculum istud à putredine vindicauerit.

*Galenus 3.
Epid. Com. 3.*

Omne autem durum, inquit Galen. 5. Simpl. cap. 3. fit vel plenitudine & renitentia, vel concretionem, vel siccitate, hisque vel solis, vel inter se complicatis. Induruitne verò iste fœtus repletionem, cum nihil in fœtu, neque in eius inuolucris turgeret largiori humore, vel naturali, vel excrementitio. Imò illa essent omnia exsiccata, & arefacta? Concretionem accusabimus, quam etiam congelationem appellat Galenus, qua metalla plurima in fodinarum penetralibus: saxea, in lapidicinis: Meteora, in media aeris regione videmus congelari & concreescere: sed quid externa exempla huius cōgelationis quærimus, cum domesticum suppetat, & nobis sit præ foribus.

*La Fontaine
de Vero.*

Est enim in nostra vicinia propè oppiduli Veronæi mœnia, fons perennis scaturiginis

turiginis, aspectu iucundissimus, lym-
pha limpidissima, colore quidem & o-
dore ἀρωματικός, sed sapore non ita commen-
dabili, incolis tamen non ingrato. Erum-
pit autem ex altissimis subterraneis cu-
niculis, labroque, vel potius cratere ex-
cipitur ita affabrè in orbē circumducto,
ut nescias illamne περὶ φύσιν natura dede-
rit, an verò ars Euclidis exquisitissimum
istum circulum elaborauerit. Sic autem
ad labri margines exundat aqua, ut sta-
tim & brevissimo ductu decurrat in ro-
tām, quæ molam frumentariam circum-
agit, indeque cum glarea, quam curren-
te alueo secum abradit, guttatim in sub-
stratum lutum & proximā vīnæam de-
cidit, quæ omnia sua frigiditate ita subi-
git, fermentat, & cogit, ut tandē in lapi-
des induret, leues quidē illos & forami-
nulentos, & veluti pumiceos, quorumq;
vnā aliquando partē videas iam petrefa-
ctam: alteram verò adhuc agnoscas mu-
sco herbaceo virentem & cœnosam, quæ
tantū lapidescere incipiat. Coguntur verò
illi lapides tāto aggere, ut nisi ex interual-
lis molitor eos ferreo malleolo conterat
& subtrahat, impedimēto sint ipsi mole-
trinæ, quò minus liberè circunuoluatur.

Ista obiter dicta sint de λιδιασει, quæ ex aquæ istius frigiditate & fortasse nativo solo procreari videtur.

Similis autem aut potentioris congelationis quis potest esse locus in internis recessibus nostri corporis, qui multi sanguinis & venosi, & arteriosi affluxu, vicinorum viscerum benigno tepore, & ea functione ad quam has partes natura finxit (cùm in ipsas, ut in agrum sæcundum nostræ generationis prolifica semina committat) minus algere debeant. Sic Hippocrates frigidos, siccos, densosque vteros, ut effætos pronunciat. Quòd verò Galenus de Anatomia viuorum, adipem, frigiditate spermaticarum partium, & à cordis calore magis distantium, concreescere scribit: certè ut ex imbecillo frigore vli-ginosa materia facilè concrescit, ita quoque leuissimo calore illa liquatur: hinc verò de lapidosa duritie agitur. Restat igitur, argumèto ab enumeratione partium petito, corpusculum occalluisse siccitate, ad quam non parum fecisse videbuntur dolores assidui, quos gestans sustinuit. Item vigiliæ & inedia, quibus diu multumque vexata est, quæ omnia ad causas exsiccantes referunt Medici. Adiciere licebit

cebit illum vteri *κατακλυσμὸν*, quo pro puerperio multus ichor è mulieris loculis effluxit, sicque & vterus & fœtus, eiusq; inuolucra exaruerint, absorpta omnis putredinis materia, quam in humido, & naturali, & excremētio positam esse, Physici autumant. Solane verò siccitas tantam duritiem peperit, cum qualitas sit patiens, & ad agendum ignaua: Causæ autem ad suos effectus analogæ esse debent, & viribus pares? Ex quo fit, vt sit verisimile siccitatem solam non potuisse eò usq; indurare, sed alterutri qualitatum *πρακτικωτέρων*, frigiditati nempe, aut caliditati coniunctâ. Frigiditatineq; vt siccitati congelatio accesserit mixtis his duabus inter se indurationis causis? Si enim quæ putrent, se ipsis fiunt calidiora & humidiora, consequi videtur (vt contrariorum contraria sunt consequentia) ea quæ non putrent cum putrescere nata sint, id habere à frigido & sicco. Præterea, promptius quæque alterantur, à similibus suæ intemperaturæ causis. At hîc cutis naturâ frigida & sicca, potissimū saxeam eam duritiem induit (vt in ovo testa ex molli tunica occallescit) ex quo fit, vt sit verisimilius istam

duritiem à frigido & sicco excitatam. At neque loci, in quo concreuit temperies, neq; vlla humana ratio id patitur, vt dictum est, cū de concretione ageretur. Iam videamus, an caliditate siccitati coniuncta istud corpusculū induruerint, cū à tot tantisq; laboribus tandem, veluti febre hectica colliquata fuerit illa, & contrabuerit. Cū præterea calidis & siccis medicamentis, tū intrò sumptis, tū foris admotis assidua illa tormina sedare, flatus discutere, & molestissimum illud vteri onus, & quod subinde exitū minari videbatur, deturbare conabatur imperitissimum muliercularum vulgus. A coniunctis hisce causis, & salis glebæ, & alumina, & chrysocollo, & chalcāthi genera indurantur, quæ postea humore liquantur, cū antè calido & sicco obdurerint.

Tertiū huiusce disputationis caput positum est in harum intemperaturarū siue simplicium, siue compositarum differentia: nempe, sintne illæ externæ tantū & aduentitiæ, an verò aliquod ab ipso corpusculo ἐνδιάθετον innatum & latens acciperint initium. Nam licet ea, quæ de causis proposita sunt, habeāt quandam speciem

ciem adumbratæ veritatis, multū tamen
absunt ab ordinatis naturæ legib⁹. Quid
enim illas causas accusamus, cum omnes
sint externæ, & huic corpusculo aduen-
titix, quæ sine internarum aptitudine, ni
hil videntur posse agere? Non enim om- *Gal. de Diff.*
nis causa, quæ corpori aduenit, inquit *febr.*
Auicennas Doct. 2. Fen. in ipsum opera-
tur, sed ad id requiritur & agentis forti-
tudo, & dispositio patientis.

Hic igitur præter communem consue- *Galenus lib.*
tudinem (cū natura hominis corpus *Quod animi*
molle & tenerum finxerit, vt quod ad *mores, &c.*
functiones animæ magis aptum esset, *& 1. de Vsu*
quàm si induruiſſet) latuisse dicemus a- *part.*
liqua huiusce indurationis seminaria,
vt orta respondeant suis principiis, &
insitam vim quandam peculiarē & ab-
ditam, quæ ab externis illis causis exci-
tata, tandem in lucem emerſerit, vt singu-
lorum quæ fiunt, interna quædam effe- *Gal. libr. de*
ctrix causa existit. Physici enim rerum *Caus. procat.*
omnium formas, excepta illa principe,
quæ diuinioris est originis, ex materia
educi putant. Item & Spagyrici, qui eas *Petrus Da-*
profitentur esse *ἀντοφύεις*, neq; extrinsecus *nus in sua I.*
accedere, sed delitescere in ipsis semini- *dea med.*
bus, quæ (vt sua arcana tegunt, quibusdā

verborum inuolucris) suis matricibus consentanea esse oportet.

Quòd si dempta illa ratiocinatrice, formæ quæ dāt esse rei (vt Logici dicūt) educuntur à primarum qualitatum temperamento , illa etiam erunt ab eadem scaturigine, quæ necessariò primam illam temperaturam sequuntur, inter quæ non solùm odores, sapores & colores reponunt Medici , sed etiam mollitiem & duritiem. Proinde præter externas caloris, frigoris & siccitatis causas & aduentitias (quamuis variè sentiant & Philosophi & Chymistæ, de lapidum & fossilium , & efficientibus , & materialibus causis) alij succum, alij lixiuium, alij sal, alij aquam congelatiuam , non solùm vt materiam indurationis, sed etiā vt quodammodo effectricem, & in ipsis indurantibus insitam, fixamque delitescere, proferunt. Sic Corallium, cui proprium est veluti quarto modo (vt Scholæ loquuntur) aeris expositum lapidescere, ideoq; λιπόδενδρον Græcis appellari (cū mollis fuerit liquidis prius herba sub vndis) Non quidem solùm ab ambientis frigore induratur, sed quòd absconditam habeat in se suæ duritiei energiā, quæ

quæ à circumstante aere affecta, illâ produxerit. Præterea Matre ab illis causis colliquata, nihil fœtui decessit de pleno corporis habitu, quem alioqui absumi & concidere necesse fuisset, si easdem causas fœtus sustinuisset, humore tum fluente, tum implantato, vi caloris extranei absumpto.

Molas quidē in suis sinibus sæpè con-
 crescere, & in gestantibus consenescere,
 imò iis cōmori certum est, vt multa scir-
 rhosa, tophacea & lapidea in nobis ge-
 nerantur, aluntur, & augentur, cū ex-
 crementitia sint corpora, imperfecta &
 sola viuant anima vegetabili, vt etiam
 in externis rebus ligna lapidescere vide-
 mus, eorumque cortices: item & plantas
 nonnullas. Sed quæ perfecta sunt ani-
 malia, cū primordia suæ generationis
 habeant potentissima, eorum extincto
 innato calore, humiditatem putrescere
 oportet (vt interitus proxima est via ad
 putredinem) concurrentibus præcipuè
 aliis putrilaginis causis, vt dictum est
 antea.

Quòd autem recensent nonnulli, ex
 aliorū fide, & hominis pedem & caput,
 imò & totum corpus, visa fuisse indura-

ta, id multum abest ab eo, de quo hic agitur, cum de induratione foetus in spirantis vtero differatur: illa verò asseruata esse dicant, conditura & concretione cadaverum in sale quodam terræ, ut inquirunt, vegetatiuo, quo omnia ferunt dealbari, indurescere, & coalescere.

Istam pugnantium argumentorum litem, quæ vires eundo magis ac magis acquireret, dirimat æquus arbiter. Ego verò nouorum Academicorum more, desinam in ἐποχῇ, suspensamque sententiam, ut canant Cygni, sicut est in proverbio, tacentibus graculis, excitenturque docta ingenia, ad scrutanda summi opificis, naturæque miracula, & ad eruendas eorum causas ex Philosophorum Thesauris, in eo præcipuè spectaculo, in quo à primo ortu, neque in familiarium partium temperie, neque in instrumentalium figura, numero, situ, aut connexione natura peccauerit. Ideoque nihil hinc sit monstrificum, cum nullā habeat istud corpus deformitatem notabilem, toti suæ speciei extraneam, quam à prima origine sortitum sit. Plinio autem lib. 7. cap. 18. Nat. hist. si mirum fuit, quosdam cōcretis ossibus extitisse, & sine medullis: quod
porten-

portentum istud fuerit foetū extractum,
imputrem, imò in suo veluti ergastulo la-
pidefactum, tot mensibus & annis à ma-
tre circumgestatum fuisse?

SIMEONIS

PROVANCHERII
LINGONENSIS, ET APVD

*Senonas Medici, de huius in-
durationis causis
opinio.*



D partu anatomico eius mu-
lieris, quæ in Senonum vrbe
vixit annos octo & sexagin-
ta, & cui extinctæ, eruta est
puella iustæ molis, quæ in vteri sinu o-
ctauum & vigesimum annum impleue-
rat, Gallicè scripsi. Eundem partum, qui
Latine & copiosè loqueretur, ad exte-
ros relegare decreuerā, cui Physicas, sed
ē re natas exercitationes meas adiunge-
re operæpretium videbatur. Inter mo-
ras Albosius Hæduus, qui excudendam
spectaculi effigiem curauerat, eius histo-
riam Latine exprimit. De qua scribēda,
iam pridē amicorū, & maxime exterorū,

ad quos ut nominis, ita eruditionis suæ fama peruenit, literis frequentibus urgebatur. Hic oratione graui & veridica, flagitantium votis respondet, ut mollis in obsequium, facilisque rogantibus esset. Historiæ de induratione fœtus in vtero physica & problematica inquisitio accessit. Vtraque mihi tantoperè placuit, ut in ea vertenda, Gallicè meam operā requirere visa sit: nec eius Autorē plenius cōmendabo, ne quia viuit, & eiusdē vrbis sumus incolæ, in fœdam adulationē me demitti, in multorum opinionem irrepāt. Et quia in dubia & ancipiti re sic animus consistit, neminem mirari oportet, si in apertum campum descendam, & vtraque lingua mearum exercitationum breuiter ac summatim Epilogum adiciam. Ergo rem ipsam aggredior.

*Gal. lib. 14.
de Vsu parti.*

Vterus *μήτρα* Græcis, quem Deus ad concipiendum fœtum destinauit, crassus & impactus carneum quid refert: cæterum nervosus & membranosus est, ut gestationis decursu in amplitudinem posset extendi: ac semen, quod hominis abstractum, Zeno appellare nō dubitauit, in vteri sinum effunditur, idque vnicum propagationis perpetuę subsidium comprehend-

prehensione firma cōcipitur. Ex quo primum omnium inuolucra genituræ procreantur, mox reliqua membrīs & articulis distincta, semine genitali opifice, nec non spiritu sanguineque menstruo administris instruuntur, vsque dum opus esset absolutū. Cū igitur fœtus hic Senonensis à conceptionis die, ad prima suæ speciei lineamēta nouem mensium processu, iustam in vtero materno corporis organici molem addidisset, matri, quæ huic grandiori alendo superesse non poterat, initium partus induxit. Fit enim *Gal. lib. 15. de Vsu part.* cū diruptis, calcitratu & motu valido, pueri membranīs, ipse à vinculis exolutus forās prodit, & ita perfectus est, ut per os nutriri possit.

Diuisis porrò inuolucris, ichores prodeunt multi, & membranofum quid cruore tinctum, referente marito: tumq; graues & iniqui dolores, qui confertorum spirituum vi accidunt, matrem excruciant. Frustrà hæc sunt omnia: hæret infans vtero, quem neque proprii motus, neque matris impetus, possunt excludere: tandem alimēti penuria, ob quam sibi moliebatur viam & exitum, breuissimam vitam cum morte commutauit.

Ex significatione huius noui partus, quæ in lucem edita mense Maio superiori, potuit intelligi, quod scriberem hunc fœtum ante indurationem, vixisse, ac seruatum fuisse instar molæ. Non deerunt, qui ex eo loco capient opinionem, me fœtui animalis vitam abnegare. Imò rârū habeo, intelligentem animam membris affabrè concinnatis suæ speciei consentaneam affulxisse. Atqui hoc vnum cogitabam, vt indicarem tam fœtus q̃ molas posse vterò ad plures annos affigi: nam molæ vitium & materiæ absurditatem sequuntur, quarum onus ægrè natura sustinet: fœtus verò, sunt opus benignioris naturæ, ad quos concipiendos vterus comparatur. Adde quòd irriti cōceptus ad putredinem, si vitæ expertes inanimatorum, & animati vitalibus conferantur, q̃ fœtus sunt procliuiiores: siquidem illi humida & lubrica constant materia, quæ facilè putrescit: fœtum verò compacta, vt plurimum dura & sicca est substantia (vt qui ex nervis, venis, membranis, vinculis & ossibus consistunt) cuius ratio putredini reluctatur. Pars enim sicca ægrius putredinem admittit. Poterat tamen hic fœtus

tus Senonensis ad putredinem progredi: Cur ergo ab extinctione caloris, illam effugit, & occalluit? Refrigeratur vterus præter naturæ suæ modum, fracti caloris imbecillitate per irritos labores partus, per eruptiones aquarum, per effusa quædam cruenta, per concepti frigidi externam iniuriam. Frigus enim, dehiscence vtero, & diductis cruribus in expectatione puerperij, admittitur. Ex victoria frigoris, humores, qui venis mediisq; spatiis vterinæ molis & conceptæ puellæ pertinacius impacti erant, concretione coguntur: perinde ac gelatis accidit: sic enim affecti κατεχόμενοι appellantur, qui eam formam retinent, in qua deprehenduntur. Fit autē id malū ab humore frigidiore & congelante. Etenim frigore humida concresecunt, quod Gal. in 6. Epide. ex spontina scirrhorum generatione partefecit. Com. 3. sect. 14. Coeunt autē vsq; adeo humores, Hipp. lib. de Carn. & in concretione deducuntur, ut cū vtero fœtus scirrhosam planē, callosamq; duritiem cōtrahat. Nā & ex frigore duritiem fieri docuit Gal. Humores autem qui demissi sunt, in concretionem, crassi erāt & 5. Simplex cap. glutinosi: alioqui nunc fœtus vterusq; in callosam duritiem essent progressi,

4. *Meth. ca-*
pite 4. & 5.
Simpl. cap. 1.
& 3. de Loc.
affect. cap. 1.

Erant & frigidi: nam scirrhus, ut Gale-
 no placuit, omnisque tumor scirrhusus
 ex humore crasso, viscido ac frigido na-
 scitur, qui in parte frigida, siue sit melan-
 cholicus, siue pituitosus, siue ex vtrif-
 que mixtus, facile concrescit. Frigus e-
 nim humores congelat, ut diximus, &
 maximè frigidos. Itaque hoc in agendo
 potentissimum, simul atque foetum cum
 utero excepit, in utroque efficiens indu-
 rationis causa extitit, quæ quidem cor-
 pusculo & uterinæ moli, ex materiæ &
 humoris ratione, impendebat.

His igitur ad absolutam duritiem per-
 gentibus, sensim humor per halitum re-
 solutus est: non enim crassa, refrigerata,
 concretaque restitit, & in callum uteri
 perinde ac infantuli moles coaluit, ante
 serosi recrementi vaporationem. Nulla
 verò humiditas, post hanc coitionem per
 venas, quæ solæ foetui alimentum confe-
 rebant, in media uteri spatia illapsa est,
 ac proinde facti serii & cruoris effluuium,
 quod ad puerperij tempus natura depo-
 suit, in loco frigido, sicco & saxeum, pro-
 les madere desiit: imò durum occursum indu-
 ruit. Nam & humor, qui circa articulos
 colligitur, ex ossium natura, testante Hip-
 pocrate,

pocrate, duritiem induit. Dicit aliquis ex Physicorum & Medicorum sententia, frigore concreta, calore liquari: cui satisfactum fuerit, si respondeam, alias indurationis causas à frigore indissolubilem vteri & genituræ concretionem reddidisse, idque scirrhusi tumoris modo, qui siccitate & frigore concretus, nunquam emolliri potest. Igitur nihil aderat per ariditatem loci, quod foetum faceret obnoxium putredini: exhausta erat omnis humiditas innata, nulli aduentitiæ per vteri crassitiem ac duritiem aditus patebat ad induratum foetum, quo seipso redderetur humidior. Nam quæ putrent, ait Hippocrates, se ipsis humidiora fiunt. Porro confirmata indies duritiæ, proles illa perinde ac scirrhus, vtero scirrhuso affixa, potuit integra forma, in mortis maternæ tempus conseruari, citra insignem earum partium colliquationem, quæ natura sua laxiores absumi poterant, nisi concretio à frigore irrepsisset. Quod factum fuisse adeo mirum videri non debet, quum neque ossa indurata, neque calli, porive, qui generantur in nobis, procedente die minuantur. Hæc mea est compen-

S

272 DE EMBRYONE PETREF.

diaria argumenti propositi disceptatio,
candide Lector, si quid rectius illa no-
ueris, imperti : si non, hac
utere mecum.



FINIS.



❧❧❧❧

RERVM ET VERBORVM MEMORABILIVM INDEX.

- A*
- A** Bdomen canterio
actuali apertū es-
se, Historiis qua-
tuor comprobatur pag.
83. ad 88
- Aesculapius vtero exse-
ctus. in Præfat.
- Anatome Caspari Bauhi-
ni 193. 237
- Apollo primus fœtum ex-
cidit. in Præfat.
- Aqua fontana in lapidem
concrescit 156
- B*
- B** Ruta dum castrantur,
quid eis auferatur 116
- C*
- C** Alculus cur per Peri-
næū fuerit extractus
68. peculiari ne mem-
brana inuoluatur 48
- Calculus renalis per lum-
bos reiectus 65. 68. i-
lijs apertis perquisitus
70. perquiritur nouo
modo 60. ventre aper-
to perquiritur 59
- Calculi materia & auctio
49. renalis extractio
superflua, suspecta, raro
- necessaria 71
- Calculi sectionē male ex-
peti 53
- Calculo extrahendo atas
conueniens 55. 56
- Calculi extrahi vt debeant
per Hypogastrium 53
- Carnis species 74. 193
- Catelli secundinas separa-
tas habent 156
- Cæsares vnde dicti. in Præ-
fat. & 2.
- Cæsarea sectio triplici ar-
gumētorum genere con-
firmatur 8. vt institu-
ta 16. vt administran-
da 163
- Cæsaream sectionē minus
periculosam, quàm sit
calculi extractio 51. cō-
probantes historiæ II.
12. 13. 14. 15. 177. ad 188
- Cæsarei partus nomine qd
intelligatur I. vsus &
necessitas 3
- Celsi locus corrigitur 56
- Celsistica calculi extractio
53
- Cerebrum vulneratū con-
solidatur 74
- Cerebri substantia laesa 94

INDEX.

- Circuli uterini* 218
Clysmata per os reiecta 64.
an ad tenuia perveniat
intestina 233
Clysteres uterini 173
Contortio matricalis 129
Convulsionis causæ 121
Convulsionem in sectione
uteri non esse metuen-
dam 121
Cordis apostema 93. *eius*
auriculæ abscessus 94
Corpus hepate & liene ca-
rens 238
- D
- D** *Ecoctum post sectionē*
Casareā necessarium
 170
Dolorem utero secto non
esse magnum 122
- E
- E** *Embryon per annos* 28.
in utero materno con-
tentum 247
Emmotum 134
Eunuchis in Turcia & te-
stes & penis auferuntur
 III
- F
- F** *fecunditatem post se-*
ctionem Casaream re-
manere 127
Fætus lapideus 247
Fætus mortuus per latus
extrahitur 17. 22. 188.
 191. *per latus extractus*
eadem tamen rursus na-
- turaliter bis enixa* 18. 22
Fætus naturalem exclusio-
nem impediētes causæ 5
Fætus putrefactus per an-
nos tredecim in utero cō-
tentus 91
Fætus 15. diebus brachium
per umbilicum extēsum
habuit 98
Fluor uterinus in gravidis
unde 150
- G
- G** *Allorum & gallinarū*
castratio 119
Gastreraphia perfecta in
hac sectione necessariō
non requiritur 18. 52
Guidoniana calculi extra-
ctio 56
- H
- H** *æmorrhagia in sectio-*
ne musculorum abdo-
minis non metuenda 26
Hepate carens corpus 238
Hepaticorū suppuratorum
vfio 45
Hernia in mulierib. quan-
do utilis 32
Homines gelati 269
Hydropicus culiri ictu cu-
ratus 44
- I
- I** *liorum sectionem nō esse*
necessariō lethalem 62
Instrumenta necessaria ad
sectionem Casaream 165
Intestini secti citra mor-
tem

INDEX.

- tem historia 228
 Intestina læsa curari 74
 Intestinorū longitudo 236
L
 Apides ex fontis cuius-
 dam aqua 256
 Latus quodnam ad sectio-
 nem Cæsaream eligen-
 dum 167
 Lemnisci 134. 216
 Ligatura vteri, plapsi 107
 Lithopædion 247
 Lochia quid sint 35
 Lumborum apostema cau-
 terio apertum 69
M
 Ariana calculi extra-
 ctio 55
 Menstruus sanguis ex ute-
 ri corpore 102
 Menstrua cur & quando
 fluant 35. per nares &
 per vomitum reijci 154
 Mole an ex solo muliebri
 semine 146
 Mulier fatum annis 28.
 vterog gerit 248
 Mulier fatum mortuum
 gerens, rursus tamē gra-
 uida redditur 95. post
 sectionem naturaliter e-
 nititur 12. 17. 18. 21. 179
 Mulieri semel fœtus exse-
 ctus 14. 15. 19. 20. 177.
 181. 183. 186. iter exsectus
 11. sexies exsectus. ibid.
 Musculorū abdominis ab-
 scissus, eiusque curatio
 42
 Musculus abdominis sectis,
 quò sanguis fluat 27
 Musculos abdominis absq;
 periculo secari posse 24.
 231
N
 Eruus qui ad vterum
 mittitur 123
O
 Mentum secari posse
 93
 Omenti pars abscissa 204.
 209
 Os pabris in partu dissolui-
 tur 6
 Os vteri an post conceptū
 occludatur 145
 Ossa infantis per alium re-
 iecta 79
 Oua subuentanea quæ 119.
 146
 Ouium castratio 117
P
 Aracelsus quid suis di-
 scipulis reliquerit 72
 Paracenthesi qua ratione
 periculosa, & cur tam
 rarò vsurpetur 43
 Pater filium è latere con-
 iugis extrahit 12. 177
 in Perinæi sectione quæ
 occurrant ledenda 50
 Peritonæum absque peri-
 culo inciditur 28. 231
 Peritonæi ruptura vt cu-
 S 2

INDEX.

- rabatur 29
 Peritonæi substantia, finis,
 fibræ 30. principium
 31. sectio an periculosa
 42. vstio 44. magna
 sectio 45. 231
 in Peritonæi sectione spa-
 smum non esse metuen-
 dum 29
 Peritonæo inciso Hernia
 remanere consuevit 31.
 52. hæmorrhagia metuē-
 da non est 33. 232
 Pessarium conceptum non
 impedire 132. exemplis
 comprobatur 138. non
 impedire cōgressum 155.
 non impedire receptio-
 nem seminis 155
 Pessarium in vteri cauita-
 tem indi 142
 Pessarium vnū & idem p
 annos 40. gestatum 140
 Pessaria 104. 216. ea col-
 lo vteri indita prociden-
 tiam vteri non curare
 144
 Pessaria post sectionem ne-
 cessaria 172
 Pessariorum formæ 217
 Pulmones multis annis pu-
 re referti 93
 R
 REN quando secandus
 71
 Renis cicatrix 66. mem-
 brana solūm integra, ab-
 sumpta substantia 67
 Renes an secari possint 62
 Renū apostemata 63. eo-
 rum vulnus non neces-
 sariū esse lethale 65
 Renales calculi per lum-
 bos reiecti 63
 Rupturam in mulieribus
 sectis conducere infanti
 129
 S
 Sanguis grauidis cur
 mittatur 135
 Scipio Africanus Cæsarum
 primus è matre exsectus.
 in Præfat. & 2.
 Secreta veteres Medici sibi
 reseruabant 159
 Semē, hominis abstractum
 266
 Spasmus ex punctura, se-
 ctione curatur 30. 126
 Sperma grauida emittunt
 152
 Splenis parēchyma absum-
 ptum 92
 Splene & hepate carens
 corpus 238
 Superfætationis historia
 147. 221. ad 227
 Syncopen non esse metuen-
 dā in sectione vteri 120
 Sypho 135
 T
 Tumor inter inguina &
 ilia ex calculo in vre-
 tere contento 64
 Valunla

INDEX.

V

- V**Alvula intestini coli
quandereperta 235.
quō inuenienda 234. i-
psius vsus 237. in cane
qualis sit 236
- Ventriculus vulneratus cu-
ratur 75
- Versio hæc qualis 187
- Vesica etiam in parte mem-
branosa cōsolidatur 74.
eius rei historia 75. 192
- Vesica vsus 47. eius sub-
stantia 73. 192. eius læ-
sio an incurabilis & le-
thalis 73. 192
- Vesica sectio noua compro-
batur historijs 58
- Vesica in gravidis constitu-
tio 24
- Via per quam fœtus exclu-
di debet, cur angustior
§
- Vrina stillicidiū ex sectio-
ne Vesicæ 52
- Vterus cur alterum dica-
tur animal 122. cur &
quando prolabatur 133.
quid faciat in forma-
tione 130
- Vterus dum vrina redde-
retur elapsus 110
- Vterus in brutis eximitur
in castratione 117
- Vterus incisus sutura non
indiget 33
- Vteri actio 47. substan-
tia 266. incisi cum ve-
sica incisa comparatio
47. eius vulnus am pe-
riculosum 33
- Vteri spontè absque morte
elapsi historie 109. 208
- Vteri absque morte putre-
facti historie 88. ad
100. 205
- Vteri absque vita periculo
ablati historie 100. ad
109. 204. ad 216
- Vteri cum fœtu putrefacti
historie 78. 90. 201
- Vteri os in gravidis reclu-
ditur 141. 220. quod
probat 144
- Vteri prolapsus curat Pesi-
sarium 137
- Vteri post vulnus cicatri-
cem fecunditatem non
impedire 128
- in Vteri carnosâ substantia
collectio librarum qua-
draginta 125
- Vtero ablato, mulier tamē
in coitu semen emittit
207
- Vterum parum sensibilem
esse, ubi sectio sit 122
- Vterus virginis bipartitus
227
- Vulnus post sectionem Cæ-
saream vs consuetum 16.
18

FINIS.



